

JOS BLONG JISAS KRAES BLONG OL LATA-DEI SENT • OKTOBA 2011

# Lahona



BUK BLONG MOMON:  
WAN NARAFALA TESTEMAN  
BLONG JISAS KRAES



*Tru long Presen mo Paoa blong God, i kam long Saemon Diwi*


*Buk blong Momon, we i kam tru long Profet Josef Smit, i wan translesen blong ol toktok we oli rae tem long ol buk blong bifo, mo “oli bin rae tem fo lem koman men, mo tu tru long spirit blong profesi mo blong revelesen—Oli bin rae tem mo lokem, mo oli bin haedem wetem Lod, blong mekem se oli no save lus—Blong kamaot tru long presen mo paoa blong God blong tanem toktok blong hem— . . .*

*“ . . . We i blong soemaot long ol smol haf nomo blong laen blong Isrel wanem ol gudfala samting we Lod i bin mekem long ol bubu blong olgeta; mo blong oli save gat save long saed blong ol kavenan blong Lod, blong hem i no sakemaot olgeta blong oltuem—Mo tu blong winim tingting blong ol jiu mo Jentael we JISAS hem i KRAES” (taetol pej blong Buk blong Momon).*



Liahona,  
Oktoba 2011

4



46



## Welkam long Spesel Namba ia

I gat sam topik we i gud blong oli tokbaot long wan ful magasin, mo Buk blong Momon i wan long olgeta. Long namba ia, ol profet, blong bifo mo blong tedei, mo tu ol memba raon long wol, oli testifae abaot spesel buk blong skripja ia. Ples we hem i kamaot long hem i olsem wan merikel. Hem i wan pruf we man i save holem abaot Restoresen o Gospel we I Kambak. Hem i ki ston blong religijn blong yumi. Mo oli bin raetem blong dei blong yumi—i stap tijim klia doktrin blong Kraes mo i stap bildimap nomo fet blong yumi, mo i stap mekem ol famle blong yumi oli kam strong moa.

Nomata bae yu no luk plante sekSEN we yu save faenem oltaem insaed long *Liahona*, be Fas Presidensi Mesej (pej 4) mo Visiting Tijing Mesej (pej 46) oli stap nomo. Ol mesej mo evri nara atikol insaed, oli serem ol teste-moni mo ol tijing we oli kamaot long Buk blong Momon.

Mifala i invaetem yu blong stadi long namba ia wetem prea; tekem ol me-sej ia long hat blong yu, mo serem olgeta—mo serem Buk blong Momon—wetem ol narafala man.

## OL MESEJ

**4 Fas Presidensi Mesej:  
Ol Gudfala Promes blong  
Buk blong Momon**  
I Kam long Presiden  
Tomas S. Monson

**46 Visiting Tijing Mesej:  
Sapos Yumi No Stap  
Gat Tu Tingting**

### LONG KOVA

Fored: Foto pikja i kam long Jon Luk; *Blong Yufala I Save*, i kam long Gari Kap, Mista mo Misis Deved Larsen i givim wetem glad hat, yu no save mekem kopi. Bak: *Fes blong Kraes*, i kam long Henrik Hofman, C. Harrison Conroy Co i givim wetem gladhat.



## OL SPESEL STORI

### 6 Profet Josef Smit: Transleta blong Buk blong Momon

*Wan yang man we i no skul i kam, tru long paoa blong God, transleta ia we i kasem insperezen blong raetem "buk ia we i moa stret long eni narafala buk long wol."*

### 10 Wanem Nao Buk blong Momon I Stap Tijim Yumi Abaot Lav blong God

I kam long Elda Rasel M. Nelson  
*Yu yu wantem bon bakegen long saed blong spirit mo kasem paoa blong lavem man olsem we God i lavem man? Buk blong Momon i eksplenem olsem wanem blong mekem.*

### 16 Stori blong Buk blong Momon

*Atikol ia i save helpem yu blong tijim ol pikinini blong yu abaot ol impoten stori we i stap long skripja buk ia.*

### 20 Taem Laen blong Buk blong Momon

*Bigfala lukluk long ol ki pipol, stat long ol man blong Jared long yia 2200 B.K. (Bifo Kraes i bon) i go kasem en blong taem blong*



*ol man blong Nifae long yia 420 A.K (afta Kraes i bon).*

### 22 Hu Nao I Raetem Buk blong Momon?

*Wok blong ol profet blong bifo, wan man we i putum tugeta ol buk tru long insperesen, mo wan transleta blong lata-dei oli mekem Buk blong Momon i kamtru.*

### 24 Buk blong Momon: Wan Witnes long saed wetem Baebol

*Hemia 14 stamba doktrin we Baebol i tijim we Buk blong Momon i givim wan moa witnes long olgeta.*

### 28 Olsem Wanem blong Stadi long Buk blong Momon

I Kam long Elda D. Tod Kristofeson

*Trifala risen mo trifala wei blong stadi long stret buk blong skripja ia.*

### 32 Drim blong Lihae: Stap Holem Taet Rel blong Aeal ia

I Kam long Elda Deved A. Bedna  
*Drim blong Lihae i tijim yumi olsem wanem blong holem strong toktok blong God.*

### 38 Buk blong Momon: Stap Mekem Fet blong Yumi long Jisas Kraes I Kam Strong Moa

I Kam long Elda Nil L. Andesen  
*Buk blong Momon i stap invaetem yumi mo ol famle blong yumi blong akseptem fet long Lod Jisas Kraes, we bae i helpem ol famle blong yumi blong gat gud laef.*

### 47 Miusik: Tu Taosen Yang Strong Soldia

I Kam long Boni Hat Merei mo Janis Kap Peri

### 48 Ol Tijing blong Taem blong Yumi



*Ol profet mo ol aposol we oli laef oli serem ol trutok we i kamaot long Buk blong Momon we i save lidim yumi long tedei.*

### 52 Buk blong Momon—Ki Ston blong Relijin blong Yumi

I Kam long Presiden Esra Taf Benson  
*Toktok ia we evriwan i save, i kamaot 25 yia i pas, i tokbaot ol testemoni mo kaonsel we i no save ded wetem taem, abaot Buk blong Momon.*

### 59 Wan Tabu Wok

I Kam long Deved A. Fets



## 60 Sapos Yu Wantem Save Tru, Bambae Yu Save Stret

I Kam long Elda Wolta F. Gonsales  
*Fofala wei we yu save kam  
 blong save se Buk blong  
 Momon i kam long God.*

## 65 Posta: Wan Voes we I Kamaot long Das

## 66 Wan Faea we I Stap Bon Insaed long Mi

I Kam long Maekel R. Moris  
*Dei ia we Eduardo Kontreras i  
 bin lanem blong rid, i dei ia tu  
 we hem i bin kasem wan teste-  
 moni abaot Buk blong Momon.*

## 68 Olsem Wanem Buk blong Momon I Bin Jenisim Laef blong Mi

*Ol memba oli testifae long ol-  
 sem wanem Buk blong Momon  
 i bin helpem olgeta blong fae-  
 nem ol ansa, faenem kamfot,  
 mo i bin helpem olgeta blong  
 jenisim laef blong olgeta.*

## 72 I Go long Evri Lanwis mo Pipol

I Kam long Lia MaKlanahan  
*Long ol Lata-dei Sent raon long  
 wol, i no gat wan samting we  
 i bigwan moa bitim blong gat  
 Buk blong Momon long lanwis  
 blong olgeta.*

## 76 Ol Kwestin we Oli Askem Oltaem abaot Buk blong Momon

*Ol simpol ansa long ol kwestin  
 we ol pipol oli askem oltaem  
 abaot Buk blong Momon.*

## 80 Wan Testemoni, Wan Kavenan, mo Wan Witnes

I Kam long Elda Jefri R. Holan  
*Mi testifae abaot buk ia, sem-  
 mak olsem sapos we mi bin stap  
 wetem Ol Tri Witnes mo Ol Eit  
 Witnes, se mi bin luk olgeta buk  
 ia we oli wokem long gol.*



*Plante long ol peinting long namba  
 ia i soem pikja blong Liahona ia we  
 Lihae i bin kasem. Ol defren Liahona  
 ia, oli no haedem olgeta, be ating i no  
 semmak olsem hemia antap, be yu mo  
 famle i save gat gudfala taem blong  
 faenemaot hamas Liahona yu save  
 faenem insaed long ful magasin ia.*

## OKTOBA 2011 VOL. 5 NO. 2 LIAHONA 09690 852

Ofisol intanasonol magasin blong Jos blong Jisas Kraes blong Ol Lata-dei Sent

**Das Presidensi:** Tomas S. Monson, Henri B. Aering, Dita F. Ukdo

### Kworum blong Olgeta Twelef Aposol:

Boed K. Peka, L. Tom Peri, Rasel M. Nelson, Dalin H. Oks, M. Rasel Balad, Rijad G. Skot, Robert D. Hels, Jefri R. Holan, Deved A. Bedna, Kwentin L. Luk, D. Tod Kristofeson, Nil L. Andasen

**Edita:** Pol B. Paepa

**OI Advaesa:** Keith R. Edwards, Kristofel Golden Junia, Per G. Malm

**Manejing Daerekt:** Deved L. Frisnej

**Editoriol Daerekt:** Vinsen A. Vogon  
**Grafik Daerekt:** Alan R. Loeboj

**Manejing Edita:** R. Val Jonson

**Asisten Manejing Edita:** Jenifa L. Grinwud, Adam K. Olson

**OI Asosiet Edita:** Susan Baret, Rian Kar

**Editoriol Staf:** Britani Biti, Deved A. Edwods, Matiu D. Fliton, LaRen Pota Gunt, Lari Hila, Kari Kasten, Jenifa Madi, Lia MaKlanahan, Melisa Meril, Maekel R. Moris, Sali J. Odekik, Josua J. Peki, Jad E. Fers, Jan Pinboro, Janet Tomas, Pol VanDeneBeij, Marissa A. Widdson, Melisa Senteno

**Manejing Art Daerekt:** J. Skot Knudsen

**Art Daerekt:** Skot Van Kampen

**Prodaksen Maneja:** Jein An Pita

**Senia Disaena:** C. Kimbol Bot, Tomas S. Jaeld, Kolin Hinkli, Erik P. Jonsen, Skot M. Mui

**Disaen mo Prodaksen Staf:** Kolet Nebeka Aune, Hawod G. Braon, Juli Bedat, Rejinol J. Kristensen, Kim Fenstamaka, Katlin Hawod, Denis Kebi, Jini J. Nilson, Tae Pilja

**Pripres:** Jef L. Martin

**Printing Daerekt:** Kreg K. Sejwik

**Distribusen Daerekt:** Ivan Larsen

Blong kasem kop blong magasin mo praeas otsaod long Yunaeted Stet mo Kanada, kontaktem lokol Jos distribusen senta o wod o branj lida blong yu.

**Sendem ol smol storian we yu raetem mo ol  
 kwestin i go long Liahona, Room 2420, 50 E. North  
 Temple St., Salt Lake City, UT 84100-0024, USA;  
 o imel long: liahona@ldschurch.org.**

Liahona (long Buk blong Momon hem i minim "kampas" o "soem rod") oli publism long lanwis blong Albania, Armenia, Bulgaria, Kambodia, Sebuano, Jaena, Kroesia, Tsek, Danis, Datj, Ingilis, Estonia, Fiji, Finis, Franis, Jemani, Grik, Hungaria, Aeslan, Indonesia, Italia, Japan, Kiribati, Koria, Latvia, Lithuania, Malagasi, Marsil, Mongolia, Norwe, Polan, Portugal, Romania, Rasia, Samoa, Slovenia, Spen, Swiden, Talalog, Tahiti, Tai, Tonga, Ukre, Urdu, Vanuatu mo Vietnam. (Namba blong magasin long wan yi i jenis folem o lanwis.)

© 2011 i kam long Intellectual Reserve, Inc. Oli holem evri raet. Oli printim long Yunaeted Stet blong Amerika.


Stori mo pikja long Liahona oli save mekem kop blong yusum long ol samting blong no winim mane, long jos o long hom. Sam long ol pikja ia bae oli no save mekem kop blong olgeta sapos i gat tabu long hem long kredit laen wetem artwok. Ol kwestin blong kopri rael oli sud raetem i go long Intellectual Property Office, 50 E. North Temple St., Salt Lake City, UT 84150, USA; imel: cor-intellectualproperty@ldschurch.org .

### For Readers in the United States and Canada:

October 2011 Vol. 5 No. 2, LIAHONA (USPS 311-480) Bislama (ISSN 1938-6346) is published two times a year (April and October) by The Church of Jesus Christ of Latter-day Saints, 50 E. North Temple St., Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send address changes to Salt Lake Distribution Center, Church Magazines, PO Box 26368, Salt Lake City, UT 84126-0368.

I Kam long Presiden  
Tomas S. Monson



# Ol Gudfala Promes

## BLONG BUK BLONG MOMON

**P**lante yia i pas, mi bin stanap long saed blong bed blong wan yangfala papa taem laef blong hem i stap bitwin laef mo ded. Waef blong hem we i bin harem nogud mo tufala pikinini blong tufala i bin stanap kolosap. Papa ia i bin tekem han blong mi, mo wetem wan fes we i harem nogud, i talem: “Bisop, mi save se bae mi ded i no longtaem. Talem long mi wanem bae i happen long spirit blong mi long taem we bae mi ded.”

Mi mekem wan prea long hat blong mi blong heven i lidim mi, mo mi luk se long saed blong bed blong hem, i gat wan kopi blong tripol kombinesen. Mi tekem buk mo tanem ol pej. Wantae nomo, mi luksave wanem mi gat long han blong mi, mo mi no hadwok from; nao mi stop long namba 40 japta blong Alma long Buk blong Momon. Mi ridim ol toktok ia nao long hem:

“Luk, wan enjel i bin talem long mi, se ol spirit blong evri man, taem we oli bin aot long bodi ia blong wol, . . . bae oli gobak long God we i bin givim laef long olgeta.

“. . . Ol spirit blong olgeta we oli stret bae oli kasem wan ples blong glad, we oli singaotem paradaes, wan ples blong spel, wan ples blong pis, long ples ia bae oli spel long ol trabol mo ol wari, mo ol harem nogud blong olgeta” (Alma 40:11–12).

Taem mi bin gohed blong ridim abaot Laef Bakegen long Ded, fes blong yang man ia i saen mo wan smael i kamaot. Mi endem visit blong mi, mo mi talem tata long gud famle ia.

Afta, mi bin luk waef mo ol pikinini long fenerol. Mi tingtingbak long naet ia taem wan yang man i bin askem trutok mo, aot long Buk blong Momon, i bin

harem ansa long kwestin blong hem.

Aot long Buk blong Momon, i gat ol nara gudfala promes i stap, we oli ol promes blong pis, fridom, mo blesing sapos “sapos bae oli wok nomo blong God blong graon ia, we i Jisas Kraes” (Ita 2:12).

Aot long ol pej blong buk ia, i gat promes blong “wan ples blong hapi we i no gat en” i go long “olgeta we oli holem ol komanmen blong God. From luk, Lod i blesem olgeta long evri samting, ol samting blong wol tugeta wetem blong spirit” (Mosaea 2:41).

Aot long ol pej blong buk ia, i gat promes blong “glad . . . we oli no save harem save” blong olgeta we oli kam wan “tul long han blong God” blong stap sevem ol boe mo gel blong Hem we oli impoten tumas (Alma 28:8; 29:9).

Aot long ol pej blong buk ia, i gat promes se Isrel we i stap olbaot bae i kambak tugeta wamples—wan wok we yumi stap long hem tru long bigfala misinari wok raon long wol (luk long 3 Nifae 16; 21–22).

Aot long ol pej blong buk ia, i gat promes se taem yumi prea long Papa, long tabu nem blong Jisas Kraes, famle blong yumi bae i kasem blesing (luk long 3 Nifae 18:21).

Sapos yu stadi long ol pej blong buk ia, promes ia blong profet i kamtru, we i talem se “insaed long laef blong yu mo long hom blong yu, bae i gat wan moa mak blong Spirit blong Lod, wan tingting we i kam strong moa blong wokbaot wetem fasin blong stap obe, long ol komanmen blong Hem, mo wan moa strong testimoni se i tru we Pikinini blong God i stap laef.”<sup>1</sup>

Mo aot long ol pej blong buk ia, i gat promes se tru long prea, strong tingting, mo fet long Kraes, bae yumi



save kam blong save trutok blong ol promes ia “tru long paoa blong Tabu Spirit” (luk long Moronae 10:4–5).

Wetem ol nara profet blong lata-dei, mi testifae se i tru se buk ia “i moa stret long eni narafala buk long wol,”<sup>2</sup> mo hem i Buk blong Momon, wan nara testeman blong Jisas Kraes. Mesej blong hem i go raon long wol mo i mekem ol man we oli stap ridim, oli kam blong kasem wan save blong trutok. Hem i testemoni blong mi se Buk blong Momon i jenism laef blong man. Bae wanwan long yumi bae i ridim, mo ridim bakegen. Mo bambae wetem glad hat, yumi serem testemoni blong yumi abaat ol gudfala promes blong hem wetem evri pikinini blong God. ■

#### OL NOT

1. Gordon B. Hinckley, “A Testimony Vibrant and True,” *Liahona*, Ogos 2005, 6.
2. *Teachings of Presidents of the Church: Joseph Smith* (2007), 64.

#### YUSUM MESEJ IA BLONG TIJ

Insaed long skripja “yumi faenem ol prinsipol blong trutok we bae i stretem evri tingting we i konfius mo evri problem, mo evri trabol we bae i kam fesem famle blong man” (*Teaching, No Greater Call* [1999], 51). Taem yu stap serem mesej blong Presiden Monson wetem famle ia, invaetem olgeta blong lisin long ol “gudfala promes” we hem i faenem insaed long Buk blong Momon. Yu save serem wan promes insaed long Buk blong Momon we i bin gat mining long yu.


# Profet Josef Smit:

TRANSLETA BLONG  
BUK BLONG MOMON

Buk blong Momon i wan spesel buk blong skripja mo i no gat wan narawan moa we i semmak. Nomata ol profet blong bifo oli bin raetem buk ia, hem i no kam long yumi long semfala wei we Baebol i kam long yumi. Baebol, oli bin raetemdaon long ol longfala pepa we oli rolem long taem blong Olfala Wol; mo oli raetem olsem ol seperet buk mo ol tija blong loa oli bin raetem kopi blong olgeta blong plante handred ia. Afta nomo long fo handred yia afta Jisas Kraes, oli bin putum tugeta ol seperet buk ia, mo mekem i kam wan buk nomo we yumi stap singaotem Tabu Baebol.

Be, Buk blong Momon, ol profet blong bifo oli bin raetemdaon olgeta long taem blong Niufala Wol, mo oli raetemdaon long ol pej we oli wokem long aean, mo wan profet—Momon (we i givim nem blong hem long taetol)—i bin raetemsot long namba faef handred yia A.K. mo mekem i kam wan rekod nomo we hem i bin raetemdaon long ol pej we oli wokem long gol. Boe blong hem, Moronae, i bin berem buk ia afta, mo i bin stap olsem kasem yia 1827, taem we Moronae, olsem wan man we i laef bakegen long ded, i bin givim buk ia long wan yangfala man we nem blong hem i Josef Smit.

Wanem i kam afta i stori blong olsem wanem Josef i bin kasem, transletem, mo pablism histri ia, we naoia taetol blong hem i, Buk blong Momon: Wan Narafala Testeman blong Jisas Kraes. Sevya Hemwan i bin testifae se buk ia i tru (luk long D&C 17:6).





1. Long yia 1820, wan boe we i gat 14 yia, we nem blong hem, Josef Smit, i bin stap kolosap long Palmaera, Niu Yok. Nomata hem i yang, hem i bin wari long olsem wanem nao God i luk hem, mo hem i bin lus wetem fulap samting we ol defdefren Kristin religijn i mekem blong winim tingting blong ol man bitim ol narafala grup bakegen. Hem i bin gat strong tingting blong stadi long Baebol, nao Josef i bin mekem tingting blong i lukao-tem waes tingting, mo hem i askem God, we "i stap givim long ol man long gladhat blong hem" (Jemes 1:5). Hem i bin go long ol bus blong ol tri kolosap long hom blong hem blong prea.




2. Taem Josef i bin nildaon mo prea, wan bigfala laet we i saen antap i kam daon, stret antap long hed blong hem. Insaed long laet ia, hem i bin luk tu Man. Papa we i stap long Heven i bin toktok mo talem, "Hem, Hem i Pikinini blong Mi we Mi Lavem Hem Tumas. Lisin gud long Hem!" Testemoni blong Josef Smit, 32667 852, pej 2. Lod i bin talem long Josef blong hem i no joenem eniwan long ol jos ia from se i no gat wan long olgeta i tru, be hem i bin promesem se ful Gospel, bae hem i kam blong save long hem samtaem long fiuja.<sup>1</sup>



3. Tri yia i pas, mo long ol tri yia ia, Josef Smit i bin serem eksperiens blong hem wetem ol narafala man—mo oli bin mekem nogud long hem from hemia. Hem i talem se nomata we man i no laekem hem mo oli bin stap mekem nogud long hem from we hem i bin talem se hem i bin luk wan visen, yet, hemia i bin tru; mo . . . insaed long hat blong hem, hem i stap talem ol toktok ia: "From wanem yufala i tok agensem mi from we mi stap talem trutok? I tru, mi bin luk wan visen; mo huia mi blong mi stanap agensem God, o, from wanem wol i tingting blong mekem mi tanem baksaed long wanem we mi bin luk? From we mi bin luk wan visen; mi bin save hemia, mo mi bin save se God i bin save, mo mi no save tanem baksaed blong mi long hemia" (luk long Joseph Smith—History 1:25).

**S**tat long yia 1830 i kam, plante milian pipol oli bin Sridim Buk blong Momon mo oli bin joenem Jos blong Jisas Kraes blong Ol Lata-dei Sent from witnes blong Buk

blong Momon abaot Sevya. Buk ia, i wan pruf we Josef Smit i bin wan profet blong God mo Sevya i stap lidim Jos blong Hem tedei. Plante milian pipol oli bin testem



4. Long 21 Septemba 1823, Josef i bin stap prea taem laet i bin fulumap bedrum blong hem, mo wan enjel, we nem blong hem Moronae, i bin kamaot long hem. Moronae i bin talem long Josef abaot buk ia we ol profet blong bifo oli bin raetemdaon. Histri ia, we oli raetem long ol pej we oli wokem long gol, oli bin berem long wan hil we i stap kolosap. Josef i kasem toksave se bae hem i mas transletem histri ia.



5. Nao laswan, long 22 Septemba 1827, Josef i bin kasem buk ia, i tekemaot buk ia insaed long wan ston bokis we oli bin berem andanit long wan bigfala ston long wan hil kolosap long Palmaera, Niu Yok.



6. Olsem we i wan nomol praktis long ol rurol eria long taem ia, Josef Smit i no bin skul gud. Blong helpem hem wetem translesen, God i bin givim hem wan tul blong bifo blong transletem ol toktok, we oli singaotem Yurim mo Tumim. Hem i bin gat blesing tu blong gat help blong ol man we oli save raetem wanem we hem i talemaot taem hem i bin stap transletem buk ia. Long olgeta we oli bin stap raet blong hem, i gat waef blong hem, Emma; Matin Haris, wan gudfala fama; mo Oliva Kaodri, wan skultija. Ful wok blong translesen ia i bin finis long tri manis taem, afta we Oliva i bin stat blong stap raet blong hem.

Emma i bin tokbaot se i olsem wanem blong wok olsem man blong raet blong Josef: "I no gat man i save talem ol toktok blong wanem i stap long buk ia, be nomo, sapos hem i kasem long God; from we taem mi bin stap raet blong Josef, bae hem i talem

mo faenem se promes blong Moronae i go long evri ones man we i lukaotem trutok, i tru; mo sapos yumi askem wetem wan hat we i tru, wetem wan

tru tingting, mo wetem fet long Kraes, bae Hem i soe-maot trutok long yumi, tru long paoa blong Tabu Spirit" (Moronae 10:4).



ol toktok long mi, aoa afta aoa; mo taem mifala i kambak afta long kakae, o afta we mitufala i stop smol taem, bae hem i statem stret long ples we mitufala i bin stop long hem, mo hem i no lukluk long buk o wet se bae mi ridim smol pat long hem."<sup>2</sup>

Josef i bin eksplenem mining blong taem ia we Buk blong Momon i kam. "Tru long paoa blong God, mi bin transletem Buk blong Momon aot long lanwis blong ol saen, we i wan save we i bin lus long wol ia; mo long taem ia, mi bin stap miwan, mi, wan yangfala we i no skul gud, blong faet, wetem wan niu revelesen, agensem waes tingting blong wol mo ol fulap save we i bin lus blong eit handred yia."<sup>3</sup>

7. Long ol 18 manis we hem i bin gat buk ia, Josef i bin wan man ia nomo blong luk o holem buk ia. Trifala man—Oliva Kaodri, Deved Witma, mo Matin Haris—i bin testifae se enjel Moronae i bin soemaot ol pej we oli wokem long gol i go long olgeta tri, mo oli bin save se buk ia, "oli bin transletem tru long presen mo paoa blong God, from we voes blong Hem i bin talemaot long yumi." Eit narafala man tu i bin testifae, se oli bin luk mo oli bin holem ol pej we oli wokem long gol.<sup>4</sup>


8. Long Ogis 1829, Josef i bin saenem wan kontrak wetem wan man blong publisim ol buk, Egbet B. Grandin blong Palmaera, Niu Yok, blong hem i printim buk ia. Matin Haris i putum fam blong hem olsem sekiuriti blong pem mane blong printim buk, mo long 26 Maj 1830, Buk blong Momon i bin stap blong man i pem.

9. Long 6 Epril 1830, samples 60 pipol i bin kam tugeta long wan wud haos long Feyet, Niu Yok. Long ples ia, olsem we Lod Jisas Kraes i bin lidim hem, Josef Smit i bin oganaesem Jos blong Sevy, i bin putumbak Jos olsem we i bin stap bifo, wetem ol aposol mo ol profet we oli bin lidim, mo olgeta ia oli kasem raet blong toktok long bihaf blong God. Revelesen we i bin kam afta long Josef Smit i bin givim nem ia long Jos ia: Jos blong Jisas Kraes blong Ol Lata-dei Sent (luk long D&C 115:4). ■

#### OL NOT

1. Joseph Smith, long *History of the Church*, 4:536.
2. Intaviu wetem Ema Smit we Josef Smit III i bin mekem, Feb. 1879 *Saints' Herald*, 1 Okt. 1879, 290.
3. *Teachings of Presidents of the Church: Joseph Smith* (2007), 60.
4. Luk long "Testemoni blong Olgeta Tri Witnes" mo "Testemoni blong Olgeta Eit Witnes," long fas toktok blong Buk blong Momon.





I Kam long Elda  
Rasel M. Nelson

Blong Kworom blong  
Olgeta Twelef Aposol

## WANEM NAO BUK BLONG MOMON I STAP TIJIM YUMI ABAOT LAV BLONG

# GOD

*Sam long ol gudgudfala eksapol blong lav blong Lod,  
oli raetemdaon i stap long Buk blong Momon.*

Pante Kristin man oli save gud ol fasin blong Jisas Kraes olsem we Baebol i stap tokbaot. Oli stap sapraes long lav we Hem i bin soem long olgeta we oli pua, olgeta we oli sik, olgeta we oli daonem olgeta. Olgeta we oli stap talem se oli ol disaepol blong Hem, oli traem tu blong mekem semmak folem eksapol blong Hem mo blong stap folem strong toktok blong Aposol we Hem i lavem tumas we i talem se: “Ol fren. Yumi mas lavlavem yumi, from we fasin ya blong lavem man, hem i kamaot long God. Olgeta we oli stap lavem narafala man, oli pikinini blong God, mo oli save God . . . from we God i stamba blong fasin ya blong lavem man” (Fas Jon 4:7–8).

Tingting ia, i kam klia insaed long Buk blong Momon. Hem i tokbaot *olsem wanem* wan i bon long God mo *olsem wanem* wan i kasem paoa blong lavem man olsem we God i lavem man. Hem i soem trifala stamba principol we i tekem paoa blong lav blong God insaed long laef blong yumi.

Faswan, Buk blong Momon i tijim se blong stap yusum fet long Kraes mo blong stap mekem wan *kavenan* wetem Hem blong stap kipim ol komanmen blong Hem i wan ki blong bon bakegen long saed blong spirit. Long ol pipol blong taem blong Buk blong Momon we oli bin mekem wan kavenan olsem, King Benjamin i talem long olgeta: “Mo nao, from kavenan ia we yufala i bin mekem, bae oli singaotem yufala ol pikinini blong Kraes, ol boe blong hem, mo ol gel blong hem; from luk, long dei ia, hem i bin bonem yufala long saed blong spirit; from yufala i talem se ol hat blong yufala i bin jenis tru long fet long nem blong hem; taswe, yufala i bon long hem mo bin kam ol boe blong hem mo ol gel blong hem” (Mosaea 5:7).

Nambatu, Sevya Hemwan i tijim se paoa blong kam moa olsem Hem i kam tru long fasin blong kasem *ol odinens* blong gospel: “Nao hemia i komanmen: Sakem sin, yufala evriwan long evri en blong wol, mo kam long mi mo kasem baptaes long nem blong mi,

blong yufala i save kam klin taem we yufala i kasem Tabu Spirit, blong yufala i save stanap mo no gat mak long fored blong mi long las dei” (3 Nifae 27:20).

Nambatri, Hem i askem strong long yumi blong *folem eksapol blong Hem*: “Taswe, yufala i mas kam ol wanem kaen man?” Hem i askem wetem strong tingting. Ansa blong Hem i: “I tru mi talem long yufala, i olsem mi stap” (3 Nifae 27:27). I tru. Hem i wantem yumi blong kam moa olsem Hem.

Sam long ol gudgudfala eksapol blong

lav blong Hem, oli raetemdaon insaed long Buk blong Momon. Ol eksapol ia, yumi save yusum long laef blong yumi taem yumi traehad blong kam moa olsem Lod.

Hem i bin lav we Hem i bin gat long Lihae mo famle blong Lihae—mo lav we olgeta oli bin gat long Hem—we i mekem se Lihae mo famle blong Hem i kasem Ol Amerika, graon blong promes blong olgeta, ples ia we oli bin kam antap.<sup>1</sup>

Hem i bin lav we God i gat long yumi we i bin mekem se Hem, plante handred yia i pas finis, i bin givim oda long ol profet blong ol man blong Nifae blong raetemdaon wan tabu histri blong ol pipol blong olgeta. Ol lesen we oli kamaot long histri ia oli tokbaot fasin we Jisas i sevem yumi mo fasin blong yumi kam olsem god. Ol tijing ia oli stap naoia insaed long Buk blong Momon. Tabu buk ia i stap blong yu save holem, i olsem wan pruf blong lav blong God long evri pikinini blong Hem raon long wol.<sup>2</sup>

Hem i lav we Kraes i gat long ol “narafala sipsip” we i mekem Hem i kam long Niufala Wol.<sup>3</sup> Insaed long Buk blong Momon, yumi lanem se ol bigfala disasta mo tri dei blong tudak i bin hapen long Niufala Wol afta long ded blong Lod long Olfala Wol. Afta, Lod we i gat glori mo i laef bakegen long ded, i bin stap long heven mo i kamdaon mo i bin tij long medel blong ol pipol blong Niufala Wol.

## WAN PROFET I TESTIFAE



“Buk blong Momon i bin kam tru long presen mo paoa blong God. Hem i toktok olsem we wan voes we i kamaot long das i toktok, i stap testifae abaot Pikinini blong God. Hem i tokbaot taem we Hem i bon, ministri blong hem, taem we Hem i bin krusifae, mo taem we Hem i laef bakegen long ded, mo taem we Hem i bin kamaot long olgeta we oli bin stret mo gud long graon ia, Baontiful (Plante) long graon blong Amerika.

“Hem i wan strong samting we yu save holem, we yu save ridim, we yu save testem. Hem i tekem insaed long ol pej blong hem, wan promes, blong ples ia we hem i kamaot long hem. Plante milian oli bin traem mo oli bin faenem se hem i wan histri we i tru mo i tabu.”

President Gordon B. Hinckley (1910–2008), “The Great Things Which God Has Revealed,” *Liahona*, Mei 2005, 81–82.

## BLONG SAVE HEM I BLONG SAVE LAV

Mi wan niu memba blong Jos blong Jisas Kraes blong Ol Lata-dei Sent, mo long mi, Buk blong Momon i no wan buk nating nomo. Hem i wan strong pruf se Papa long Heven i lavem yumi. Hem i wan pruf se i bin gat ol Sent bifo we oli bin lavem yumi mo oli bin wantem yumi blong gobak long hom. Hem i wan pruf se plan blong God blong stap glad i stap, mo i stret evriwan.

Blong save se buk ia i tru, i blong save se Papa long Heven mo Pikinini blong Hem, Tufala i stap laef. Hem i blong save se laef i naes tumas mo i no save finis. Hem i blong save se sapos yu gohed blong traem stap gud mo stap sakem sin taem yu foldaon, nao, oltaem bae yu kasem fogivnes. Hem i blong save tru mining blong famle. Hem i blong save se bae yu neva lusum wan we yu lavem taem bae hem i stap wet long yu. Hem i blong save wanem oli ol blesing blong Papa long Heven. Hem i blong save pis ia, we taem hariken i kam long rod blong yu, yu save fesem from i blong gud blong yu. Hem i blong save se Tabu Spirit i kompanion blong yu oltaem. I tru, i blong save lav long eni kaen wei we i save kamaot long hem.

Ema Adesania, Irilan



"Mi mi laet mo laef blong wol," Hem i bin talem long olgeta, "mo mi bin dring aot long kap we i konkon we Papa i bin givim long mi, mo mi bin leftemap nem blong Papa taem we mi putum long mi ol sin blong wol" (3 Nifae 11:11).

Afta, Hem i bin givim bigfala eksperiens we eniwan i save gat wetem Hem. Hem i bin invaetem olgeta blong oli filim soa long saed blong bodi blong Hem, mo tajem ol mak blong nil long han mo leg blong Hem, blong oli save stret se Hem i "God blong Isrel, mo God blong ful wol, mo oli bin kilim ded [hem] from ol sin blong wol" (3 Nifae 11:14).

Afta, Jisas i bin givim ol disaepol blong Hem atoriti ia blong mekem baptaes, blong givim presen we i Tabu Spirit, mo blong blesem mo pasem sakramen. Hem i bin givim olgeta paoa blong stanemap Jos blong Hem long medel blong olgeta, mo twelef disaepol i lidim.

Hem i bin givim long olgeta sam long ol stamba tijing we Hem i bin givim long ol disaepol blong Hem long Olfala Wol. Hem i bin mekem ol sikman blong olgeta oli kam gud bakegen. Hem i bin nildaon mo i bin prea long Papa wetem ol toktok we oli gat paoa mo oli tabu tumas, we oli no bin save raetemdaon olgeta. Prea blong Hem i bin gat paoa tumas we olgeta we oli bin harem hem oli bin gat fulap glad. From Hem i bin glad tumas long lav blong Hem long olgeta mo from fet blong olgeta long Hem, nao Jisas i bin krae. Hem i bin talem profesi blong ol wok blong God we bae oli kam yet long plante handred ia we i stap kam i go kasem taem blong Seken Kaming blong Hem.<sup>4</sup>

Afta, Hem i bin askem blong oli tekem ol pikinini blong olgeta i go long Hem.

"Mo hem i bin tekem ol smol pikinini blong olgeta wan afta narawan, mo i bin blesem olgeta, mo i bin prea long Papa from olgeta.

*Sevyia Hemwan i  
stap tijim se paoa  
blong kam moa  
olsem Hem i kam  
tru long fasin  
blong kasem ol  
odinens blong  
gospel.*

*Afta, Hem i bin askem blong oli tekem ol pikinini blong olgeta i go long Hem. “Mo hem i bin tekem ol smol pikinini blong olgeta wan afta narawan, mo i bin blesem olgeta, mo i bin prea long Papa from olgeta.”*

“Mo taem we hem i bin mekem samting ia, hem i bin krae bakegen;

“Mo hem i bin toktok long grup blong pipol ia, mo i bin talem long olgeta: Luk ol smol wan blong yufala.

“Mo taem we oli stap lukluk blong lukim oli bin sakem ol ae blong olgeta i go long heven, mo oli bin lukim ol heven i open, mo oli bin luk ol enjel i stap kamdaon aot long heven olsem we i stap long medel blong faea; mo oli bin kam daon mo oli bin raonem ol smol wan ia, . . . mo ol enjel i bin givhan long olgeta” (3 Nifae 17:21–24).

Lav blong God i stret evriwan mo i gat paoa olsem nao, olsem we Buk blong Momon i talemaot.

Long ol lata-dei ia, yumi we yumi gat jannis blong gat Buk blong Momon, blong stap olsem ol memba blong Jos blong Lod, blong gat gospel blong Hem, mo blong kipim ol komanmen blong Hem, yumi save gud abaot lav blong God we i no gat en. Yumi save olsem wanem blong mekem lav blong Hem i kam olsem lav we bae yumi gat long nara man. Taem yumi kam ol tru disaepol blong Hem, yumi kasem paoa blong lavem man olsem we Hem i stap lavem man. Taem

yumi stap kipim ol komanmen blong Hem, yumi kam moa olsem Hem. Yumi mekem moa man i kam insaed long sekol blong lav blong yumi taem yumi go aot long ol pipol blong evri kantri, famle, mo lanwis.

Wetem bigbigfala tangkyu from gudfala eksampol blong laef blong Hem, yumi save mekem skripja ia i kam olsem standet o flag blong yumi: “From samting ia, ol brata blong mi we mi lavem tumas, prea long Papa wetem evri paoa blong hat, blong yufala i save fulap wetem lav ia, we hem i bin givim long olgeta we oli ol tru man blong folem Pikinini blong hem, Jisas Kraes; blong yufala i save kam ol boe blong God; blong taem we bae hem i kamaot bae yumi stap olsem hem, from bae yumi lukim hem olsem we hem i stap; blong yumi save gat hop ia; blong yumi save kam klin olsem we hem i klin” (Moronae 7:48).<sup>5</sup> ■

#### OL NOT

1. Luk long 1 Nifae 17:35–44; Mosaea 7:20; Alma 9:9–11; 3 Nifae 5:20–22.
2. Luk long taetol pej blong Buk blong Momon; 1 Nifae 13:35–41; 2 Nifae 33:4; Mosaea 1:2–7; Momon 8:13–41.
3. Luk long Jon 10:16; 3 Nifae 15:11–24.
4. Luk long 3 Nifae 11–14; 18–20.
5. Komperem Fas Jon 3:1–3.

## BLONG STAP LUKESAVE PAOA BLONG LAV BLONG HEM

Taem mi joenem Jos long taem blong fas yia blong mi long hae skul, mi bin filim gud abaot ol jenis we mi bin stap mekem long laefstael blong mi, mo mi bin luk hamas gud nao gospel i bin stap mekem long laef blong mi. Be, i no longtaem afta, mi bin filim se laef blong mi bifo i bin stap blokem progres we mi save mekem. Olsem wanem nao Papa long Heven i save yusum mi blong helpem Hem blong bildim kingdom blong Hem taem mi bin mekem ol nogud joes bifo?

Nao wan dei, mi bin openem Buk blong Momon blong mi long las pej. Mi bin ridim ol las toktok blong Moronae: “Yes, kam long Kraes, mo stap stret gud long hem, . . . mo sapos bae yufala i tanem baksaed blong yufala bakegen long evri fasin we i no olsem blong god, mo lavem God wetem evri strong blong yufala, tingting mo paoa, afta gladhat blong hem i naf blong yufala, blong tru long gladhat blong hem, yufala i save stap stret gud long Kraes; mo sapos tru long gladhat blong God yufala i stret gud long Kraes, yufala i no save tanem baksaed long paoa blong God long eni wei” (Moronae 10:32). Ae blong mi i nomo muvmuv mo lukluk ol toktok ia nomo. Mi bin filim Spirit i talem long mi se ol toktok ia oli tru. Mi bin luksave se mi bin stap stopem paoa blong God taem mi bin stap tingting se bae Hem i no save yusum mi long wan wei we Hem i luk se i stret.


Mi bin disaed se stat long taem ia i go, bambae mi no save “tanem baksaed long paoa blong God” be bae mi akseptem laef blong mi blong bifo, mo bae mi luk fored i go long fiuja laef blong mi. Moa mi stap lukluk nomo long fiuja blong mi be i no laef blong mi bifo, mo stap trastem gladhat blong Jisas Kraes we bae i mekem mi klin, moa mi bin filim lav we Sevya i gat long mi mo mi bin hapi moa long miwan.

Kristi Piti, Washington, YSA




# Stori BLONG BUK BLONG MOMON

Wanem i hapan in-saed long Buk blong Momon? Yusum ol pikja ia blong lanem abaot ol profet mo ol stori blong gudfala buk blong ol skripja ia.




1



2



3



4

Buk blong Momon i stat wetem wan profet we nem blong hem i Lihae. Hem i bin givim woning long ol nogud pipol long Jerusalem blong oli sakem sin be ol pipol oli no bin lisin long hem. Lod i bin taalem long Lihae blong hem i tekem famle blong hem, hemia waef blong hem Saraea, mo ol boe blong tufala—Leman mo Lemyul, Sam mo Nifae—oli go long ples we i no gat man long hem. (Luk long 1 Nifae 1–2.)

Lihae i bin sendembak ol boe blong hem oli gobak tekem ol skripja we oli bin raetem long ol buk we oli wokem long bras. Olgeta buk ia, oli bin gat histri blong ol bubu blong hem mo ol nara samting we Lod i bin taalem long olgeta blong oli raetem. Lihae mo Nifae oli bin lukaot gud long ol buk ia. Mo tu, oli bin raetem, long ol buk we oli wokem long aean, wanem i bin happen long famle blong olgeta. (Luk long 1 Nifae 3–5.)

Lod i bin givim wan kampas long Lihae, we oli singaotem Liahona, blong lidim famle blong hem i go tru long ples we i no gat man long hem i go kasem graon blong promes. (Luk long 1 Nifae 16.)


Lod i bin taalem long Nifae blong bildim wan bot blong tekem famle blong Lihae i go kasem graon blong promes. Nifae i bin obei long papa blong hem mo long Lod, be Leman mo Lemyul, tufala i no bin lisin. (Luk long 1 Nifae 17.)

*Lihae mo famle blong hem i bin sel i go long graon blong promes long bot we oli bin bildim. (Luk long 1 Nifae 18.)*




5

*Leman mo Lemyul, tufala i bin gohed blong no stap obei long papa blong tufala mo long Lod. Laen blong tufala, oli save olgeta olsem ol man blong Leman. Nifae i bin gohed blong obei long papa blong hem mo long Lod. Laen blong hem, oli singaotem ol man blong Nifae. (Luk long 2 Nifae 4–5.)*




6

*Afta we Lihae mo Nifae i bin ded, ol nara pipol, olsem brata blong Nifae, Jekob, i bin gat wok blong raetem ol impoten tijing mo samting we i stap happen i go long ol buk ia. (Luk long Jekob 1.)*




7

*Inos i bin prea blong kasem fogivnes from ol sin blong hem, mo Lod i bin fogivim hem. (Luk long Inos 1.)*




8




9

*King Benjamin i bin bildim wan taoa blong tijim gospel long ol pipol blong hem. (Luk long Mosaea 2–6.)*



10

*Wan nogud king, we nem blong hem Noa, i bin me-kem se bae oli kilim ded Abinadae. Be ol tijim blong Abinadae i bin jenism laef blong wan pris blong Noa; nem blong hem Alma. (Luk long Mosaea 11–17.)*



11


*Alma i bin ronwe long haos blong King Noa, i bin tijim gospel long ol narafala pipol, mo i bin baptaesem olgeta. (Luk long Mosaea 18.)*



12

*Boe blong Alma, Yangfala Alma i no bin stap obei. Hem mo ol fren blong hem, ol boe blong Mosaea, oli bin nogud. Afta, wan enjel i bin talem long olgeta blong oli sakem sin. Alma mo ol boe blong Mosaea oli bin sakem sin mo oli bin spendem ful laef blong olgeta blong stap pri-jim gospel. (Luk long Mosaea 27–28.)*

*Boe blong Mosaea, Amon, i bin jenism laef blong plante man blong Leman afta we Amon i bin difendem ol grup blong animol blong King Lamonae, mo i bin winim tras blong hem. (Luk long Alma 17–19.)*




13

*Kapten Moronae i bin rae-tem taetol blong fridom mo i bin faet blong difendem fridom blong ol pipol blong hem. (Luk long Alma 46, 48.)*




14

*Hileman i bin lidim wan ami blong 2000 stret mo gud yang man. (Luk long Alma 53, 56–58.)*




15


*Wan profet blong ol man blong Leman, we nem blong hem i Samuel, i bin profesa se Jisas Kraes bae i bon i no longtaem. (Luk long Hileman 13–16.)*




16




19



20



21



22


*Wan boe blong 10 yia, we nem blong hem i Momon, i bin jusum blong raet long ol buk ia taem hem i bin kam bigwan. Taem hem i gat 24 yia, hem i stat blong putum tugeta ol stori we oli moa impoten aot long evri rekod, i go long wan buk we oli wokem long aean. (Luk long Momon 1.)*

*Bifo Momon i bin ded, hem i bin givim ol buk ia long boe blong hem, Moronae. Moronae i bin wan jeneral long ami. Hem i las man blong Nifae we i bin laef long wan bigfala faet bitwin ol man blong Leman mo ol man blong Nifae. (Luk long Momon 6, 8.)*

*Bifo Moronae i bin ded, hem i bin berem ol buk ia long wan ples we oli singaotem Kumora. Samples 1400 yia afta we Moronae i bin berem ol buk ia, wan boe we i gat 14 yia, we nem blong hem i Josef Smit, i bin prea blong save wijwan jos i bin stretwan. (Luk long Joseph Smith—History 1:5–16.)*

*Papa long Heven mo Jisas Kraes i bin visitim Josef Smit mo Tufala i bin talem long hem se i no gat wan jos i bin tru mo i bin fulwan. Josef bae i help blong putumbak tru Jos blong Jisas Kraes. (Luk long Joseph Smith—History 1:17–20.)*


**Longwe long Betlehem, Jisas Kraes i bin bon. Hem i bin tijim gospel blong Hem, i bin mekem ol pipol oli kam gud bakegen mo i bin blesem olgeta, mo i bin stanemap Jos blong Hem. Afta, Hem i bin ded long kros mo i bin laef bakegen long ded. (Luk long 3 Nifae 1, 8–10.)**




17

*Afta we Hem i laef ba-kegen long ded, Hem i bin visitim ol stret mo gud man blong Nifae mo Leman. Hem i bin tijim gospel blong Hem long olgeta, mo i bin blesem olgeta, semmak olsem we Hem i bin mekem long graon raon long Jerusalem. (Luk long 3 Nifae 11–28.)*

18




24



23


**Moronaes i bin vitim Josef Smit mo i bin talem long hem abaot ol buk ia we hem i bin berem. Taem Josef Smit bae i kam bigwan, bae hem i go tekem ol buk ia, mo bae i transletem olgeta. (Luk long Joseph Smith—History 1:27–54.)**

**Taem Josef Smit i bin gat 21 yia, hem i bin go long Hil blong Kumora, mo i kasem ol buk ia long ples we Moronaes i bin berem olgeta. (Luk long Joseph Smith—History 1:59.)**




25

**Tru long paoa blong God, Josef Smit i bin transletem ol toktok we oli bin raetem insaed long ol buk ia. Hem i bin pabilisim translesen blong hem. Oli singaotem Buk blong Momon. (Luk long tae-tol pej mo fas toktok blong Buk blong Momon.) ■**



# TAEM LAEN BLONG BUK BLO



# NG MOMON



**7 ALMA<sub>1</sub>**  
Alma, i bon long medel blong ol pipol blong Senif, mo hem i kam wan long ol nogud pris blong King Noa. Oli bin kilimded profet Abinadæs afta we hem i bin askem King Noa blong sakem sin blong hem. Be Alma<sub>1</sub>, i bin bilivim ol tijing blong Abinadæs mo i bin ronwe wetem wan grup blong ol man we oli bin biliv, mo afta, i bin joenem ol man blong Nifae. (Luk long Mosaea 11; 17–18; 23–24.)

**8 ALMA<sub>2</sub> MO OL BOE BLONG MOSAEA<sub>2</sub>**  
Tæm oli bin ol yang man, Alma<sub>2</sub> mo ol boe blong King Mosaea<sub>2</sub> oli bin wok blong spolem gud Jos. Wan enjel i bin tok strong long olgeta, mo oli bin sakem sin blong olgeta. Alma<sub>2</sub> i bin kam wan lida we i stret mo gud. (Luk long Mosaea 27–29.) Ol boe blong Mosaea<sub>2</sub> oli kam ol misinari long ol man blong Leman. Afta long plante sakses, olgeta mo Alma<sub>2</sub> oli bin joen wan bakegen mo oli bin glad. (Luk long Alma 17–26.)

**9 OL STILMAN BLONG GRUP BLONG GADIANTON**  
Paoa blong sikret grup blong kilimed man i bin strong gud taem sosaeti i nogud; mo hem i no gat paoa nating taem sosaeti i bin stret mo gud. Taem i kasem samples long ol yia 350 A.K. oli bin putum sefti blong evri pipol long denja. (Luk long Hileman 2; 6; 4 Nifae 1:42–46.)

**10 JISAS KRAES**  
Afta long Laef Bakegen long Ded blong Hem long Jerusalem, Sevya i bin kamaot long ol Amerika, i bin tijim ol pipol, i bin tijim gospel blong Hem, mo i bin oganaesem Jos blong Hem. Blong 200 yia folem visit blong hem, ol pipol oli bin stap laef long pis. (Luk long 3 Nifae 11–28)

**11 OL MAN BLONG NIFAE OLI LUS EVRIWAN**  
Sloslo, rabis fasin i kambak, ol wo oli gohed, mo ol man blong Nifae oli bin lus evriwan long faet. Wan man nomo i laef, Moronae, mo hem i bin kipim histri blong ol man blong Nifae, mo afta, i bin berem histri ia bifo hem i ded. (Luk long 4 Nifae 1:24–28; Momon 8:1–8; Moronae 10.)



# HUNAO IRAETEM

*Ol profet blong bifo, ol man blong rae tem histri, mo ol lida oli bin rae tem daon testemoni blong ol geta mo histri blong ol geta long ol buk we oli wokem long gol. Afta, Profet Josef Smit, tru long presen mo paoa blong God, i bin transletem sot stori blong ol geta orijinol buk ia.*

## Nem blong Oi Man we Oli Raet o Buk blong Oi Originol Histri blong Bifo

Nifae,<sup>1</sup> Jekob, Inos, Jerom, Omnae, mo ol narawan

Momon

Oi buk blong Leban we oli wokem long bras (luk long 1 Nifae 5:10–14)

Senif

Lihae (luk long 2 Nifae 1:1–4, 11; D&C 3, fas toktok blong seksten); Benjamin (luk long Omnae 1:12–23; Oi Toktok blong Momon 1:16–18; Mosaea 1–6); Mosaea<sub>2</sub> (luk long Omnae 1:23–25; Mosaea 6:3); Yangfala Alma, Oi Boe blong Mosaea, Hileman<sub>2</sub>, Pahoran, Kapten Moronae, Nifae<sub>3</sub>, Nifae<sub>4</sub>

Momon

Oi histri blong ol man blong Jared i stap long 24 pej, wetem ol raeting blong Ita (luk long Ita 1:1–5)

Moronae

## Oi Histri we Oli Stap long Oi Buk

Oi smol buk blong Nifae (ol histri long saed blong spirit; samples yia 600 B.K. i go kasem 130 B.K.)

Oi Toktok blong Momon (i joenem ol smol buk wetem sot histri blong bigfala histri we i bin stap long ol buk blong Nifae; luk long ol ves 1–18)

Oi bigfala buk blong Nifae (ol histri blong laef long wol ia mo histri blong religijn; samples long yia 130 B.K. i go kasem yia 321 A.K..)

Oi histri blong Momon (samples long yia 345 A.K. i go kasem 385 A.K.)

Buk blong Ita, ol histri blong ol man blong Jared we oli rae tem bak (samples long yia 2400 B.K. i go kasem yia 600 B.K.)

Oi histri blong Moronae (luk long Momon 9:30–37; samples long 385 A.K. i go kasem yia 421 A.K.)



# BUK BLONG MOMON?



Long naet blong 21 Septemba 1823, enjel Moronae i bin kamaot long yangfala Josef Smit mo i bin talem long hem abaot ol buk we oli wokem long gol, we bae oli transletem mo kam olsem Buk blong Momon. Fo yia afta, Josef i bin save tekem ol buk ia blong save transletem olgeta (luk long Joseph Smith—History 1:27–54).



**Ol Buk blong Gol we Enjel Moronae  
I Givim long Profet Josef Smit long  
22 Septemba 1827**

Ol Buk blong Momon  
(ol histri we Momon mo Moronae  
i putum tugeta mo raetemsot)



Pat we i lok (we oli no transletem)



Orijinol buk blong translesen, oli bin finisim long yia 1829, mo buk we oli printim i finis samtaem long yia 1829–1830, mo ol fas 5000 kopi blong Buk blong Momon, oli bin pablismi olgeta long yia 1830.


*Infomesen we i stap long jat ta, oli putum tugeta, mo ol infomesen i kamaot long jas toktok mo ol nara toktok we oli stap insaad long Buk blong Momon.*

**Buk blong Momon**

Taetol Pej\*  
1 Nifae  
2 Nifae  
Jekob  
Inos  
Jerom  
Omnae  
Ol Toktok blong Momon  
Mosaea  
Alma  
Hileman  
3 Nifae  
4 Nifae  
Momon  
Ita  
Moronae



\*Josef Smit i bin eksplenem, "Taetol pej blong Buk blong Momon i wan stret translesen, we i kamaot long las pej, long lef han saed blong buk ia, o ful buk ia" (*History of the Church*, 1:71).



# BUK BLONG MOMON: Wan Witnes long saed wetem Baebol

**B**long i go stret wetem loa blong Baebol se “i mas gat tu witnes no tri witnes blong mekem tok ya i stanap” (Se-ken Korin 13:1), tugeta buk ia, Buk blong Momon mo Baebol, tufala i testifae abaot Jisas Kraes mo tufala i stap tijim ol prinsipol blong gospel blong Hem. Elda Rasel M. Nelson blong Kworom blong Olgeta Twelef Apostol i bin tijim se “ol witnes we oli stap long skripja oli pruvum se tufala buk ia oli tru. Aedia ia, oli eksplenem longtaem finis taem wan profet i bin raetem se Buk blong Momon oli

bin ‘raetem samting ia from plan se [oli] save bilivim ol [Baebol]; mo sapos yufala i bilivim [Baebol] ia, bae yufala i bilivim [Buk blong Momon] tu’ [Momon 7:9]. Wanwan buk i tok-baot narawan. Wanwan buk i stap olsem wan pruf se God i stap laef mo i stap toktok long ol pikinini blong Hem tru long revelesen we i go long ol profet blong Hem.”<sup>1</sup>

Andanit ia, i gat wan lis blong ol stamba doktrin we oli tijim long Baebol we Buk blong Momon i stap olsem wan moa witnes blong hem.

## Plan we God I Gat long Yumi

*Baebol mo Buk blong  
Momon, tufala i tijim  
se God i Papa blong  
yumi long Heven.  
From hemia, Hem i  
bin mekem rere wan  
“plan blong fasin  
blong sevem man”  
(Alma 24:14) we tru  
long plan ia, bae  
Atonmen blong Jisas  
Kraes i sevem yumi.*

## Wan Papa we I Stap long Heven we I Gat Lav

Baebol: “From we yumi joen long God nomo, yumi gat laef, yumi stap wokbaot, mo yumi stap mekem evri samting. Mo i olsem we wan man blong yufala we i stap raetem singsing i talem finis se, ‘Yumi tu i pikinini blong hem’” (Ol Wok 17:28; luk tu long Ol Sam 82:6; Hibrus 12:9).

Buk blong Momon: “Mi save se [God] i lavem ol pikinini blong hem” (1 Nifae 11:17; luk tu long 1 Nifae 17:36).

## Ded mo Spirit Wol

Baebol: “Bodi blong yumi bambae i gobak long graon, mo laef ya we God i givim long yumi, bambae i gobak long hem bakegen” (Prija 12:7; luk tu long Fas Pita 3:19–20; 4:6).

Buk blong Momon: “Ol spirit blong evri man, sapos oli gud o nogud, bae oli gobak long God we i bin givim laef long olgeta” (Alma 40:11; luk tu long ol ves 12–14).

## Laef Bakegen long Ded

Baebol: “Nating we sik i spolem skin blong mi finis, be long bodi ya blong mi, bambae mi mi luk hem” (Job 19:26; luk tu long Esekiel 37:12; Fas Korin 6:14; 15:54).

Buk blong Momon: “Mi save se yufala i save we bae bodi blong mit mo bun blong yumi i mas kam roten mo ded; be, long ol bodi blong yumi bae yumi luk God” (2 Nifae 9:4; luk tu long 2 Nifae 9:12; Alma 11:43–45; 40:23).

**Oi Komanmen  
Oli Stap Olsem  
Wan Gaed**  
*Baebol i stap tijim  
se God i bin givim  
ol komanmen mo  
bae i blesem yumi  
taem yumi obei. Ol  
profet blong Buk  
blong Momon oli bin  
raetemdaon mo bin  
stap folem tu olgeta  
komamnen.*



### **WAN PROFET I STAP TESTIFAE**

"Yu no trastem yuhan,  
be stadi ol buk we oli  
gudwan—Baebol mo  
Buk blong Momon—  
mo tekem evri info-  
mesen we yu save  
tekem, mo afta, stap  
strong long God mo  
kipim yuhan yu fri long  
ol korapsen mo doti  
blong eni kaen, mo sa-  
pos yu mekem hemia,  
ol blesing blong Hem  
we I Hae Olgeta bae i  
stap wetem yu."

*President John Taylor (1808–87), Teachings of Presidents of the Church: John Taylor (2001), 148.*

### **Oi Blesing blong Fasin blong Stap Obei**

Baebol: "Nao hem i talem strong long mifala se yumi mas obei long olgeta loa ya blong hem, mo yumi mas tinghevi long hem, yumi mas onagud long hem. Mo sipos yumi stap mekem olsem, hem bambae i lukaot gud long . . . yumi . . . Mo sipos yumi mekem tingting blong yumi i strong blong obei long olgeta samting ya we hem i talem, hemia i min se yumi stap mekem i stret long fes blong hem" (Dutronome 6:24–25; luk tu long Ol Proverb 4:4; Jon 14:21).

### **Oi Ten Komanmen**

Baebol: Lod i bin talemaot Ol Ten Komanmen long Moses (luk long Eksodas 20:1–17).

### **Taeting**

Baebol: "Yufala i mas tekem olgeta taet blong yufala i kam long haos blong mi, blong bambae i save gat plante kakae long hem" (Malakae 3:10; luk tu long Levitikas 27:30).

Buk blong Momon: "Hem i bin promes long yufala se sapos yufala i holem ol komanmen blong hem, bae yufala i kam antap gud long graon; mo hem i neva jenism wanem we hem i bin talem; taswe, sapos yufala i holem ol komanmen blong hem, hem i stap blesem yufala mo mekem yufala i kam antap gud" (Mosaea 2:22; luk tu long 2 Nifae 1:20).

### **Baptaes mo Tabu Spirit**

Baebol: "Tru mi talem long yu, sipos man i no bon long wota mo long Tabu Spirit, bambae hem i no save kam we God i King blong hem" (Jon 3:5; luk tu long Mak 16:16; Ol Wok 2:36–38).

Buk blong Momon: "Mo hem i semfala Melki-sedek ia we long hem Ebraham i bin pem taeting; yes, we hem i papa blong yumi Ebraham, hem i bin pem wan ten long evri samting we hem i bin gat olsem taeting blong hem" (Alma 13:15; luk tu long 3 Nifae 24:8–10).

Buk blong Momon: "Sakem sin, yufala evri-wan long evri en blong wol, mo kam long mi mo kasem baptaes long nem blong mi, blong yufala i save kam klin taem we yufala i kasem Tabu Spirit, blong yufala i save stanap mo no gat mak long fored blong mi long las dei" (3 Nifae 27:20; luk tu long 2 Nifae 9:23; 31:5–9).

## Misin blong Jisas Kraes

Baebol mo Buk blong Momon, tufala i testifae abaot Jisas Kraes, Pikinini blong God, mo abaot Atonmen blong Hem. Tufala i tijim se Sevya i bin tekem long Hem ol sin blong yumi mo i bin winim ded.



## WAN PROFET I STAP TESTIFAE

"Buk blong Momon . . . i talemaot se Baebol i tru, mo i pruvum; mo tufala tugeta, i pruvum se wanwan long tufala i tru."

**President Brigham Young (1801–77), Teachings of Presidents of the Church: Brigham Young (1997), 121.**

## Wan Stret Pikinini la Nomo blong God

"God i lavem tumas ol man long wol, nao hem i givim mi, mi stret Pikinini blong hem, mi wan nomo we hem i gat, blong olgeta man we oli bilif long mi bambae oli no save lus, oli gat laef we i no save finis" (Jon 3:16; luk tu long Matiu 16:16; Jon 6:69).

## I Bin Pemaot Ol Sin blong Yumi

Baebol: "From we hemia blad blong mi, we i blong mekem promes blong God i stanap. Blad blong mi bambae i ron blong tekemaot ol sin blong plante man" (Matiu 26:28; luk tu long Hibrus 9:28; Fas Pita 3:18).

## I Tekem Ol Samting we Yumi Harem Nogud long Hem

Baebol: "Olgeta samting we i stap mekem yumi harem nogud, hem i karem olgeta evri-wan" (Aesea 53:4; luk tu long Hibrus 2:18).

## I Bin Winim Ded

Baebol: "Kraes ya, God i mekem hem i laef bakegen finis. Long olgeta we oli ded finis, hem i faswan we i laef bakegen. Hem i olsem fas kakae ya we i rere long garen" (Fas Korin 15:20; luk tu long Jon 14:19; Ol Wok 26:23).

Buk blong Momon: "Mi save se Jisas Kraes bae i kam, yes, Pikinini, Wan Pikinini Nomo blong Papa, we i gat fulap gladhat, mo sore, mo trutok." (Alma 5:48; luk tu long 1 Nifae 11:16–21; Mosaea 3:5–8).

Buk blong Momon: "Luk, hem i givim hem-wan bakegen wan sakrifaes blong sin, blong mekem wanem we loa i askem long olgeta we i gat wan hat we i fulap wetem sore mo wan spirit we i wantem blong sakem sin" (2 Nifae 2:7; luk tu long 1 Nifae 11:33; Alma 34:8–10; 3 Nifae 11:14).

Buk blong Momon: "Mo bae hem i go aot, i harem nogud long ol soa blong bodi mo fulap hadtaem mo temtesen blong evri kaen; . . . mekem se hem i save, long saed blong bodi blong mit mo bun, olsem wanem blong helpem ol man blong hem long saed blong ol samting blong olgeta we oli no strong long hem" (Alma 7:11–12; luk tu long Mosaea 14:3–5).

Buk blong Momon: "Biliv long Jisas Kraes, se hem i Pikinini blong God, mo we ol Jiu i bin kilim hem i ded, mo tru long paoa blong Papa, hem i bin girap bakegen, tru long samting ia hem i bin kasem win ova long gref" (Momon 7:5; luk tu long Mosaea 16:7–8; Hileman 14:17).

## Jos blong Jisas Kraes long Taem blong Bifo

Lod i bin stanemap  
Jos blong Hem long  
Jerusalem mo long ol  
Amerika. Baebol mo  
Buk blong Momon oli  
ol witnes se Hem i bin  
oganaesem mo i bin  
lidim ol pipol blong  
Hem tru long ol pro-  
fet mo ol aposol.

### Ol Profet

Baebol: "Hae God i Masta blong yumi, mo  
ol profet oli man blong wok blong hem, mo  
oltaem, sipos hem i wantem mekem wan sam-  
ting, hem i stap soemaot ol plan blong hem  
fastae long olgeta" (Amos 3:7; luk tu long  
Jeremaea 1:7; 7:25).

Buk blong Momon: "Tru long Spirit evri sam-  
ting i kam long save blong ol profet," (1 Nifae  
22:2; luk tu long Jekob 4:4–6).

### Olgeta Twelef

Baebol: "Hem i singaot ol man blong hem oli  
kam long hem. Nao hem i jusumaot twelef  
man long olgeta, mo i givim nem long ol twe-  
lef man ya, se aposol" (Luk 6:13; luk tu long  
Efesas 2:19–20; 4:11–14).

Buk blong Momon: "Bae yufala i kasem ble-  
sing sapos yufala i bilih long mi mo kasem  
baptaes, afta we yufala i bin lukim mi mo save  
se mi stap" (3 Nifae 12:1; luk tu long 1 Nifae  
11:29).

### Prishud Atoriti

Baebol: "Yufala i no jusumaot mi. Mi mi ju-  
sumaot yufala, mo mi putumap yufala blong  
yufala i go mekem wok, mo blong wok blong  
yufala i save karem frut, we frut ya i blong  
stap longtaem" (Jon 15:16; luk tu long Matiu  
16:19; Luk 9:1–2; Hibrus 5:4).

Buk blong Momon: "[Alma] i bin putum han  
blong hem long hed blong olgeta folem oda  
blong God, blong lidim mo lukaotem jos"  
(Alma 6:1; luk tu long 2 Nifae 6:2; Moronae 3).



### WAN PROFET I STAP TESTIFAE

"Long taem blong tedei, taem we plante man  
we oli gat ol defren tingting abaot wol ia oli  
stap daonem Baebol wetem ol skripja blong  
Baebol, blong talem se tru mining blong olgeta  
i no tru, yumi glad tumas se Papa long Heven  
we i no save finis, we i stap wari oltaem we ol  
pikinini blong Hem oli stap gud long saed blong spirit, i bin gi-  
vivim wan kompanion buk blong ol skripja, we oli save long hem  
olsem Buk blong Momon, we i stap blong difendem ol trutok  
blong Baebol we ol profet oli bin raetemdaon mo talem, olsem  
we Lod i bin talem long olgeta. . . .

" . . . Tru long seken witnes ia, yumi save kam blong save stret  
wanem nao mining blong ol tijing blong ol profet blong bifo  
mo, i tru, ol tijing blong Masta mo ol disaepol blong Hem we  
oli bin stap tijim long medel blong ol man taem oli bin stap laef.  
Hemia i mas stap olsem wan insperesen long evriwan we oli gat  
ones tingting blong lukaotem trutok, blong oli putum tufala  
tabu skripja ia tugeta mo stadi long tufala olsem we oli wan buk  
nomo, mo stap andastanem, olsem we yumi andastanem, tru  
rilesensip we i stap bitwin tufala buk."

President Harold B. Lee (1899–1973), *Ye Are the Light of the World* (1974), 89, 91.

### Sam Moa Stadi

Jat ia i no wan ful lis. Olsem pat blong  
skripja stadi blong yuwan o blong famle, yu  
save ademap ol nara skripja long jat ia mo  
stap lukaotem moa topik blong prinsipol we  
oli tijim, tugeta, long Buk blong Momon mo  
long Baebol. Yu save mekem hemia taem yu  
yusum Topical Guide (Topik Gaed) o Guide  
to the Scriptures (Wan Gaed blong luk Ol  
Skripja), mo tu, ol stadi tul we yu save fae-  
nem long intanet long [scripts.lds.org](http://scripts.lds.org). ■

#### NOT

- Russell M. Nelson, "Scriptural Witnesses," *Liahona*, Nov. 2007, 43.



I Kam long Elda  
D. Tod Kristofeson

Blong Kworom blong  
Olgeta Twelef Aposol

# Olsem Wanem blong Stadi LONG BUK BLONG MOMON

**T**wantefael yia i pas, Presiden Esra Taf Benson (1899–1994) i bin givim ditel blong “ol trifala bigfala tingting long from wanem ol Lata-dei Sent oli mas mekem stadi blong Buk blong Momon i wan samting we oli mas mekem long laeftaem blong olgeta.”<sup>1</sup> Ol risen ia oli go olsem:

- Faswan, Buk blong Momon i ki ston blong relijin blong yumi—ki ston blong witnes blong yumi abaot Jisas Kraes, doktrin blong yumi, mo testemoni blong yumi.
- Nambatu, Buk blong Momon, oli bin raetem blong yusum long dei blong yumi.
- Nambatri, Buk blong Momon i helpem yumi kam kolosap moa long God.

Ol trifala risen ia blong stap stadi long Buk blong Momon, i givim tingting tu long sam narafala wei we bae yumi save stadi long spesel skripja ia.

## Ki Ston blong Relijin blong Yumi

From se Buk blong Momon i ki ston blong witnes blong yumi abaot Kraes mo ful gospel blong Hem, hem i impoten, long stadi blong yumi, blong lukukgud long ol fulap tijing mo testemoni blong Sevya we i stap insaed long hem. Sam, oli bin mekem hemia taem oli pem wan niu kopi blong Buk blong Momon, we i no sas, mo stap makem evri ves we i tokbaot o i stap tij abaot Sevya, ministri blong Hem, mo misin blong Hem. Hemia i mekem wan i kasem wan moa strong witnes abaot Jisas olsem Pikinini blong God mo wan niu glad from ol samting we Hem i bin mekem, mo ol samting we Hem i stap gohed blong mekem blong yumi.

## Oli Bin Raetem blong Taem blong Yumi

Olgeta we oli bin raetem Buk blong Momon, oli bin raetem ol samting ia wetem long maen blong olgeta, ol fiuja jeneresen, speseli olgeta long lata dei (taem blong las dei). Taem hem i bin raetemsot ol histri blong ol man blong Nifae, Momon i bin talem se buk ia “i no save hollem kasem wan handred pat” long wanem we i stap (luk long 3 Nifae 5:8; luk tu long Ol Toktok blong Momon 1:5). Moronae i bin talem, “Luk, mi toktok long yufala olsem se yufala i stap long ples ia, be yufala i no stap. Be luk, Jisas Kraes i bin soem yufala long mi, mo mi save ol wok blong yufala” (Momon 8:35). Tufala man ia we tufala i raet mo ol narawan, we oli mekem samting ia folem insperesen, oli bin raetem wanem we bae i gud moa blong gud blong yumi long ol lata-dei ia.

Nao, yumi mas stadi wetem ol kwestin ia long maen blong yumi. “From wanem hem i raetem pat ia? Olsem wanem nao hemia i blong mi yusum tedei, mo hem i blong mi?” Eksampol, Presiden Benson i bin talem se long Buk blong Momon, yumi faenem wan paten blong stap rere long Seken Kaming blong Sevya. Yumi lanem olsem wanem ol disaepol blong Kraes oli stap laef long ol taem blong wo, olsem wanem oli stap fesem ol samting we i kam agensem olgeta mo fasin blong apostasi, olsem wanem blong mekem misinari wok, mo i givim ansa long ol denja blong wantem ol samting blong wol ia nomo.<sup>2</sup> Olsem we Nifae i bin mekem, taem yumi stadi, yumi mas “putum” ol skripja oli kambak long yumiwan—we hem i blong traem faenemaot olsem wanem blong yusum wanem we yumi faenem insaed long Buk blong Momon (luk long 1 Nifae 19:23).



## **GOHED BLONG STAP STADI BLONG GOHED BLONG STAP LANEM SAMTING**

Fastaem we mi bin ridim Buk blong Momon, mi no bin wan memba. Mi gat 16 yia, mo mi bin ridim long wan wik. Taem mi kam kolosap long en blong riding blong mi, mi kam long wan ves we i talem se sapos wan jos i wan jos blong Kraes, bae jos ia i tekem nem blong Hem (luk long 3 Nifae 27:8). Long stret taem ia, wota blong ae blong mi i ron i folem fes blong mi. Mi bin save se Buk blong Momon i tru, mo mi disaed blong kasem baptaes.

Afta long baptaes blong mi, mi bin ridim buk ia bakegen; be long taem ia, mi pem wan kala maka mo stap makem ol ves o ples we i givim insperesen long mi. Taem mi bin stap ridim bakegen afta, mi bin mekem semmak, be mi ademap ol not i go long ol ples we mi kalarem, hemia long saed blong pej. Long nekis taem mi ridim bakegen, mi ademap ol refrens we oli go wetem ol ves, we oli stap long Buk blong Momon o long ol narafala standet tabu buk.

Afta, long wan yia, long stat blong hem, mi bin pem wan niu kopi blong ol skripja, from hemia we mi gat i fulap long ol rae-ting mo mak, from se mi bin yusum long misin blong mi mo blong rere long plante lesen. Long taem ia, stadi blong mi mo fasin blong makem skripja i folem ol topik. Mi yusum wan kala blong wan topik—eksampol, orenj blong fet, grin blong fasin blong sakem sin, mo olsem ia i go.

Taem mi stap gogohed blong stap stadi long Buk blong Momon mo stap yusum ol defren wei ia, mi bin kam blong lanem se blong ridim Buk blong Momon wan taem nomo, hem i no inaf. Yumi stap lanem samting laen folem laen, taem yumi stap goheds blong stadi. Mi bin lanem tu se nomata hamas taem yumi bin ridim finis, otaem i gat wan samting we i mekem yumi talem: "From wanem mi no bin luk hemia bifo? I stap long ples ia nomo."

Ol skripja—speseli Buk blong Momon—i stap tijim yumi abaot Jisas Kraes mo abaot Papa blong Yumi we I Stap long Heven. Blong stap stadi long ol skripja i bin mekem mi kam kolosap moa long Tufala.

**Kristina Vergara Ramirez, Jile**

## Kam Kolosap Moa long God

Toktok blong Presiden Benson i talem bakegen: "I no nomo se Buk blong Momon i stap tijim yumi long trutok, nomata i tru se hem i stap mekem hemia. I no nomo se Buk blong Momon i stap talem testemoni abaot Kraes, nomata i tru se hem i stap mekem hemia. Be i gat wan samting moa. I gat wan paoa insaed long buk ia we bae i stat blong kam insaed long laef blong yu stat long taem we yu tinghevi blong stadi long buk ia."<sup>3</sup>



## WAN PROFET I STAP TESTIFAE

"Mi bin statem blong ridim Buk blong Momon bifo mi kasem yia blong kam wan dikon, mo mi stap gohed blong ridim kasem tedei, mo mi save se hem i tru. . . .

"... Long mi, mi luk se i no gat wan memba blong Jos ia we bae i glad inaf sapos hem i no ridim Buk blong Momon bakegen, bakegen mo bakegen; mo sapos hem i no bin tingting se hem i save talem witnes blong hem se long evri wei blong hem, buk ia i wan rekod we i kam tru long insperesen blong Hem we I Gat Olgeta Paoa, mo histri we i stap insaed long hem, i tru."

**President Joseph Fielding Smith (1876–1972), long Conference Report, Oktoba 1961, 18.**

I tru, taem yu stap stadi long Buk blong Momon, hem i invaetem Spirit, mo Spirit i tul blong revelesen. Hemia i talem se yumi mas stadi wetem wan fasin blong gat tingting, tingting kwaet—blong stap tingting hevi, stap prea, mo ating, blong tekem sam not taem yumi stap rid. Hemia i mekem se yumi stap long wan stret taem blong kasem moa laet mo save andastanem samting moa, tugeta abaot ol samting we yumi stap stadi long hem, mo tu, abaot ol narafala samting. Samtaem, hem i help blong ridim ful Buk blong Momon long wan sot taem blong kasem kwiktaem stori mo mesej we i stap insaed. Be plante taem, hem i gud moa blong lukluk blong putum wan gud-fala taem i stap evri dei blong stadi long buk,

be i no blong ridim wan namba blong ves o pej evri dei.

## Ol Tul blong Help blong Stadi

Yumi glad tedei blong gat wan gudfala namba blong ol tul we i save helpem stadi blong yumi long Buk blong Momon. Sam oli joen i stap wetem ol skripja blong yumi—the Topical Guide (Topik Gaed), Bible Dictionary (Baebol Diksonari), mo Index (Indeks) long Inglis skripja mo Guide to the Scriptures (Gaed blong Ol Skripja) long ol nara lanwis. Mo yumi gat, insaed long ol Lata-dei Sent edisen blong ol skripja, plante futnot mo kros-refrens long evri pej.

Ol nara tul blong help blong stadi, oli printim olgeta olsem ol Sandei Skul Klas-Stadi Gaed blong Memba blong Klas, Seminari Studen Stadi Gaed, mo Institiut Studen Lesenbuk. Long taem blong yumi tedei, wanem i niu i bigfala namba blong ol lektronik tul, olsem we oli tokbaot long kolom long pej 31.

## Tul blong Jenisim Laef blong Man

Buk blong Momon i wan bigfala rij samting mo i tul blong jenisim laef blong man, we Lod i bin putum mo givim long taem blong dispensesen blong yumi. Mi luksave buk ia olsem stamba blong testemoni blong mi abaot Jisas Kraes, stamba blong koling blong Josef Smit olsem profet, mo stamba blong Jos blong Jisas Kraes blong Ol Lata-dei Sent olsem "kingdom blong Lod we wan taem bakegen i stanap long wol."<sup>4</sup> Mi mi glad blong joenem testemoni blong mi wetem Jisas Kraes se olsem we Lod mo God blong yu i laef, buk ia hem i tru (luk long D&C 17:6). Bae stadi blong yu long Buk blong Momon long laeftaem blong yu bae i mekem yu jenism moa laef blong yu mo i lidim yu long wan stret rod we i go kasem laef we i no save finis. ■

### OL NOT

1. Ezra Taft Benson, "The Book of Mormon—Keystone of Our Religion," *Ensign*, Nov. 1986, 5–7. Toktok ia we oli kwotem plante taem, oli printim bakegen long magasin ia long ol pej 00–00 (52–58).
2. Luk long Ezra Taft Benson, *Ensign*, Nov. 1986, 6–7.
3. Ezra Taft Benson, *Ensign*, Nov. 1986, 7.
4. Fas Toktok long Buk blong Momon.

## OL SKRIPJA LONG INTANET MO LONG OL LEKTRONIK TUL WE YU SAVE TEKEM OLBAOT

Antap long fasin blong lukaotem kwik ol ki toktok mo ol kros-refrens, ol onlaen skripja (long intanet) long ([scriptures.lds.org](http://scriptures.lds.org)) mo long ol lektronik tul we yu save tekem olbaot, long ([mobile.lds.org](http://mobile.lds.org)) oli givim niu wei we i save helpem yu long stadi blong yuwan:



### Stadi Notbuk blong Mi (notebook.lds.org)

Onlaen stadi notbuk ia (we i stap nomo long intanet) i givim plante semfala tul we yu save yusum nomo long wan nomol stadi—eskampol kalarem, tekem not, mo yusum kros-refrens—be hem i letem yu tu blong yusum mo sevem ol samting ia long kompiuta. Antap long hemia, yu save “tagem” o putum not blong yu mo ol nara samting we i stap, folem topik. From se bae yu go insaed long Stadi Notbuk blong Mi tru long LDS akaon blong yu, bae ol niu samting long notbuk blong yu bae oli stap nomo oltaem nomata wanem defren lektronik tul yu yusum blong go insaed long Notbuk blong yu. Ol tul ia, oli letem yu krietem akaev blong yu we i folem topik, blong yu stadi long gospel mo tijim gospel.



### Skripja Fael mo Lanwis (scriptures.lds.org)

Ol skripja we oli taepem long kompiuta mo rekodem long odio, oli stap naoia long: LDS.org mo yu save daonlodem tu long ol lektronik tul we yu save tekem olbaot. Oli stap long plante lanwis mo oli stap kam yet long sam narafala lanwis.

Antap long wei blong ridim mo lisin long intanet, yu save daonlodem (sevem long kompiuta blong yu) mo yusum odio, ePub, mo ol PDF fael afta we yu nomo konek long intanet. Las intanet saet blong Jos blong onlaen skripja i mekem i isi blong serem ol toktok blong skripja mo ol not blong yuwan wetem ol narawan tru long imel o ol nara sosol tul blong media.

Ol skripja long intanet long LDS.org, oli stap naoia long 21 lanwis; ol lektronik program blong ol lektronik tul, oli stap long samples 10 lanwis, mo i dipen long ples we oli stap long hem.



### Indeks blong Hu I Yusum Ol LDS Skripja (scriptures.bry.edu)

Tul ia, we tufala Inglis tija blong Brigham Yang Yunivesiti i prodiusum, i stap joenem ol ves blong skripja wetem ol toktok we oli kam long ol profet mo aposol blong tedei. Eksampol, yu wantem save hu nao i bin yusum skripja ia, 1 Nifae 3:7 long jeneral konfrens. Klikim Buk blong Momon long toktok long lef saed blong skrin mo muv i go daon long 1 Nifae 3; ples ia nao bae yu faenem ansa.



### Indeks blong Ol Topik blong Jeneral Konfrens (conference.lds.org)

Wan nara tul blong helpem yu blong joenem skripja stadi wetem ol toktok blong ol profet we oli stap laef; conference.lds.org i givim ol lis we i folem ol topik blong wanwan jeneral konfrens. Eksampol, sapos yu stap stadi long Atonmen insaed long skripja, yu save faenem faef toktok we i bin tokbaot topik ia long April 2011 Konfrens.



# Drim blong Lihae

STAP HOLEM TAET REL BLONG AEAN IA



*Stamba toktok we i kamaot gud long Buk blong Momon—blong stap invaetem evriwan blong kam long Kraes—i stamba blong visen blong Lihae.*

I Kam long Elda  
**Deved A. Bedna**

Blong Kworom blong  
Olgeta Twelef Aposol



Mi lavem Buk blong Momon. Sam long ol fas gospel memori blong mi, oli abaot mama blong mi we i stap ridim *Book of Mormon Stories for Young Latter-day Saints*, (Ol Buk blong Momon Stori blong ol Yangfala Lata-dei Sent) we i kam long Ema Mar Pitasen. Long taem blong ol eksperiens blong mi long taem we mi bin yangfala pikinini mo truaot long laef blong mi we mi stap stadi, mo prea, Tabu Spirit i bin oltaem, oltaem givim witnes long sol blong mi se Buk blong Momon i toktok blong God.

Mi testifae se Buk blong Momon i wan nara testeman blong Jisas Kraes. Mi save se Profet Josef Smit i bin transletem Buk blong Momon wetem mo tru long paoa blong God. Mo mi stap wan witnes se Buk blong Momon i "moa stret long eni narafala buk long wol, mo i ki ston blong bilif long God blong yumi, mo wan man bae i kam moa klosap long God sapos hem i folem ol tijing blong hem, bitim eni narafala buk."<sup>1</sup>

### Ol Ki Saen long Drim blong Lihae

Hamas i impoten blong ridim, stadi, lukluk insaed mo tingting hevi long ol skripja mo speseli Buk blong Momon, i kamaot klia long plante poen insaed long visen blong Lihae abaot tri blong laef (luk long 1 Nifae 8).

Stamba samting long drim blong Lihae i tri blong laef—wan piljia blong "lav blong God" (luk long 1 Nifae 11:21–22). "God i lavem tumas ol man long wol, nao hem i givim mi, mi stret Pikinini blong hem, mi wan nomo we hem i gat, blong olgeta man we oli bilif long mi bambae oli no save lus, oli gat laef we i no save finis" (Jon 3:16). From hemia, taem we Lod Jisas Kraes i bon, laef blong Hem mo sakrifaes blong Hem we i pemaot man, oli ol bigfala saen blong lav we God i gat long ol pikinini blong Hem. Olsem we Nifae i testifae, lav ia hem i, "samting we evri man i wantem moa plante long ol narafala samting," mo olsem enjel i bin talemaot long visen blong hem, hem



## WAN PROFET I STAP TESTIFAE

"Mi testifae long yufala se i tru se Buk blong Momon i Toktok blong God, se toktok bitwin wol mo heven i open bakegen, mo se tru rod blong Lod, Hem i talemaot long man long wol, i soem ol wei we evri tru man we i bilif long Kraes i save kasem save mo ol blesing we hem i nidim."

President David O. McKay (1873–1970), "Marks Pointing to Authenticity of Book of Mormon," *Instructor*, Oktoba 1952, 318.

i "hem i wan glad we i bigwan olgeta long sol" (1 Nifae 11:22–23; luk tu long 1 Nifae 8:12, 15). Japta 11 blong 1 Nifae i tokbaot gud evri smol pat blong tri blong laef olsem wan saen blong laef, ministri, mo sakrifaes blong Sevya—"ol samting long saed blong ol wok we God i kam daon blong mekem wetem man" (1 Nifae 11:16).

Frut we i stap long tri ia, i wan saen blong ol blesing blong Atonmen. Blong tekem frut blong tri, hem i ripresentem blong kasem ol odinens mo ol kavenan we tru long olgeta, Atonmen i save wok fulwan long laef blong yumi. Frut, oli tokbaot se hem i "gud tumas blong i save mekem man i hapi" (1 Nifae 8:10) mo i givim bigfala glad mo i givim tingting blong wantem serem glad ia wetem ol nara-fala man.

Nao i tru we stamba toktok we i kamaot gud long Buk blong Momon—blong stap invaetem evriwan blong kam long Kraes—i stamba blong visen blong Lihae. Wanem i pulum tingting plante i rel blong aean we i lidim man long tri (luk long 1 Nifae 8:19). Rel blong aean i toktok blong God.

## Blong Stap Holem Strong o Blong Stap Holem Taet Rel blong Aean ia

Papa Lihae i bin luk fo grup blong pipol long visen blong hem. Tri long ol grup ia oli bin stap traehad blong go fored folem stret mo smol rod, mo stap lukaotem blong kasem tri mo frut blong hem. Wan nambafo grup i no bin stap lukaotem tri ia nating, be oli bin wantem blong go long bigfala haos ia we i gat fulap spes, olsem ples ia nao we oli jusum blong stap long hem (luk long 1 Nifae 8:31–33).

Long 1 Nifae 8:21–23 yumi lanem abaot fas grup blong ol pipol we oli bin traehad blong go fored mo stat blong wokbaot long rod we i go kasem tri blong laef. Be, taem pipol ia i stat blong kasem klaod blong tudak, we i ripresentem "ol temtesen blong devel" (1 Nifae 12:17), oli bin lusum rod blong olgeta, oli go aotsaed long rod, mo oli bin lus.

Lukgud se oli no tokbaot nating rel blong aean long ol ves ia. Olgeta we oli no wantem save, o stap tingting nating long toktok blong God, oli no save kasem tabu kampas ia we i soem rod i go long Sevya. Tekem nomo se grup ia i bin kasem rod mo oli bin

## NO BIN LISIN LONG OLGETA

Long laef blong mi, mi bin kasem paoa long saed blong spirit aot long toktok ia "mifala i no bin lisin long olgeta" (1 Nifae 8:33). Long 1 Nifae, sam we oli stap wokbaot long rod blong olgeta i go kasem tri blong laef, oli no bin lisin long ol woes we oli stap jik. Man i bin stap poenem fingga long olgeta, be oli no bin stop. Oli no bin lisin. Semmak, yumi save harem plante laod woes we i stap temtem yumi tedei. Samtaem, hem i had tumas blong no stap lisin long ol woes ia, be Lihae i bin soem se hemia i posibol.

Mi bin faenem se mi save sarem sora blong mi long ol woes blong wol ia taem mi stap go long tempol, stap ridim ol skripja blong mi, stap go long jos, mo stap folem profet. Taem mi stap mekem ol simpol samting ia, mi save harem woes blong Tabu Spirit. Voes ia nao we hem i gudwan blong stap lisin long hem. Mo taem mi stap mekem folem wanem woes blong Spirit i talem, mi kasem moa paoa blong stanap agensem temtesen.

Taem yumi folem eksampol blong Lihae mo "no stap lisin long olgeta" woes ia, yumi save stap long stret mo smol rod, mo oltaem stap glad long lav blong God.

Melisa Hiton, Yuta, YSA



traehad fored, mo gat wan smol fet long Kraes mo strong tingting long spirit, be ol temtesen blong devel i bin pulum olgeta mo oli bin go lus.

Long 1 Nifae 8:24–28 yumi stap rid abaot wan nambatu grup blong ol pipol we oli bin kasem stret mo smol rod we i go kasem tri blong laef. Grup ia “i bin go fored tru long ol klaod blong tudak, oli holem strong long rel blong aean, mo tu, kasem taem we oli bin kam fored mo kakae long frut blong tri” (ves 24). Be, taem ol man we oli dresap long flas klos we oli stap long haos ia we i bigwan mo i gat fulap rum long hem oli stap jikim nambatu grup blong ol pipol ia, “oli bin sem” mo “oli bin foldaon i go long ol rod we i no blong folem, mo oli bin lus” (ves 28). Plis lukgud se grup ia oli tokbaot olgeta we oli bin “holem strong long rel blong aean” (1 Nifae 8:24; oli ademap italic).

Hem i impoten blong luk se nambatu grup i gohed blong muv fored wetem fet mo komitmen. Olgeta tu oli bin gat wan moa blesing ia blong gat rel blong aean, mo oli bin stap holem strong rel blong aean ia! Be, taem oli bin fesem hadtaem mo fasin blong agens, oli

bin foldaon long ol nogud rod mo oli bin lus. Nomata oli bin gat fet, komitmen, mo toktok blong God, grup ia i bin go lus—ating from se oli ridim o stadi o lukluk long ol skripja *wan-wan taem*. Blong holem strong rel blong aean, long mi, i minim blong gat “*strong filing*” blong stadi we i hapen wanwan taem nomo, o blong stap digdig wanwan taem be i no blong stap draon oltaem long ol toktok blong God.

Long ves 30, yumi save ridim abaot wan nambatri grup blong ol pipol we oli bin go hed blong go fored, *oli stap holem taet* rel blong aean oltaem.

Nambatri grup tu i bin gohed blong go fored wetem fet mo strong tingting; be, i no gat wan ples i talem se oli bin lus smol, o foldaon long ol rod we i no blong go long hem, o oli bin lus evriwan. Ating nambatri grup blong pipol ia i bin ridim ol skripja *oltaem* mo i bin stadi *mo* i bin lukluk long ol skripja oltaem. Ating hem i fasin blong olgeta blong stap strong mo gat strong tingting blong mekem wanem we yumi luk olsem wan “smol mo simpol [samting]” (Alma 37:6) we i bin sevem nambatri grup blong oli no lus evriwan. Ating hem i “save long saed blong Lod”

***Nomata oli bin gat fet, komitmen, mo toktok blong God, nambatu grup ia we i stap go fored long stret mo smol rod ia, mo i stap holem strong long rel blong aean ia, i bin go lus—ating from se oli ridim o stadi o lukluk long ol skripja wan-wan taem.***



FOTO PIKIA IKAM LONG MATIU RALE

***Blong holem strong rel  
blong aean, i minim,  
long bigfala toktok,  
blong yusum tabu  
skripja wetem prea, ol-  
taem mo wetem strong  
tingting, olsem wan sef  
gaed blong rod blong  
yumi i go long tri blong  
laef—i go long Lod  
Jisas Kraes.***

mo “save long saed blong trutok” (Alma 23:5, 6) we oli bin kasem from oli bin stadi long skripja oltaem we i bin mekem se oli kasem presen blong spirit ia blong gat tingting i stap daon—mekem se grup ia i bin “*foldaon* mo oli bin kakae long frut blong tri” (1 Nifae 8:30; oli ademap italic). Ating hem i kaekae long saed blong spirit mo paao we i kam taem oli bin stap “kakae gud long toktok blong Kraes” (2 Nifae 31:20) oltaem we i bin mekem se grup ia i no bin lisin mo mekem folem ol nogud toktok, mo toktok blong jik blong ol pipol blong bigfala haos ia we i gat plante rum long hem (luk long 1 Nifae 8:33). Grup ia nao, yu mo mi i mas traehad blong joenem.

Brata blong Nifae i bin askem, “Wanem mining blong rel blong aean we papa blong yumi i bin luk, we i bin go long tri?

“Mo [Nifae] bin talem long olgeta se i bin toktok blong God, mo eni man we bae i lisin long toktok blong God, mo bae *i holem taet long hem*, bae oli no save lus; mo tu ol temtessen mo ol spia blong devel, we i gat faea long hem, i no save winim olgeta kasem taem we oli kam blaen, blong lidim olgeta i gowe blong lus” (1 Nifae 15:23–24; oli ademap italic).

Nao. Wanem samting i difren bitwin fasin blong stap holem strong mo fasin blong stap holem taet rel blong aean? Bae mi talem olsem, blong holem strong rel blong aean, i minim, long bigfala toktok, blong yusum tabu skripja wetem prea, oltaem mo wetem strong tingting olsem wan ples we trutok we God i talemaot i stap long hem, mo blong yusum tabu skripja olsem wan gaed long rod blong yumi long stret mo smol rod we i go long tri blong laef—i go long Lod Jisas Kraes.

“Mo i bin hapen se mi bin luk se rel blong aean, we papa blong mi i bin lukim, i bin toktok blong God, we i bin go stret long spring-wota blong ol wota we i laef, o long tri blong laef” (1 Nifae 11:25).

### **Buk blong Momon I blong Yumi Tedei**

Buk blong Momon i talemaot ol trutok we oli stret mo i nid long dei blong yumi tedei, mo i stret mo i nid long situesen blong yumi. Hamas nao Buk blong Momon i wan samting we yumi nidim long spirit mo long praktis long laef blong yumi, Moronae nao i tokbaot gud: “Luk, mi toktok long yufala olsem se yufala i stap long ples ia, be yufala i no stap.

Be luk, Jisas Kraes i bin soem yufala long mi, mo mi save ol wok blong yufala" (Momon 8:35). From we oli bin luk taem blong yumi mo situesen blong laef blong yumi tru long save we God i gat finis, olgeta we oli bin rae-tem Buk blong Momon oli bin putum ol topik mo ol eksampol we oli impoten tumas speseli long ol pipol we oli stap long wol ia long ol lata dei.

Mi invaetem yufala blong tingting gud mo wetem prea long kwestin ia we i stap kam:  
**Wanem lesen nao mi save lanem, mo mi mas lanem aot long visen blong Lihae long saed blong tri blong laef mo aot long prinsipol ia blong stap holem taet oltaem rel blong aean we bae i mekem se mi save stanap strong long saed blong spirit long wol ia we yumi stap laef long hem tedei?**

Taem yu stap wok strong wetem strong tingting mo stap lukaotem blong kasem insperesen long ansa blong impoten kwestin

ia, bae yu kam blong andastanem moa fulwan, tru long paoa blong Tabu Spirit, insaed long hat mo maen blong yu, olsem wanem i impoten blong *stap holem taet* rel blong aean. Mo bae yu kasem blesing taem yu yusum ol lesen ia wetem fet mo fasin blong wok strong, long laef blong yuwan mo in-saed long hom blong yu.

Bae yumi evriwan i gat ol ae blong luk, mo ol sora blong harem sam moa lesen we i kamaot long visen blong Lihae, we bae i helpem yumi blong "mas wokbaot fored wetem strong bilif long Kraes, wetem wan stret mo klin hop, mo wan lav blong God mo blong evri man. From samting ia, sapos [yumi] gohed strong, kakae gud long toktok blong Kraes, mo stap strong kasem en, luk, olsem ia nao Papa i talem: Bae [yumi] kasem laef we i no save finis" (2 Nifae 31:20). ■

#### NOT

1. *Teachings of Presidents of the Church: Joseph Smith* (2007), 64.

## YU NO AOT LONG ROD IA!

**S**ista blong mi i mekem mi save long Jos, mo mi bin laekem tumas mo i no longtaem afta, mi kasem baptaes.

Nomata mi no save olsem wanem blong rid, bae mi openem Buk blong Momon, mo tantanem ol pej. Mi bin wantem tumas blong ridim ol toktok we i stap long ol pej ia. Hasban blong mi, we i no bin baptaes yet be i bin baptaes afta, i wari tumas long mi we mi stap sidaon mo stap lukluk nomo long buk ia; nao hem i talem se mi stap westem taem blong mi.


Wetem plante hadwok mo wetem help blong ol sista insaed long Rilif Sosaeti mo wetem help blong ol pikinini blong mi, mi stat blong traem blong rid. Oltaem, mi putum olsem stamba tingting blong mi blong mi mas save ridim Buk blong Momon.

Speseli long wan taem we i bin had, taem we mi gat ol nogud tingting, mi harem klia ol toktok ia: "Yu no aot long rod ia!" Mi bin luklukraon blong luk se i gat wan man i stap, be i no gat man.

Wan dei, mi talem long gel blong mi se mi stap stat blong save rid miwan. Hem i no bin bilivim mi, mo askem blong mi soem long hem. Taem mi bin mekem, hem i bin glad tumas.

Gol blong mi i blong ridim Buk blong Momon, stat long stat kasem en. Mi stap rid slo, be mi save andastanem, mo wanem i moa impoten, mi save filim Spirit tru long gudfala buk ia.

Edite Feliciano de Paula, Sao Polo, Brasil





I Kam long Elda  
Nil L. Andesen

Blong Kworom blong  
Olgeta Twelef Aposol

# BUK BLONG MOMON: Stap Mekem Fet blong Yumi long Jisas Kraes I Kam Strong Moa

*Buk blong Momon i stap invaetem yumi mo ol famle blong  
yumi blong gat fet long Lod Jisas Kraes, mo i stap serem ol prinsipol  
we bae i helpem ol famle blong yumi blong gat gud laef.*

**B**uk blong Momon we i tekem tugeta ol tijing blong ol profet blong ova long plante hundred ia, oli bin raetem blong wan taem long fuja; wan taem we bae oli putumbak ol ki blong prishud, wetem bigfala kam tugeta blong haos blong Isrel, mo bae Buk blong Momon i mekem wol i rere long taem we Sevya i kambak long wol (luk long 2 Nifae 25; 27; 3 Nifae 21). Nifae i talem se tabu buk ia bae i “olsem wan voes blong wan we i stap singaot [aot] long das” (2 Nifae 33:13). Moronae i talem: “Luk, mi toktok long yufala olsem se yufala i stap long ples ia, be yufala i no stap. Be luk, Jisas Kraes i bin soem yufala long mi, mo mi save ol wok blong yufala” (Momon 8:35).

Oli bin raetem Buk blong Momon blong ol taem blong yumi tedei mo ol dei we oli stap kam yet. Oli printim kolosap samples wan milian kopi blong Buk blong Momon long ol fas 100 yia afta long Restoresen. Namba ia i tekem 15 lanwis, we i wan bigfala wok. Long ol 50 yia afta (1930–1980), oli bin printim 25 milian kopi long 41 lanwis. Stat long taem yia,

30 yia i pas, oli bin printim 125 milian moa kopi blong Buk blong Momon long 107 lanwis, mo hemia wetem buk ia, Sam Pat blong Buk blong Momon. Paoa mo wok blong Buk blong Momon bae i gohed blong gro taem kingdom blong God i stap go aot long evri kantri, famle, lanwis mo pipol.

Taetol pej, we Moronae i bin raetem, i talem ol stamba tingting blong buk. Fas stamba tingting i tokbaot stret ol laen blong ol pikinini blong Lihae. Las stamba tingting i blong “winim tingting blong [evri pipol] se JISAS hem i KRAES, God we I No Save Finis” (taetol pej blong Buk blong Momon).

## I Impoten long Dei blong Yumi

From wanem wan nara testeman abaot Josef Smit bae i impoten tumas long dei blong yumi? From wanem Lod bae i tekem wan nara witnes i kam blong sapotem ol toktok blong Baebol we i gat paoa?

Yumi stap laef long wan taem we i no semmak long ol narawan. Ol bigfala wok long saed blong saens i mekem se tedei yumi gat



*Long wol blong  
tedei, ol nogud  
toktok blong  
Koriho, man we  
i agensem Kraes,  
i foldaon long  
sam sora. Be fet  
long Jisas Kraes,  
taem rus blong  
hem i strong gud  
insaed long sol  
blong yumi, i me-  
kem yumi jenism  
laef tru.*

gud helt kea, transpot, gud laef, mo samting i isi, we ol jeneresen we oli kam fastaem long yumi oli neva tingting long hem. Wol i fulap long infomesen mo teknoloji, mekem se wok blong famle histri mo serem gospel i kam antap, be tu, i mekem se ponografi, tingting blong faet we oli luk long kompiuta, mo ol nara nogud samting mo wok we i stap long hat blong ol man we oli stap mekem ol sikret plan, oli stap go olbaot (luk long D&C 89:4). Long plante pat blong wol, yumi laef long wan taem we man i wantem tumas blong gat ol samting blong wol.

Ol kaen situesen olsem, sapos yumi no lukaot gud, oli pulum tingting blong yumi, mo switim yumi blong muvaot long ol prinsipol we oli no save finis mo oli tru, we i blong stap long evri jeneresen.

Taem mi wan yang misinari long Yurop long eli long ol yia 1970, blong statem tijing blong mifala, mifala i eksplenem wanem i Apostasi, from we plante man i akseptem finis se Jisas Kraes i wan Tabu Man. Taem mi



### **WAN PROFET I STAP TESTIFAE**

"Evri waes tingting blong evri man andanit long heven bae i no save putum tugeta mo presentem long wol wan buk we i olsem Buk blong Momon. Ol prinsipol blong hem oli tabu—oli kam long God. Oli neva save kamaot long tingting blong wan giaman man, o long tingting blong wan man we i stap raetem wan buk. From wanem? From se ol promes mo ol profesi we i stap insaed long hem oli stap kamtru long fes blong ful wol."

*President Wilford Woodruff (1807–98), Teachings of Presidents of the Church: Wilford Woodruff (2004), 119.*

bin gobak olsem wan misin presiden 20 yia afta, mifala i statem storian blong mifala long wan defren wei from se bilif ia, long Jisas Kraes olsem Pikinini blong God, mo olsem Man we i bin givim laef blong Hem from ol sin blong yumi mo i bin girap long nambatri dei, i bin lus bigwan.

Long wol blong tedei, ol nogud toktok blong Koriho, man we i agensem Kraes, i foldaon long sam sora:

“From wanem yufala i stap lukaotem wan Kraes? From i no gat wan man we i save eni samting we bae i kam.

“Luk, ol samting ia we yufala i singaotem ol profesi, . . . oli ol krangke kastom blong ol bubu blong yufala.

“. . . Yufala i no save kasem save long ol samting we yufala i no luk. . . .

“. . . evri man oli . . . gru i kam antap folem bigfala waes blong hem, mo . . . i . . . kam antap gud folem paoa blong hem” (Alma 30:13–15, 17).

Yumi nidim fet blong yumiwan long Lod Jisas Kraes blong i stanap strong mo i no muvmuv; mo yumi nidim help blong mekem ol famle blong yumi oli kam strong moa blong mekem se fet ia i pas gud long hat blong ol pikinini mo apupikinini blong yumi. Fet long Jisas Kraes, taem rus blong hem i strong gud insaed long sol blong yumi, i mekem yumi jenism laef tru, mo aot long hem, i gat ol samting ia oli kamaot, olsem fasin blong sakem sin, stap wan disaepol we i ones, ol merikel, ol presen blong spirit, mo wan fasin blong stap stret mo gud we i stap oltaem. Hemia i wan impoten pat long tabu misin blong Buk blong Momon.

Olsem wan yang misinari, mi bin gat wan gudfala storian wetem wan man we i wok blong wan jos. Hem i bin talem long mifala se hem i no save akseptem Buk blong Momon from se hem i tokbaot klia abaot Jisas Kraes, se i stap yusum nem blong Hem mo ol samting we i bin happen long laef blong hem plante handred yia biffo we Hem i bon. Hem i ting se blong tokbaot klia Jisas Kraes olsem, i no folem fasin we i stap long OlTesteman we i tokbaot Sevya long wan defren wei.

Long mi, blong tokbaot klia abaot Jisas Kraes, i stret paoa blong Buk blong Momon. I tru, yumi mas kasem wan witnes se buk ia i kam long God. Be taem yumi kasem witnes ia, ol stamba tingting blong Kraes, se i tru se Hem i bin laef mo i bin laef bakegen long ded, mo ol klia samting blong mekem blong stap folem Hem mo kasem laef we i no save finis wetem Hem, oli stap klia long wan samting we yumi save holem long fored blong yumi.

### Testemoni abaot Jisas Kraes

Wetem paoa blong Tabu Spirit, taem yumi ridim mo tingting hevi long ol bigfala toktok abaot Jisas Kraes we oli stap long Buk blong Momon, i mekem se yumi witnes finis

### EVRI SAMTING IA, FROM BUK BLONG MOMON

Hem i sikis manis finis we mi bin baptaes, mo mi no gat wan strong testemoni abaot Buk blong Momon. Wan dei, taem mi no bin wantem ridim ol skripja, mi tingbaot se Gospel Prinsipol tija blong mi i stap talem: “Taem yu filim se yu no wantem ridim, hem i from Setan i no wantem yu blong ridim ol skripja.” From woning ia, mi bin openem Buk blong Momon. Mi ridim: “Huia i bin save gat tingting ia biffo se, God blong yumi bae i save gat plante sore blong pulumaot yumi long ol rabis, nogud, mo doti fasin blong yumi?” (Alma 26:17). Ol toktok ia oli bin fulumap sol blong mi wetem glad from mi bin tingbaot se laef blong mi i olsem wanem, biffo mi kam wan memba blong tru Jos blong Jisas Kraes. Spirit blong Lod i bin testifae long hat blong mi se Buk blong Momon i tru.

Mi no bin wantem blong stap olsem wan fultaem misinari, be afta long dei ia, evri samting i bin jenis. Mi bin filim strong se wol ia i nidim blong save trutok, mo mi stat blong mekem miwan mi rere. Mi bin go luk ol lida blong mi mo mi talem long olgeta se mi wantem go long misin. Mi bin eksplenem long papa mo mama blong mi, we tufala i bin stap long wan nara taon mo tufala i no memba blong Jos. Afta, mi bin salem evri samting we mi bin gat mo mi pem ol klos blong go long misin. Long en, ansa i bin we mi bin stap long misin stat long 2003 i go kasem 2005.

Tedei, famle blong mi—wetem waef blong mi mo gel blong mitufala—i sil blong taem we i no save finis. Blesing ia i kam tru from testemoni blong mi abaot Buk blong Momon. Mi save se Buk blong Momon i tru, from hem i testifae abaot Lod Jisas Kraes, mo mi stap kam kolosap long God taem mi ridim tabu rekod ia.

Adilson Lusero dos Santos, Parana, Brasil



*Visen blong Nifae*



*Testemoni blong Lihae*



*Tabu Toktok blong King Benjamin*



*Witnes blong Abinadae*

*Taem yumi ridim  
mo tingting hevi  
long ol bigfala  
toktok abaot Jisas  
Kraes we oli stap  
long Buk blong  
Momon, i mekem  
se yumi witnes  
finis se ol toktok  
ia oli tru.*

se ol toktok ia oli tru. Mi laekem blong lukluk tru long Buk blong Momon, mo stap kakae long ol doktrin blong Kraes we i gat paoa: visen blong Nifae abaot tri blong laef wetem enjel we i stap askem “Yu save ol samting long saed blong ol wok we God i kam daon blong mekem wetem man?” (1 Nifae 11:16); testemoni blong Lihae se “fasin blong pemaot man i kam long mo tru Tabu Mesaea; from hem i fulap long gladhat mo trutok” (2 Nifae 2:6); toktok blong Jekob we i talem se Jisas i “wajman blong get . . . mo hem i no yusum wan wokman long ples ia” (2 Nifae 9:41).

Afta, yumi folem i go, wetem King Benjamin, we i stap tijim yumi abaot ol gud fasin blong stap olsem wan disaepol, wetem toktok blong hem we i no jenis se “i no gat wan narafala nem we bae oli givim, o wan narafala wei, o fasin we fasin blong sevem man i save kam long ol pikinini blong ol man, tru mo long nem blong Kraes nomo” (Mosaea 3:17).

I no longtaem afta, yumi stap wetem Abinadae, we i stap rere blong givim laef blong hem from bilif blong hem:

“Be i gat wan laef bakegen, taswe gref i no win, mo harem nogud blong ded i lus long Kraes.

“Hem i laet mo laef blong wol; yes, wan laet we i no gat en, we i no save kam tudak” (Mosaea 16:8–9).

Alma i mekem ol naesfala doktrin blong Atonmen, jastis, mo sore oli kam long laef: “Plan blong sore i no save wok sapos wan atonmen i no hapen; taswe God hemwan nomo i pem praes blong ol sin blong wol, blong mekem plan blong sore i hapen, blong givim ol samting we jastis i askem, blong mekem se God i save stap stret gud, wan stret God, mo tu wan God we i gat sore” (Alma 42:15).

Afta, yumi kam kasem bigfala visit blong Sevya i go long ol pikinini blong Lihae. Yumi tu, yumi filim lav blong Hem, sore blong Hem, ol tijing blong Hem, testemoni blong Hem:


“[Hem] hem i gospel we mi bin givim long yufala—se mi bin kam long wol blong mekem wanem we Papa blong mi i wantem, from Papa blong mi i bin sendem mi. . . .

“Mo Papa blong mi i bin sendem mi blong oli save leftemap mi long kros; . . . blong mi save pulum evri man i kam long mi, se olsem we ol man i bin leftemap mi, long sem fasin bae Papa i leftemap ol man, blong stanap long fored blong mi, blong kasem jajmen blong ol wok blong olgeta, sapos oli gud o sapos oli nogud” (3 Nifae 27:13–14).

Nao, laswan, ol toktok blong Momon mo Moronae we oli stap singaot i kam long yumi se: “Yufala i save se yufala i mas kam blong gat save long saed blong ol bubu blong yufala, mo sakem evri sin blong yufala mo ol rabis fasin, mo bilih long Jisas Kraes, se hem i Pikinini blong God” (Moronae 7:5). “Yes, kam long Kraes, mo stap stret gud long hem, mo tanem baksaed blong yufala long evri fasin we i no olsem blong god; mo sapos bae yufala i tanem baksaed blong yufala bakegen long evri fasin we i no olsem blong god, mo lavem God wetem evri strong blong yufala, tingting mo paoa, afta gladhat blong hem i naf blong yufala, blong tru long gladhat blong hem, yufala i save stap stret gud long Kraes; mo sapos tru long gladhat blong God yufala i stret gud long Kraes” (Moronae 10:32).

### **I Kamaot Insaed long Ol Famle**

Testemoni ia, we i long saed blong spirit, i gat paoa, i winim tingting se Jisas Kraes, i tru,



Taem Jisas Kraes i kamaot long  
Ol Man blong Nifae



Ol las toktok we i kam  
long Momon mo Moronae

i Mesaea blong promes—Pikinini blong God we Hem i bin jusum, we Hem i bin sendem long wol ia blong mekem laef bakegen long ded blong evri man i hapen, mo blong mekem evriwan we bae i sakem sin mo folem Hem i kam klin long saed blong spirit—testemoni ia, i kamaot insaed long histri blong ol famle.

Buk blong Momon i stat wetem wan famle; wan papa mo wan mama, ol boe mo ol gel we oli bin lisin long revelesen we i kam tru long papa blong olgeta we i profet, blong oli livim evri samting blong olgeta we oli gat long wol ia i stap, mo folem kaonsel blong Lod. Ol stori blong buk ia, oli fulap wetem stori blong ol papa mo mama we oli stat lukaotem blong pasem long ol pikinini blong olgeta, promes mo hop ia blong Jisas Kraes. Long wan taem, mi bin tekem, aot long ol pej blong buk ia, ol stret kaonsel we ol papa oli givim long ol boe blong olgeta—i kasem 52 pej we oli taepem. Insaed long Buk blong Momon, yumi luk olsem wanem ol papa mo mama oli bin tijim fasin blong gat fet long Kraes mo fasin blong obei long ol komanmen blong God i go long ol pikinini we oli bin stap obei stat long taem we oli smol pikinini, mo tu, i go long ol pikinini we oli mas faenem rod blong olgeta—samtaem, insaed long semfala famle ia nomo. Hem i wan lesen blong ol dei blong yumi, blong ol pikinini blong yumi, blong ol famle blong yumi.

Ol stret wok blong ol woman mo ol gel, oli no tokbaot tumas, semmak olsem we i stap wetem ol toktok blong bif. Be, sapos yumi luk i go moa bitim wanem we i stap kamaot klia, yumi luk paoa blong olgeta we i no save finis mo i stap strong kasem en. Yumi holemaet gud ol smol pat we oli tokbaot ol woman mo ol mama, olsem taem oli tokbaot ol filing blong olgeta, se oli “sofsof tumas, mo klin, mo i save brokbrok isi long fored blong God” (Jekob 2:7) o taem Hileman i tokbaot gud fasin blong yangfala ami blong hem we i olsem from ol stret mo gud mama blong olgeta:

“Oli bin obei mo folem evri toktok blong oda mo oli bin folem stret gud; yes, mo tu i bin hapen long olgeta folem fet blong olgeta; mo mi bin tingbaot ol toktok we

## TU BUK, WAN FAMLE WE I NO SAVE FINIS

**H**asban blong mi i stap wokbaot i kambak long haos taem hem i faenem wan bag long rod. Hem i sapraes se insaed i gat wan Buk blong Momon. Hem i tekem i kam long haos, i soem long mi. Hem i ridim blong smol taem mo i faenem se buk ia i gud tumas, be afta, hem i putum i stap.

Wan sot taem afta, hem i ded. Mi bin go long wan jos mo wan narawan, mo narawan mo stap lukaot blong harem gud mo mi bin wantem save sapos laef i gohed afta long ded. Fulap tingting i stap long hed blong mi, mo mi gat plante kwestin we i no gat ansa.

Nao, long rod blong mi i go long wok, mi bin luk wan buk we mi luksave se i stap long saed blong rod—Buk blong Momon. Mi tekem from se taem mi faenem buk ia, i mekem mi stat tingbaot gudfala hasban blong mi. Mi tokbaot long wan man, wanem we mi faenem, mo hem i taalem se i gud blong mi ridim.

Ol dei oli stap go, mo wan naet, mi go visitim sista blong mi, we i wan Lata-dei Sent. Ol fultaem misinari oli bin stap, mo oli bin singsing hym ia “Mi Pikinini blong God.” Mi save stret long taem ia se ol misinari oli save ansarem kwestin blong mi.

Afta we mi kasem ol lesen mo mi kasem wan testemoni, mi bin kasem baptaes. Tedei, mi save testifae wetem ful tras se Josef Smit i bin luk Papa mo Pikinini blong Hem, Jisas Kraes.

Mi biliv se i no wan mistek we hasban blong mi mo mi i bin faenem Buk blong Momon. Nomata we hasban blong mi i no save kasem baptaes long laef ia, mi glad se from ol tempol odinens, hem mo mi, mo tufala gud pikinini blong mitufala i save stap tugeta olsem wan famle blong taem we i no save finis. Buk blong Momon i mekem mifala i kam tugeta mo i bin tekem pis i kam long sol blong mifala.

**Maria Mas, Gwatemala**

*Ol stori blong buk  
ia, oli fulap we-  
tem stori blong ol  
papa mo mama  
we oli stap lukao-  
tem blong pasem  
long ol pikinini  
blong olgeta,  
promes mo hop ia  
blong Jisas Kraes.*



oli bin talem long mi se ol mama blong olgeta i bin tijim olgeta. . . .

"Nao hemia hem i bin fet blong olgeta we mi bin tokbaot; oli yang, mo ol tingting blong olgeta i stap strong, mo oli stap putum tras blong olgeta long God oltaem. . . .

". . . Ol mama blong olgeta i bin tijim olgeta, se sapos tingting blong olgeta i strong fulwan, God bae i sevem olgeta.

"Mo oli bin talemaot long mi ol toktok blong ol mama blong olgeta, oli talem: Mifala i gat tingting we i strong fulwan se ol mama blong mifala i bin save" (Alma 57:21, 27; 56:47-48).

Mi wantem invaetem yu blong tingting hevi long ol kwestin ia blong helpem yu blong putum ol tijing blong Buk blong Momon i kam long famle blong yu:

- Wanem ples long Buk blong Momon i stap tijim se ol pikinini oli nidim blong luk fasin blong stap strong mo tru mo fasin blong stret mo gud long fet blong papa mo mama blong ogleta?
- Wanem kaonsel nao, ol papa insaed long Buk blong Momon oli bin givim long ol boe blong olgeta, we yumi wantem blong serem wetem ol pikinini blong yumi?
- Wanem nao yumi lanem abaot ol hadwok blong yumi long ol pikinini blong yumi we oli no stap obe?
- Olsem wanem ol papa mo mama insaed long Buk blong Momon oli stap serem ol strong bilif blong olgeta wetem ol pikinini blong olgeta?
- Wanem nao yumi lanem abaot fet, taem fet ia i stap pas long wan jeneresen i go long narafala jeneresen?

I no gat wan samting we i moa impoten bitim fet long Lod Jisas Kraes blong serem wetem wan narafala man. Hem i mekem yumi andastanem ol jalenj blong laef ia, hapines long medel blong hadtaem, mo laef we i no save finis long wol we i stap kam.

I gat plante paoa blong wol ia we i stap pulum yumi mo ol famle blong yumi i go aot long impoten fet ia. Buk blong Momon i stap invaetem yumi mo ol famle blong yumi blong gat fet long Lod Jisas Kraes, mo i tokbaot ol prinsipol we bae i helpem ol famle blong yumi blong gat sakes.

Mi testifae se Buk blong Momon i tru, mo i wan tru samting we i bin hapen se enjel Moronae i bin givim buk ia, long Profet Josef Smit anda long daereksem blong Lod Jisas Kraes. Hem i blong dei blong yumi, blong ol pikinini blong yumi mo ol apupikinini blong yumi. Taem yumi openem buk ia evri dei wetem fet, mi promes se Spirit blong Lod bae i stap wetem yumi mo ol famle blong yumi bae oli gat blesing blong oltaem. ■

## SAMTING WE I HAPEN BIFO, SAMTING BLONG YUSUM TEDEI

O Itaem mi save faenem ol ansa long Buk blong Momon. Mi stap lanem plante samting taem mi stap stadi long hem, mo mi stap filim se mi stap jenis long sam gud wei.

I no longtaem i pas, mi bin stap tingting se bae mi mekem wanem naoia we ol sikis pikinini blong mi oli bigwan finis. Mi stap tingting long wanem nao Papa long Heven i bin wantem mi blong mekem.

Long skripja stadi blong mi we mi stap mekem oltaem, mi kam long wan long ol stori blong wo we i stap long Buk blong Momon. Singaot blong Moronae i kasem tingting blong mi, taem hem i bin stap singaotem man blong tekem aksen blong stap difendem ol famle, wetem sam moa samting (luk long Alma 46:12). Ol man blong Nifae oli bin mekem strong tingting blong protektem famle blong olgeta. Taem mi stap ridim stori ia, mi mekem desisen se, i nomata wanem i hapen, bae mi mas gat semfala stamba tingting ia long laef blong mi, blong faet from famle blong mi. Hem i bin wan kwaet naes eksperiensi.

Mi save se oli bin raetem Buk blong Momon blong taem blong yumi tedei. Mi glad tumas se mi save go ridim buk ia blong faenem rod long laef blong mi; i tru se hem i wan rel blong aean (luk long 1 Nifae 8).

Eun Jung, Koria



Fet • Famle • Help

# Sapos Yumi No Stap Gat Tu Tingting

Insaed long Buk blong Momon, yumi stap ridim abaot ol yang man we oli givim eksampol, mo oli no bin fraet, oli gat strong paoa long tingting, mo oli bin strong long bodi. "Yes, oli bin ol man we oli ones mo oli tru, from we ol papa mo mama blong olgeta i bin tijim olgeta blong holem ol komanmen blong God mo blong wokbaot stret long fored blong hem" (Alma 53:21). Olgeta fetful yang man ia oli bin givim ona long mama blong olgeta—long eksampol blong olgeta mo long tija blong olgeta.

Ol mama blong ol soldia blong Hileman oli bin stap laef long wan taem we i no semmak long hemia blong yumi. Situesen blong olgeta i had mo i fulap long denja, mo oli bin askem ol yut blong oli difendem fridom blong bodi mo spirit blong olgeta. Tedei, yumi stap long wan wol we yumi stap "Olgeta ya we yumi stap faet agens long olgeta long laef blong yumi, oli no man. Yumi stap faet agens long ol devel we oli stap olbaot long wol ya. Hemia ol lida blong olgeta, mo olgeta we oli gat paoa, mo ol jif blong olgeta we oli stamba blong ol fasin blong tudak blong wol ya" (Efesas 6:12).

Ol taem blong jaleni oli stap singaot blong i mas gat ol strong papa mo mama mo gudfala eksampol we i stap tijim trutok we ol soldia blong Hileman oli bin save long hem: "tingting blong olgeta i strong fulwan, [se] God bae i sevem olgeta" (Alma 56:47). Blong stap tijim mo soem eksampol blong trutok ia tedei, i nidim blong yumi mas lukaotgud tu long hem. Be, yumi no nid blong fraet. Taem yumi save huia yumi, mo huia hem i God, mo yumi bin mekem ol kavenan wetem Hem, yumi—olsem ol mama blong ol soldia ia—bae i stap olsem wan bigfala paoa blong mekem gud.

I luk olsem se wanwan long ol 2060 soldia blong Hileman, mama blong olgeta i bin gat paoa long laef blong olgeta. Be ol mama ia oli no bin mekem samting olgetawan. Tugeta, wetem ol man mo woman we oli stret mo gud, ating ol mama ia oli bin joenem fet mo eksampol blong olgeta blong tijim paoa blong ol kavenan. Ol yang pipol blong taem ia oli bin andastanem kavenan ia we papa mo mama blong olgeta i bin mekem blong nomo go faet bakegen. Mo nomata i luk se bae i no posibol, wan Papa long Heven we i gat lav i bin openem wan wei blong ol papa mo mama ia oli kipim kavenan blong olgeta—mo blong oli holem taet fridom blong olgeta (luk long Alma 56:5–9). Yumi, semmak, yumi mas ona long ol kavenan blong yumi blong mekem se ol pikinini mo ol yut—ol

Stadi long toktok ia, mo olsem we i stret, toktok raon long hem wetem ol sista we yu stap visitim. Yusum ol kwestin blong helpem yu blong mekem ol sista blong yu oli kam strong moa mo blong mekem Rilif Sosaeti i kam wan aktiv pat long laef blong yuwan.

## Wanem Mi Save Mekem?

**1. Olsem wanem nao mi save helpem ol sista blong mi blong oli luksave, mo blong oli tekem aksen wetem paoa we oli gat, blong lidim tingting blong jeneresen ia we i stap kam antap?**

**2. Wanem inspreesen nao bae mi faenem insaed long Buk blong Momon blong ansarem ol jaleni we mi stap fesem tedei?**

Blong kasem moa infomesen, go long [www.reliefsociety.lds.org](http://www.reliefsociety.lds.org).

pikinini blong yumiwan mo olgeta we oli stap insaed long ol wod, ol branj, ol ples raonabaot, mo ol komuniti—oli andastanem mo sapotem fasin blong kipim ol kavenan.

Taem yumi ona long ol kavenan blong yumi, Papa long Heven i mekem wan wei i rere long yumi. Long laef, yumi mas folemgud evriwan ol kavenan blong yumi. Eksampol, yumi save mekemgud blong stap prea, blong stap stadi long ol skripja, blong gat wan tempol rekomen we i laef, blong dresap gud, blong ona long Sabat dei. Taem yumi mekem olsem, ol pikinini blong yumi bae oli save mo talem: "Mifala i gat tingting we i strong fulwan [se] ol mama blong mifala i bin save" (Alma 56:48).

Ol Lata-dei Sent woman we oli stap luksave se paoa blong olgeta i kam long Atonmen blong Lod, oli no stap givap long ol taem we i had tumas mo ol taem we i strong tumas. Olsem ol woman we oli kipim kavenan, yumi mas kam ol top woman blong stap holemtaet, stap fidim, stap protektem ol pikinini mo ol yut, blong mekem se wan dei, bae yumi save talem abaot jeneresen ia we i stap kam antap: "Neva mi bin luk wan fasin blong no save fraet we i bigfala olsem" (Alma 56:45). ■

*Juli B. Bek, Rilif Sosaeti jeneral presiden.*

## I Kamaot long Ol Skripja

Alma 53; 56–58



# TU TAOSEN YANG STRONG SOLDIA

*Wetem strong tingting*     ♩ = 96–100

Toktok i kam long Boni Hat Merei  
Miusik i kam long Janis Kap Peri



2. Grup blong ol yang bra - ta ia, ma - ma blong ol i tij Blong  
3. We - tem Hi - le - man li - da, grup blong ol bra - ta ia I  
4. Tu tao - sen yang strong sol - dia, we - tem wan strong ting - ting, O -



li an - sa long sing - aot ia: O hu i stap mo faet? God  
tras - tem God ol - taem, stap tru long wok mo ting - ting, tu From  
joen wan long big - fa - la fet, mo no fraet mo sta - nap. O -  
li faet we - tem pao' blong God, mo no gat wan i lus. Fet



i stap we - tem yu - mi; i tok nao yu - mi muv. Luk  
God i pro - tek - tem ol; fet blong ol i gat praes. O -  
li no wan - tem blad i ron be wan - tem stap fri, O -  
i me - kem o - li strong; pao' blong ol i big - wan. O -



o - li no fraet blong ded be ting - ting blong ol i strong.  
li sa - ve ma - ma i sa - ve; o - li tras - tem Lod.  
li faet from laef mo fri - dom, from God mo fa - mi - li.  
li faet we - tem strong pa - oa, from God i saed long ol.



© 2009 i kam long Boni Hat Merei mo Janis Kap Peri. Oli holem evri raet.

Singsing ia oli save kopi long hem blong yusum long jos o long hom be i no blong mekem mane wetem.

Notis ia i mas stap wetem wanwan kopi blong singsing ia.

Alma 53; 56–57

# Ol Tijing blong Taem blong Yumi



## Lod I Gat Tingting long Yumi

“Mi stap tingbaot ol toktok blong Lod we i stap long buk blong Ita insaed long Buk blong Momon. Hem i talem se ‘yu no save krosem bigfala dip solwota ia sapos mi no mekem rere yufala agensem ol wef blong solwota, mo ol win we i bin go aot, mo ol wota we i bin kam antap bigwan’ [Ita 2:25]. Ol brata

mo sista blong mi. Hem i bin mekem yumi rere. Sapos yumi mekem folem ol toktok blong Hem mo laef folem ol komammen, bae yumi save laef mo gotru long taem ia we man i tingting nating long samting mo taem ia we i nogud—wan taem we yumi save komperem long ol wef, mo ol win, mo ol bigfala wota we i save prapa spolem ol samting. Hem i gat tingting long yumi oltaem. Hem i lavem yumi mo bae i blesem yumi taem yumi mekem wanem we i raet.”

**President Thomas S. Monson, “Closing Remarks,” *Liahona*, Nov. 2009, 109.**



## Jisas Hem I Kraes

“Buk blong Momon i testemoni we i gat moa paoa, we oli raetem mo yumi gat we i talem se Jisas, Hem i Kraes. Wanem nao Nifae i talem se hem i stamba blong kasem Tabu Spirit? Fet long Lod Jisas Kraes. Yu ting se sapos yu ridim Buk blong Momon wanwan taem bae i mekem se yu gat fet long Lod Jisas Kraes? Mi no ting se bae yu tingting olsem sapos yu ridim gud Nifae.

Hem i talem se buk ia i ‘presen blong God long olgeta we i wok strong oltaem blong lukaotem hem.’ Wok strong oltaem, i minim blong stap mekem oltaem. Mo i minim tu blong stap tingting hevi mo stap prea. Mo blong stap prea bae i minim tu blong askem strong blong save trutok. Sapos yumi no mekem kasem mak ia, bae i olsem se yumi no wok strong oltaem. Sapos yumi no mekem kasem mak ia, i olsem se yu mo mi i no mekem inaf.”

**President Henry B. Eyring, Fas Kaonsela long Fas Presidensi, “Going Home,” long *Brigham Young University 1986–87 Devotional and Fireside Speeches* (1987), 77–78.**



## Wan Ofisol Toktok we I Talemaot Gospel

“Ol rus pat blong mesej blong gospel oli stap insaed long evriwan long ol tabu skripja, be plante i klia gud long yumi insaed long Buk blong Momon, mo insaed long ol revelesen we i go long Profet Josef Smit. Long ples ia, Jisas Hemwan i talemaot klia dok-trin blong Hem mo gospel blong Hem, we ol pikinini blong God oli mas folem blong gat laef we i no save finis’ (D&C 14:7).”

**President Dieter F. Uchtdorf, Seken Kaonsela long Fas Presidensi, “Have We Not Reason to Rejoice?” *Liahona*, Nov. 2007, 19.**

**Y**umi lanem long ol profet blong bifo se insaed long Buk blong Momon i gat “ol samting we i klia mo gudgudfala” we oli bin holemtaet i stap blong tijim yumi long taem blong yumi (luk long 1 Nifae 13:40; 19:3). Ol trutok ia oli mekem samting i klia mo mekem yumi andastanem ful gospel blong Jisas Kraes mo i helpem ol studen blong Buk blong Momon blong oli gotru long ol jalenj blong laef wetem hop mo paoa. Ol toktok we oli stap andanit ia, we oli kam long ol profet mo aposol blong tedei, oli testifae long ol impoten tijing ia.



### Baptaes blong Ol Smol Pikinini

“[Sam oli biliv] se ol smol pikinini, oli bon long sin mo oli kam long wol ia wetem sin. Doktrin ia i no tru!

“Sapos mi bin lanem trutok,’ Momon i raetem, ‘i bin gat ol rao long medel blong yufala long saed blong baptaes blong ol smol pikinini blong yufala’ (Moronae 8:5).

“Hem i talem se rao blong olgeta i ‘wan bigfala rong’ mo i bin raetem: . . .

“Lisin long ol toktok blong Kraes, Ridima blong yu, Lod blong yu mo God blong yu. Luk, mi bin kam long wol i no blong singaotem

olgeta we i stret be olgeta we i sin blong sakem sin; olgeta we i no sik i no nidim dokta, be olgeta we i sik; from samting ia, ol smol pikinini i klin, from oli no save mekem sin; from samting ia, panis blong Adam i kamaot long olgeta tru long mi, mekem se i no gat eni paoa ova long olgeta; . . .

“Mo long fasin ia Tabu Spirit i bin soemaot toktok blong God long mi; from samting ia, boe blong mi we mi lavem tumas, mi save se i wan tru fasin blong jik long fored blong God, blong yufala i mas baptaesem ol smol pikinini” (Moronae 8:7–9). . . .

“Ridim ful toktok blong hem. Hem i tru doktrin.”

**President Boyd K. Packer,  
Presiden blong Kworam  
blong Olgeta Twelef  
Aposol, “Little Children,”  
*Ensign*, Nov. 1986, 17.**



### Ol Woning we I Kam long Buk blong Momon

“Sam long ol lesen we yumi lanem long Buk blong Momon, hem i risen mo wanem i kamaot afta long wo mo i kamaot folem wan situesen. Hem i tokbaot ol nogud samting we i stap mo ol denja blong ol sikret plan, we oli stap mekemap blong kasem paoa mo gat kontrol ova long ol pipol. Hem i tokbaot se i tru we Setan i stap mo i talemaot sam long ol fasin we hem i stap yusum. Buk i givim advaes long yumi long stret fasin blong yusum ol rij samting blong yumi. Hem i tokbaot long yumi abaot ol klia mo gud trutok

blong gospel mo we Jisas Kraes i tru mo i kam long heven, mo abaot sakrifaes blong Hem we i pemaot evri man kaen. Hem i talemaot long yumi abaot kam tugeta long haos blong Isrel long ol las dei. Hem i talem long yumi abaot stamba tingting mo ol prinsipol blong misinari wok. Hem i givim woning long yumi agensem hae tingting, fasin blong no wantem save samting, fasin blong pusumbak, mo ol denja blong ol giaman kastom, fasin blong gat tufes, mo fasin blong no folem jastiti.

“Naoia, i stap long yumi blong stadi long Buk blong Momon mo lanem ol prinsipol we oli stap insaed, mo yusum olgeta long laef blong yumi.”

**Elda L. Tom Perry blong Kworam blong Olgeta Twelef Aposol, “Blessings Resulting from Reading the Book of Momon,” *Liahona*, Nov. 2005, 8.**

### TU STIK I KAM WAN

**K**olosap stat long taem we mi bon, mi bin gat wan Baebol, be yet, kasem taem nomo we mi kasem wan kopi blong Buk blong Momon, nao mi kam blong save gud evri prinsipol blong gospel. Mi bin faenemaot se ful gospel blong Jisas Kraes, wan i kasem nomo wetem save we i stap long nambatu “stik” (luk long Esekiel 37:15–17). Taem tufala i kam tugeta, long mi, oli givim wan eksperiens we i jenism laef blong mi—mi andastanem moa huia mi mo wanem nao mi save kasem blong kam pat blong famle blong God we i no save finis. Tufala buk ia we i joen, we profesi i tokbaot—“mi joenem blong mekem wan stik nomo we mi holem long han blong mi” (ves 17)—i kam posibol from tufala fetful misinari sista i bin kea mo tufala i bin livim wan kopi blong nambatu stik i stap blong mi.

Bifo, mi bin stap wokbaot wetem laet blong kandel; naoia, evri ples mo smol hol i kasem laet blong ful blesing blong gospel. Mi filim se mi kasem wan niu lis blong laef.

**Ari Sala, Britis Kolombia,  
Kanada**

## WAN FAMLE I BLONG STAP BLONG OLTAEM

M*i bin ridim Buk blong Momon stat long taem we mi baptaes long 1995. Be kasem taem mi mared nomo stori blong wokbaot blong ol boe blong Lihae we oli go kam long Jerusalem i gat mining long mi, hemia long saed blong famle blong mi.*

I luk olsem se Lod i bin wantem blong Lihae i gat wan famle we i stap blong oltaem. Fastaem, hem i bin talem

long Lihae blong livim evri samting i stap biae mo i sevem famle blong hem *we i stap mo tekem olgeta i go long graon blong promes.* Taem oli bin stap yet long ples we i no gat man long hem, Lod i bin talem long Lihae blong sendem ol boe blong hem oli gobak blong karem ol histri blong ol memba blong famle blong *bifo.* Afta long hem, Hem i bin sendem olgeta i go tekem Ismael mo ol gel blong hem. Hemia, i blong mekem *fiuja* famle blong hem i rere.

*Ol testemoni abaot  
Buk blong Momon  
we i kam long ol  
nara memba blong  
Kworom blong Ol-  
geta Twelef Aposol,  
yu save faenem  
olgeta insaed long  
magasin ia long ol  
pej 10, 28, 32, 38,  
mo 80.*



**Evri Samting Bae  
I Kambak**

“Wanem stret hem i laef bakegen long ded, oli tokbaot gud long Buk blong Momon. Profet Amulek i bin tijim:

“Ded blong Kraes bae i tekemaot ol rop blong ded ia blong bodi, blong mekem se evriwan bae i gi-rap long ded ia blong bodi.

“Spirit mo bodi bae oli kam tugeta bakegen long stret fom blong hem, ol han, ol leg mo ol joen bae oli kam tugeta bakegen long ol stret ples blong olgeta, olsem we yumi stap naoia long taem ia; . . .

“Nao, kambak ia bae i hapen long evriwan, ol olfala

tugeta wetem ol yangfala, ol slef tugeta wetem olgeta we oli fri, ol man tugeta wetem ol woman, ol nogud man tugeta wetem olgeta we i stret; mo tu bae i no save gat wan pis hea blong wan wan hed blong olgeta we i lus; be evri samting bae i kambak long ol stret ples blong olgeta’ (Alma 11:42–44).

“Alma i bin tijim tu se long laef bakegen long ded ‘evri samting bae i kambak long ol stret ples blong olgeta’ (Alma 40:23). . . .

“Hem i gud blong gat pis long tingting blong save se evriwan we oli bin gat evri samting long laef ia . . . bae oli laef bakegen long ded mo evri samting bae i stap ‘long ol stret ples blong ogleta.’”

Elder Dallin H. Oaks blong Kworom blong Olgeta Twelef Aposol, “Resurrection,” *Liahona*, Julae 2000, 17.



**Ol Denja blong Ol  
Sikret Plan**

“Buk blong Momon i tijim se ol sikret plan blong kilimded man i stap olsem wan bigfala jalenj, i no long wanwan man mo woman nomo mo ol famle,

be tu, long wan ful pipol. Tedei, wanem i stap insaed long ol sikret plan oli ol gang, ol grup blong drag, mo ol famle we oli stap oganaesem rod blong kilimded man. Ol sikret plan blong taem blong yumi oli wok long sem fasin olsem long

taem blong ol stilman blong Gadianton. . . . Sam long ol stamba tingting blong olgeta i blong ‘kilim man i ded, mo stil long taem blong faet, mo stil, mo mekem ol fasin blong stap slip olbaot mo evri kaen nogud fasin, agensem ol loa blong kantri blong olgeta mo tu ol loa blong God blong olgeta’ [Hileman 6:23].

“Sapos yumi no lukaot gud, ol sikret plan blong tedei bae i save kam strong mo gat paoa kwiktaem mo fulwan olsem we i bin hapen long taem blong Buk blong Momon.”

Elder M. Russell Ballard blong Kworom blong Olgeta Twelef Aposol, “Standing for Truth and Right,” *Ensign*, Nov. 1997, 38.

Blong kriem wan rop we bae i fasem famle blong yumi we i no save finis we i stap naoia, we i bin stap bifo, mo hemia we bae i kam long fiuja, hem i wan impoten responsabiliti we mi nidim blong holemtaet gud—semmak olsem we Lihae i bin mekem. Ating ol eksperiens ia oli bin helpem Lihae blong kasem visen blong tri blong laef mo kam blong andastanem se lav blong God, man i mas tijim insaed long wan famle we i no save finis.

**Salote Malani Maewiriwiri, Hawae, YSA**



### Stretem Ol Jalenj blong Laef

“Buk blong Momon i tekem ol mesej we heven i putum i stap long ples blong soem olsem wanem blong stretem wok blong ol giaman kastom, mo blong soem olsem wanem blong kasem wan ful gud laef. Hem i tijim olsem wanem blong stretem ol problem mo ol jalenj we yumi stap fesem tedei. . . [Lod] i bin givim wan rod blong stretem ol bigfala rong blong laef, be ol toktok ia blong lidim yumi bae oli nating nomo sapos oli lok i stap nomo insaed long wan buk we i no open.”

Elda Richard G. Scott blong Kworom blong Olgeta Twei-lef Apostol, “True Friends That Lift,” *Ensign*, Nov. 1988, 76.



### I Mekem Yumi Tingbaot Ol Kavennan blong Yumi

“Buk blong Momon imekem yumi tingbaot oltaem se baptaes blong yumi i wan kavenan blong ‘stanap olsem ol witnes blong God [mo kingdom blong Hem] evri taem mo long evri samting, mo long evri ples we yufala i save stap long hem, go kasem ded, mekem se God i save pemaot yufala, mo bae oli kaontem yufala wetem olgeta ia blong fasfala laef bakegen, mekem se yufala i save kasem laef we i no save finis’ (Mosaea 18:9; oli ademap italic).” ■

Elda Robert D. Hales blong Kworom blong Olgeta Twei-lef Apostol, “The Covenant of Baptism: To Be in the Kingdom and of the Kingdom,” *Liahona*, Jenuware 2001, 7.



### Ol Blesing blong Fasin blong Obei

“Long plante ples insaed long Buk blong Momon, ol pipol oli bin kasem promes se bae oli kam antap long ples blong olgeta sapos oli kipim ol komanmen [luk long 1 Nifae 2:20; 2 Nifae 4:4]. Promes ia, plante taem i kam wetem woning ia se sapos oli no kipim ol komanmen blong God, bae oli kate-maot olgeta long ples we Hem i stap long hem [luk long Alma 36:30].” ■

Elda Quentin L. Cook blong Kworom blong Olgeta Twei-lef Apostol, “Hope Ya Know, We Had a Hard Time,” *Liahona*, Nov. 2008, 104.

## MUV FORED WETEM LAET


Long japta 2 long buk blong Ita, yumi ridim se brata blong Jared i bin wari from se bae i no gat laet long sip blong olgeta. Taem hem i bin askem long Lod abaot samting ia, Lod i ansa long hem wetem wan kwestin: “Wanem nao yu wantem se mi mas mekem blong yu blong mekem se yufala i save gat laet?” (ves 25).

Mi bin tingting plante long wei we brata blong Jared i bin ansa long kwestin blong Lod. Faswan, hem i bin klaem long wan maonten, mo “hem i bin meltem wan ston, blong mekem sikstin smol ston” (Ita 3:1). Hem i tekem ol ston ia i go long top blong maonten mo long ples ia, hem i bin prea. Hem i stat blong mekem tingting blong hem i stap daon long fored blong Lod. Hem i bin askem blong Lod i gat sore, mo hem i bin luksave paoa we Lod i gat blong ansarem prea blong hem. Afta, hem i bin soemaot fet blong hem taem hem i talem: “Mifala i save se yu yu save soemaot bigfala paoa” (Ita 3:5). Brata blong Jared i bin askem Lod blong tajem ol ston blong mekem se oli save laet insaed long sip.

Toktok ia i bin jenisim wei we mi stap prea. Bifo, mi askem oltaem, “Papa, wanem nao yu wantem mi blong mekem?” Be i tru se plante situesen i nidim blong mi mas tingting smol fastaem, blong mi lukluk gud long ol risos we mi gat, blong mi mekem wan plan, mo afta, go long papa mo askem Hem sapos plan ia i oraet—afta, mi prea blong merikel we miwan mi no save mekem i happen, bae i mas happen.

Elena Gomes de Santurion, Yurugwe





I Kam long Presiden  
Esra Taft Benson  
(1899–1994)

# BUK BLONG MOMON Ki Ston blong Relijin blong Yumi

*Esra Taf Benson i kam nambatetin Presiden blong Jos long 10 Novemba 1985. Oli tingbaot hem from strong testemoni blong hem long paoa blong Buk blong Momon mo from we hem i tokbaot oltaem se i impoten blong stadi long skripja evri dei, mekem misinari wok, mo tijim gospel. Yia ia i makem 25 yia blong toktok ia we i bin kamaot long jeneral konfrens blong Oktoba 1986.*

**O**l brata mo sista blong mi we mi laekem tumas. Tedei mi wantem blong tokbaot wan long ol presen we i moa impoten we oli givim long wol long taem tedei. Presen ia we mi stap tingting long hem, i moa impoten long eni niu kriesen we i kamaot long indastri o teknoloji. Hem i wan presen we valiu blong hem i moa bigwan long ol man bitim ol gudfala niu samting we oli faenem long eria blong helt. Hem i moa hevi long man bitim eni dvelopmen long saed blong fasin blong travel long plen o travel i go long spes. Mi stap tokbaot presen we i Buk blong Momon, we i kam long ol man 156 yia i pas.

Presen ia, han blong Lod i bin mekem i rere ova long wan taem blong moa long wan taosen yia, mo afta Hem i bin haedem blong i stap gud mo oli no spolem blong jeneresen blong yumi i save yusum. Ating i no gat wan samting we i testifae klia moa long hamas buk blong skripja ia blong tedei i impoten bitim wanem we Lod Hemwan i talem abaot buk ia.


Tru long maot blong Hem, Hem i bin talem witnes blong Hem se buk ia (1) i tru (luk long D&C 17:6), (2) i tekem trutok mo toktok blong Hem (luk long



D&C 19:26), (3) oli transletem wetem paoa we i kam long heven (luk long D&C 20:8), (4) i tekem ful gospel blong Jisas Kraes (luk long D&C 20:9; 42:12), (5) i kam tru long insperesen mo ol tijing blong ol enjel oli konfemem (luk long D&C 20:10), (6) i givim pruf se ol tabu skripja oli tru (luk long D&C 20:11), mo (7) olgeta we oli kasem buk ia wetem fet bae oli kasem laef we i no save finis (luk long D&C 20:14).

Wan seken strong testemoni long hamas Buk blong Momon i impoten i blong luk long wanem taem stret Lod i mekem se buk ia i kambak long ful taem ia blong Restoresen. Wan samting nomo we i bin kam fastaem, hem i Fas Visen. Long bigfala taem ia, Profet Josef Smit i bin lanem stret se God i olsem wanem, mo se God i gat wan wok blong hem i mekem. Buk blong Momon i kam afta long hemia.

Tingting long hemia, long wei ia se, hemia i minim wanem moa? Buk blong Momon i kam biffo we prishud i kambak. Oli bin publisim sam dei biffo we Jos i bin oganaes. Olgeta Sent oli bin kasem Buk blong Momon blong oli ridim biffo oli bin kasem ol revelesen we i tokbaot ol bigfala doktrin olsem ol trifala digri blong glori, celestial



## WAN PROFET I STAP TESTIFAE

"Buk blong Momon i toktok blong God. Hem i wan seken witnes abaot Kraes we i gat paoa long hem. Mo i tru, evri man we i bilih mo oli lavem Ridima, bae oli akseptem wan moa pruf we Hem i kam long heven.

"Buk ia we i kam tru long insperesen, i no jenesis. I no gat ol transleta o man wetem defren tingting long saed blong religijn i jenism. Be hem i kam long wol, we hem i klin gud mo i kam stret long ol man blong raetem histri mo putum tugeta histri. Buk ia, i no stap fesem jajmen—be olgeta we oli stap ridim, yes."

President Spencer W. Kimball (1895–1985), *The Teachings of Spencer W. Kimball*, ed. Edward L. Kimball (1982), 133.

mared, o wok blong olgeta dedman. Buk i kam bifo oli bin oganaesem ol kworam mo Jos. Yu no ting se hemia i stap talem wan samting abaot fasin we Lod i lukluk long tabu wok ia?

Taem yumi luksave olsem wanem Lod i stap filim abaot buk ia, bae i no mas wan sapraes long yumi se Hem i stap givim tu ol tabu woning long olsem wanem nao yumi kasem buk ia. Afta we Hem i talem se olgeta we oli kasem Buk blong Momon wetem fet, mo stap mekem ol stret mo gud wok bae oli kasem wan hat blong king blong glori we i no save finis (luk long D&C 20:14), nao Lod i stap talem woning ia se olgeta we oli mekem hat blong olgeta i strong mo oli no stap bilif, bae oli kasem wan panismen (luk long D&C 20:15).

Long 1829, Lod i bin givim woning long olgeta Sent se oli no mas pleiplei wetem ol tabu samting (luk long D&C 6:12). I tru we Buk blong Momon i wan tabu samting, mo yet, plante oli stap pleiplei wetem, o long nara toktok, oli no tingting hevi long hem, mo stap tekem olsem se i no wan impoten samting.

Long 1832, taem sam long ol fas misinari oli bin kambak long ples we oli go wok long hem, Lod i bin tok strong long olgeta from se oli no tekem Buk blong Momon i hevi. Olsem wan risal blong fasin ia, Hem i talem se tingting blong olgeta i kam tudak. Taem oli no tingting hevi long tabu buk ia i no mekem nomo se oli lusum laet we i stap long olgeta, be tu, i mekem se ful Jos i stap kasem panismen, wetem evri pikinini blong Saeon. Mo afta, Lod i talem se bambae oli stap anda long panismen ia kasem taem we oli sakem sin mo oli tingbaot niu kavenan, we i Buk blong Momon (luk long D&C 84:54–57).

Ating from we yumi gat Buk blong Momon wetem yumi blong ova long wan handred yia mo haf i mekem se i no impoten tumas long yumi tedei? Yumi stap tingbaot o no, niufala kavenan ia we i Buk blong Momon? Insaed long Baebol, yumi gat Ol' Testeman mo Niu Testeman. Toktok ia *testeman* hem i Inglis toktok blong wan toktok

blong Gris we oli save transletem tu olsem *kavenan*. Yu ting se hemia nao wanem we Lod i minim taem Hem i bin singaotem Buk blong Momon se hem i "niu kavenan"? I tru, hem i wan nara testeman o witnes abaot Jisas. Hemia i wan long ol risen from wanem yumi bin ademap, i no longtaem i pas, ol toktok ia "Wan Nara Testeman blong Jisas Kraes" long taetol blong Buk blong Momon.

Sapos Lod i bin tok strong long olgeta Sent bifo from we oli stap tekem Buk blong Momon i nating nomo, bae yu ting se bae yumi no kasem wan panismen we i semmak sapos yumi mekem semmak? Lod Hemwan i testifae se buk ia i impoten long taem we i no save finis. Olsem wanem? Bae wan smol namba olsem yumi nomo bae i mekem se ful Jos i stap anda long panismen from we yumi stap pleiplei wetem ol samting we oli tabu? Bambae yumi talem wanem long Jajmen dei taem bae yumi stanap long fored blong Hem mo fesem ae blong Hem we i luk yumi mo askem sapos yumi stap long medel blong olgeta we oli talem se oli fogetem niu kavenan?

I gat tri bigfala risen from wanem ol Lata-dei Sent oli mas mekem stadi blong Buk blong Momon i kam olsem wan samting blong mekem long ful laef.

*Faswan* i we Buk blong Momon i ki ston blong religijn blong yumi. Hemia toktok blong Profet Josef Smit. Hem i testifae se "Buk blong Momon i moa stret long eni narafala buk long wol, mo i ki ston blong bilif long God blong yumi."<sup>1</sup> Wan ki ston i ston we i stap long medel blong wan ak. Hem i holem evri nara ston i stap long ples blong olgeta, mo sapos yu karemaot, ak ia i foldaon.

I gat tri wei we Buk blong Momon i ki stron blong religijn blong yumi. Hem i ki ston long witnes blong yumi long Kraes. Hem i ki ston blong doktrin blong yumi. Hem i ki ston blong wan testimoni.

Buk blong Momon i ki ston blong witnes blong yumi long Jisas Kraes, we Hemwan i konaston blong evri samting we yumi mekem. Hem i wan witnes we i talem strong mo klia se Jisas i laef. I no olsem Baebol, we i bin pas tru long ol jeneresen blong ol man



we oli bin kopi long hem, ol transleta, mo ol man blong religijn we oli nogud we oli bin jenism toktok blong hem; Buk blong Momon, hem i kam stret long man we i bin raelem i go long man we i ridim, hemia long wan translesen step nomo. Nao testemoni blong buk ia abaoat Masta i klia, i strong, i klin evriwan, mo i gat ful paoa. Be hem i mekem moa. Plante long Kristin wol tedei, oli stap sakemaot Sevya olsem wan hae man. Oli stap gat kwestin long saed blong merikel blong taem we Hem i bon, stret laef blong Hem, mo i tru we Hem i bin laef bakegen long ded. Buk blong Momon i stap tijim, wetem ol klia toktok we i no gat tu mining abaoat trutok blong evri samting ia. Hem i givim tu wan ful eksplenesen long doktrin blong Atonmen. I tru, buk ia we i kam long heven i wan ki ston blong talemaot long wol se Jisas Hem i Kraes.<sup>2</sup>

Buk blong Momon i ki ston tu blong doktrin blong Laef Bakegen long Ded. Olsem we mi bin talem bifo, Lod Hemwan i bin talem se Buk blong Momon i tekem ful gospel blong Jisas Kraes (luk long D&C 20:9). Hemia i no minim se hem i gat evri tijing, evri doktrin we bae oli talemaot. Be, hem i minim se insaed long Buk blong Momon, bae yumi faenem

*Insaed long Buk  
blong Momon,  
bae yumi faenem  
ful doktrin we  
yumi nidim blong  
fasin blong sevem  
yumi. Mo oli tijim  
i klia mo simpol  
blong mekem se ol  
pikinini tu oli save  
lanem ol wei blong  
fasin blong sevem  
man mo blong  
kam olsem wan  
god.*


ful doktrin we yumi nidim blong fasin blong sevem yumi. Mo oli tijim olgeta i klia mo i simpol blong mekem se ol pikinini tu oli save lanem ol wei blong fasin blong sevem man mo kam olsem wan god. Sapos i no gat hemia, plante long wanem we oli stap tijim long ol nara skripja bae oli no klia tumas mo i no gud tumas.

Laswan, Buk blong Momon i ki ston blong testemoni. Semmak olsem we ak i foldaon sapos oli karemaot ki ston, bae ful Jos i stanap o foldaon wetem trutok blong Buk blong Momon. Ol enemi blong Jos oli andastanem samting ia i klia. From hemia nao oli mekem fulap samting blong traem sakemaot Buk blong Momon; from we sapos oli save sakemaot, Profet Josef Smit i go wetem tu. Mekem tu se bae yumi no save klemem ol ki blong prishud, mo revelesen, mo Jos we i kambak. Be semmak, sapos Buk blong Momon i trumo plante milian i testifae naoia se oli gat wan witnes blong Spirit se buk i tru—nao wan i mas akseptem ol klem we yumi mekem abaoat Restoresen mo evri samting we i kam wetem.

Yes, ol brata mo sista we mi laekem tumas. Buk blong Momon i ki ston blong religijn blong yumi—ki ston blong testemoni blong yumi, ki ston blong doktrin blong yumi, mo ki ston blong witnes blong Lod mo Sevya blong yumi.

*Nambatu* bigfala risen from wanem yumi mas mekem Buk blong Momon i senta blong stadi blong yumi, hem i from we oli bin raelem blong taem blong yumi. Ol Man blong Nifae oli neva gat buk ia; mo Ol Man blong Leman tu long taem bifo. Hem i from we hem i blong yumi. Momon i bin raelem kolosap long en blong laef blong ol pipol blong Nifae. Folem insperesen we i kam long God, we i luk evri samting stat long stat, hem i bin raelemsot handred yia blong histri, i bin jusum ol stori, ol toktok, mo ol samting we i bin hapen we bae i helpem gud yumi.

Wanwan long ol bigfala man we oli bin raelem Buk blong Momon oli bin testifae se hem i stap raet i go long ol fijuja jeneresen. Nifae i bin talem: “Lod God i bin promes long mi se ol samting ia we mi raelem bae oli kipim mo sevem, mo givim daon long ol pikinini blong



## WAN PROFET I STAP TESTIFAE

"Buk blong Momon i wan tabu rekod we i tekem ol infomesen we oli no save faenem long wan narafala buk. Lod i bin komandem yumi blong serem wetem evriwan long ol pikinini blong Hem, ol trutok ia blong Gospel we i no gat en, we i kamaot blong mekem oli rere blong kasem wan ples long Selestial Kingdom. . . .

"Mi gat fulap glad long hat blong mi blong save se evri man we bae i ridim Buk blong Momon wetem prea; evri man we bae i wantem blong save sapos buk ia i kam long God o no, i gat promes ia, we i no kam long Josef Smit o eni man we i stap laef, be hem i gat promes we i kam long Papa long Heven se bambae oli save stret se buk ia i kam long God."

President George Albert Smith (1870–1951), long Conference Report, Apr. 1936, 13–14, 15.

mi, long wan jeneresen i go long narafala jeneresen," (2 Nifae 25:21). Brata blong hem, Jekob, we i bin kam afta long hem, i bin raetem ol semfala toktok: "From [Nifae] i bin talem se bae oli raetem histri blong ol pipol blong hem long ol narafala buk blong hem, mo se mi mas sevem ol buk ia mo pasem i go daon long ol pikinini blong mi, stat long wan jeneresen i go long narafala jeneresen (Jekob 1:3). Inos mo Jerom, tufala i bin talem se tufala tu i stap raet, i no blong ol pipol blong olgeta, be blong ol fiuja jeneresen (luk long Inos 1:15–16; Jerom 1:2).

Momon hemwan i bin talem: "Yes, mi toktok long yufala, yufala smol haf blong laen blong Isrel we i laef yet" (Momon 7:1). Mo Morona, las man we i bin raet, i bin luk dei mo taem blong yumi. Hem i talem se: "Lod i bin soem long mi, ol bigfala mo gudfala samting long saed blong samting we i mas kam klosap, long dei ia, taem we ol samting ia bae i kamaot long medel blong yufala.

"Luk, mi toktok long yufala olsem se yufala i stap long ples ia, be yufala i no stap. Be luk, Jisas Kraes i bin soem yufala long mi, mo mi save ol wok blong yufala" (Momon 8:34–35).

Sapos oli bin luk dei blong yumi mo oli bin jusum ol samting we bae i impoten moa long yumi, yufala i no ting se long fasin ia nao bae yumi mas stadi long Buk blong Momon? Yumi mas askem oltaem long yumi se: "From wanem Lod i bin givim insperesen long Momon (o Morona o Alma) blong putum hemia insaed long rekod? Wanem lesen nao mi save lanem aot long hemia blong helpe mi blong laef long dei ia mo taem ia?"

Mo i gat wan eksapol mo afta wan moa eksapol long olsem wanem ansa i kam long kwestin ia. Eksapol, long Buk blong Momon, yumi faenem paten blong stap rere from Seken Kaming. Wan bigfala pat blong buk i lukluk nomo long sam yia stret bifo Kraes i go long Amerika. Taem yumi stadi gud long taem ia, yumi save faenem from wanem sam oli bin lus long ol strong jajmen we i bin kam bifo Hem i bin kam, mo wanem i tekem ol narawan oli stanap long tempol

long graon blong Baontiful (Plante) mo oli pusum han blong olgeta long ol mak blong han mo leg blong Hem.

Aot long Buk blong Momon, yumi lanem olsem wanem ol disaepol blong Kraes oli bin laef long ol taem blong wo. Aot long Buk blong Momon, yumi luk ol nogud wok blong ol sikret plan we oli tokbaot klia mo mekem man i seksek. Insaed long Buk blong Momon, yumi faenem ol lesen we i stretem fasin blong gat hadtaem mo apostasi. Yumi lanem plante abaot fasin blong mekem misinari wok. Mo moa bitim eni nara ples, yumi luk insaed long Buk blong Momon, ol denja blong laekem ol samting blong wol mo putum hat blong yumi long ol samting blong wol ia. Bae i gat eniwan i save gat tu tingting se buk ia i blong yumi mo insaed long hem yumi save faenem bigfala paoa, bigfala kam-fot, mo bigfala protektsen?

*Nambatri* risen from wanem Buk blong Momon i impoten tumas long ol Lata-dei Sent, i kamaot long toktok we i kam long Profet Josef Smit we hem i bin talem fastaem. Hem i bin talem: "Mi bin talem long ol brata se Buk blong Momon i moa stret long eni narafala buk long wol, mo i ki ston blong bilif long God blong yumi, mo wan man bae i kam moa klosap long God sapos hem i folem ol tijing blong hem, bitim eni narafala buk." Hemia i nambatri risen blong stap stadi long buk ia. Hem i helpem yumi blong kam kolosap moa long God. Bae i no gat wan samting moa we i moa dip insaed long hat blong yumi we i wantem tumas blong kam kolosap long God, blong yumi kam moa olsem Hem long evri dei wokbaot blong yumi, blong yumi filim se Hem i stap wetem yumi oltaem? Sapos i olsem, nao i no gat wan narafala buk moa we bae i helpem yumi wetem hemia be Buk blong Momon nomo.

I no se Buk blong Momon i stap tijim yumi nomo long trutok, nomata hem i tru we hem i stap mekem hemia. I no se Buk blong Momon i stap olsem wan testimoni abaot Kraes, nomata hem i tru we hem i stap mekem hemia tu. Be i gat wan moa samting. I gat wan paoa insaed long buk ia we bae i stat blong kam



insaed long laef blong yu stat long taem we yu tinghevi blong stadi long buk ia. Bae yu faenem bigfala paoa blong stanap agensem temtesen. Bae yu faenem paoa blong stap longwe long harem nogud. Bae yu faenem paoa blong stap long stret mo smol rod. Ol skripja, oli singaotem olgeta ol toktok blong laef (luk long D&C 84:85), mo i no gat wan ples moa we hemia i tru bitim insaed long Buk blong Momon. Taem yu stat blong stap hanggri mo tosta from ol toktok ia, bae yu faenem laef i stap kam bigwan mo bigwan moa.

Brata blong yumi we yumi lavem tumas, Presiden Marion G. Romni . . . i bin testifae abaot ol blesing we i save kam long laef blong olgeta we bae oli ridim mo stadi long Buk blong Momon. Hem i bin talem:

"Mi filim save stret se sapos, insaed long ol hom blong yumi, ol papa mo mama i stap ridim Buk blong Momon wetem prea mo oltaem tufalawan mo wetem ol pikinini blong tufala, spirit blong bigfala buk ia bae i kam protektem ol hom blong tufala mo evriwan we i stap laef insaed long hem. Spirit blong stap gat respek bae i kam antap; respek long wanwan long olgeta mo tingting long wanwan long olgeta bae i gro. Spirit blong stap rao bae

*Bae i gat eniwan i  
save gat tu tingting  
se buk ia i blong  
yumi mo insaed  
long hem yumi  
save faenem big-  
fala paoa, bigfala  
kamfot, mo bigfala  
protektsen?*

i aot. Ol papa mo mama bae oli givim kaonsel long pikinini blong olgeta wetem moa lav mo wetem moa waes. Ol pikinini bae oli obei moa mo bae oli folem moa kaonsel we papa mo mama blong olgeta i givim long olgeta. Stret mo gud fasin bae i fulap long ol hom mo laef blong yumi, mo i tekem wetem olgeta pis, glad, mo hapines."<sup>3</sup>

Ol promes ia—blong gat moa lav mo gud spirit insaed long hom, blong gat moa respek bitwin papa, mama mo pikinin, blong gat moa spirit mo stret mo gud fasin—oli no ol promes blong nating, be i stret wanem we Profet Josef Smit i bin minim taem hem i bin talem se Buk blong Momon bae i helpem yumi blong kam kolosap moa long God.

Ol brata mo sista. Mi plis long yufala wetem evri hat blong mi, blong yufala i tingting wetem bigfala respek long hamas nao Buk blong Momon i impoten long yuwan mo long Jos olsem wan grup.

Ova long 10 yia i pas, mi bin talem toktok ia long saed blong Buk blong Momon:

"Bae laef we i no save finis blong yumi bae i dipen long olsem wanem yumi stap tekem buk ia? Yes. Bae hem i wan blesing o bae i wan panismen blong yumi.

"Evri Lata-dei Sent i mas mekem se stadi blong buk ia i wan samting we hem i stap mekem long laeftaem blong hem. Sapos no, hem i stap putum sol blong hem long denja mo i no wantem save long samting we bae i mekem se bae hem i gat yuniti long saed blong spirit mo save long laef blong hem. I gat wan samting i defren bitwin wan konvet we i stap bildimap hem antap long ston blong Kraes tru long Buk blong Momon mo i stap holem taet rel blong aean ia, mo wan we i no stap mekem."<sup>4</sup>

Mi konfemem ol toktok ia long yufala long tedei. Bae yumi no stap stap anda long panismen, wetem trabol mo jajmen blong hem, from we yumi stap tekem bigfala mo naes presen ia we Lod i givim, i nating. Be bae yumi winim ol promes we i kam taem yumi holemaetai gud buk ia insaed long hat blong yumi.

Insaed long Doctrine and Covenants, sek-sen 84, ol ves 54 i go kasem 58, yumi ridim se:



*I gat wan paoa  
insaed long  
buk ia we bae i  
stat blong kam  
insaed long laef  
blong yu stat  
long taem we yu  
tinghevi blong  
stadi long buk ia.*

ol maen blong yumi long ol taem we i pas finis, oli bin kam tudak from yumi no bilif, mo from se yumi bin tingting nating long ol samting we yumi bin akseptem.

Mo fasin ia blong tingting nating mo fasin blong no biliv i mekem se ful jos i stap anda long panismen.

Mo panismen ia i stap antap long ol pikini blong Saeon, mo tu, evriwan.

Mo bambae yumi stap anda long panismen ia kasem taem we yumi sakem sin mo yumi tingbaot niu kavenan, we i Buk blong Momon mo ol komanmen blong fastaem we Lod i bin givim long yumi, we i no blong talem nomo, be blong go mekem folem wanem we Lod i bin raetemdaon—

Blong mekem se yumi save karem i kam ol frut ia we oli stret long kingdom blong Papa blong yumi; sapos no, bae wan trabol mo jajmen i stap blong Lod i kapsaedem antap long ol pikinini blong Saeon.

Folem las jeneral konfrens, mi bin kasem plante leta we i kam long ol Sent, tugeta olgeta we oli yangfala mo olfala, we i kam raon long wol we oli bin akseptem jalenj blong ridim mo stadi long Buk blong Momon.

Mi bin glad tumas long stori blong olgeta long olsem wanem nao, laef blong olgeta i bin jenis mo olsem wanem oli bin kam kolosap moa long Lod from we oli bin komitim olgeta. Ol bigfala testemoni ia oli bin konfemem long sol blong mi, ol toktok ia blong Profet Josef Smit se i tru we Buk blong Momon i “ki ston blong [relijin] blong yumi” mo wan man mo wan woman i save “kam moa klosap long God sapos hem i folem ol tijing blong hem, bitim eni narafala buk.”

Hemia i prea blong mi, se Buk blong Momon i save kam ki ston blong laef blong yumi. ■

*Oli jenisim fasin blong raetem toktok blong i folem standet blong tedei.*

#### OL NOT

1. Fas toktok blong Buk blong Momon.
2. Luk long taetol pej blong Buk blong Momon.
3. Marion G. Romney, “The Book of Momon,” *Ensign*, Mei 1980, 67.
4. Ezra Taft Benson, “The Book of Momon Is the Word of God,” *Ensign*, Mei 1975, 65.

## BLONG 25 YIA

Nomata mi bin wan fetful memba blong Jos stat long 1965 i kam, wan taem ia nomo long 1986 bitim eni nara taem, i bin mekem testemoni blong mi i strong gud long saed blong gospel we i kambak.

Long manis Oktoba blong yia ia, mi bin go long japel blong mi long Konwol, Inglan, blong lukluk brodkas blong jeneral konfrens. Afta we mi harem stamba toktok blong Presiden Ezra Taft Benson, “Buk blong Momon—Ki Ston blong Relijin blong Yumi,” mi bin save se mi mas kam antap long hadwok blong mi blong ridim Buk blong Momon.

Long naet ia, mi bin go hom, mi bin nildaon, mo mi bin mekem kavenan wetem Lod se bae mi no tingting nating long Buk blong Momon bakegen. Naoia, 25 yia afta, mi save ripotem se mi no bin mestem blong ridim Buk blong Momon long wan dei.

Ol blesing we mi bin kasem from mi bin mekem desisen ia, i fulap tumas we mi no save kaontem. I gat wan spesel spirit long Buk blong Momon we yu no save faenem long eni nara ples, i no gat tu long ol nara buk blong skripja. Mi bin filim se Tabu Spirit i bin stap kolosap, i stap helpem mi blong leftemap tingting blong mi long ol taem blong jalenj long laef, speseli taem waef blong mi, we i gat kolosap 50 yia, i bin ded long manis Febwari blong yia 2007.

**Alista Josef Wels, Skotian**

# Wan Tabu Wok

I Kam long Deved A. Fets

Wan naet, misinari kompanion blong mi mo mi i bin noknok long doa blong wan yang man we i bin wan ovasi studen, we i stap stadi long wan long yunivesiti blong London. Hem i bin invaetem mitufala i go insaed long haos blong hem, mo mitufala i bin eksplenem se mitufala i ol misinari blong Jos blong Jisas Kraes blong Ol Lata-dei Sent. I luk olsem se hem i wantem tumas blong save moa abaot Restoresen blong gospel, mekem se mitufala i bin testifae abaot Profet Josef Smit mo talem long hem abaot wan tabu buk we i kam long Papa long Heven, we oli singaotem Buk blong Momon. Mitufala i bin talem gud se hem i tabu from se hem i testifae abaot Jisas Kraes.

Mitufala i bin eksplenem se bae hem i save faenemaot hemwan sapos buk i tru mo mitufala i bin givim wan kopi long hem. Taem mitufala i bin pusum han blong givim Buk blong Momon long hem, hem i stanap mo i aot long rum mo i no talem wan toktok. Mi holem Buk blong Momon long han blong mi smol taem, mo kompanion blong mi mo mi, mitufala i sek mo stap lukluk mitufala, mo traem tingting long wanem blong mekem. Mi putum buk antap long tebol.

Mitufala i save luk yang fren blong mitufala long kijin we i stap wasem han blong hem mo i stap wapem han long wan klin tawel. Hem i kambak long rum mo i pikimap Buk blong Momon long tebol mo talem nomo: "Ol pipol blong mi oli wasem han blong olgeta oltaem bifo oli tajem wan samting we i tabu." Wota blong ae blong mi i ron taem mi luk yang man ia i openem Buk blong Momon long fas taem mo i tanem ol

*Hem i bin  
akseptem evri  
samting we  
mifala i bin  
tijim hem. So,  
from wanem  
nao bae hem  
i no tekem  
Buk blong  
Momon taem  
mi bin givim  
long hem?*

tabu pej blong hem wetem ol klin han.

Alma i bin tijim se ol skripja oli tabu mo oli bin holemtaet blong tekem fasin blong sevem man i kam long ol sol. Hem i talem long boe blong hem, Hileman: "God i bin trastem yu wetem ol samting ia, we oli tabu, we hem i bin kipim tabu, mo tu bae hem i kipim mo sevem olgeta blong wan waes stamba tingting blong hem, blong hem i save soemaot paoa blong hem long ol fiuja jeneren" (Alma 37:14).

Oli bin sendem mi long wan misin blong tijim gospel blong Jisas Kraes we i kambak; be yet, mi nao, mi wan we i stap kasem tijing i kam long yang man ia wetem ol klin han. Long plante kalja—wetem kalja blong mi tu—hem i no nid blong wasem han bifo yu ridim ol skripja, be simpol aksen ia blong respek i wan samting we i mekem mi tingbaot strong se Buk blong Momon i tabu. ■





I Kam long Elda  
Wolta F. Gonsales

Blong Presidensi blong  
Olgeta Seventi

SAPOSYU  
WANTEM  
SAVE TRU,

*Mi filim wan bigfala tangkyu from Buk  
blong Momon. Hem i bin jenism laef  
blong mi blong oltaem, mo mi save se  
hem i save jenism laef blong yu.*

# Bambae Yu Save Stret

**M**i gat 18 yia taem mi kam wan memba blong Jos. Buk blong Momon i bin plei wan ki pat blong jenism long laef blong mi. Long taem ia, mi bin stap lukaotem sam niu aedia we i save eksplenem wanem i stap long wol raon long mi. Mi tingbaot se ol profesa blong mi long skul oli tekem ol tingting blong wol ia blong stap tij. Mi stat blong lukluk i go long sam nara aedia abaot save ia se i gat wan God o nogat.

Wan dei, mi bin luk wan blu buk we sam misinari i bin livim long hom blong mifala samples sikis yia i pas finis. Hem i Buk blong Momon. Wetem buk ia, oli bin livim wan smol buk abaot Profet Josef Smit mo tu, sam instraksen long olsem wanem blong prea long God.

Mi bin stat blong ridim Buk blong Momon. Mi stat blong ridim sam ves nomo insaed long buk ia, long 1 Nifae, taem mi bin filim wan samting i defren. Mi stat blong faet wetem ol filing mo tingting blong mi. Mekem se mi disaed blong askem God long wan prea.

Hemia i bin fas taem long laef blong mi we mi bin stap nildaon blong prea. Eksperiens we i kam afta i kam wan long ol taem we i tabu moa long laef blong mi. Wan filing blong wan bigfala glad i fulumap mi, mekem se mi save

long hat blong mi se Buk blong Momon i moa bitim wan buk nomo. Hem i wan buk we i kam long heven. Hem i gat toktok blong God. Samtaem afta, mi kam blong andastanem se filing ia i bin Spirit we i bin stap testifae long mi se buk ia i tru.

I gat sam we ating oli gat semmak eksperiens, be i gat ol defren wei we wan i save kam blong save se Buk blong Momon i tru.

## Olsem Wanem Bae Yu Save?

*1. Sam bae oli save taem bae oli harem samting long sora blong olgeta.* Ating yu yu wan long olgeta we bae i save nomo taem yu lisin long wanem buk ia i stap tijim. Buk blong Momon i tokbaot plante taosen we oli bin harem ol boe blong Mosaea oli tijim gospel blong Jisas Kraes mo “oli bin jenism laef blong olgeta long Lod” (luk long Alma 23:5–6). Ol misinari tedei, oli tijim semfala gospel ia we i stap long Buk blong Momon. Sam bae oli save se Buk blong Momon i toktok blong God nomo taem oli harem ol narawan oli serem ol tijing we oli stap insaed.

*2. Sam bae oli save taem bae oli ridim.* Ating yu yu wan long olgeta we bae i save nomo taem yu ridim Buk blong Momon wetem wan tru hat blong save trutok. Hem i bin





olsem long waef blong mi. Hem i bin gat 12 yia taem hem i bin putum long hat blong hem se bae hem i folem instraksen blong ridim buk stat long stat i go kasem en. Taem hem i bin mekem, hem i bin save se hem i tru. Filing ia i bin strong tumas we, taem hem i bin ridim, hem i bin mekem tingting blong folem Sevya blong oltaem. Hem i bin stap tru long wanem we hem i bin filim.

*3. Sam bae oli save taem oli mekem.* Ating yu yu wan long olgeta we bae i save nomo taem i mekem olgeta samting we buk ia i stap tijim. Sam pipol oli kasem testimoni blong olgeta bae oli mekem (luk long Jon 7:17).

Nifae, wan profet blong Buk blong Momon, i bin andastanem gud prinsipol ia. Hem i bin raetem se blong “save winim ful tingting blong olgeta blong oli bilif long Lod, Ridima blong olgeta, . . . mi bin yusum evri skripja long laef blong mifala, blong hem i save stap blong helpem mo lanem mifala” (1 Nifae 19:23; oli ademap italic). Taem yumi putum, o yusum ol tijing blong Buk blong Momon long laef blong yumiwan, yumi save kam blong save stret se buk ia i kam wea.

*4. Sam bae oli save taem oli askem long God.* Ating yu yu wan long olgeta we bae i save taem yu ridim Buk blong Momon mo afta, askem long Papa long Heven long prea sapos buk ia i tru. Hemia i wanem mi mi gotru long hem. Hem i bigfala promes we wan nara profet blong Buk blong Momon, Moronae, i givim long evriwan we oli gat tru tingting blong lukaotem trutok: “Luk, mi wantem askem strong long yufala se taem we bae yufala i ridim ol samting ia, sapos hem i waes tingting long God se bae yufala i ridim olgeta . . . se bae yufala i askem God, Papa we i no Save Finis, long nem blong Kraes, sapos ol samting ia i no tru; mo sapos bae yufala i askem wetem wan tru hat, wetem tingting we i tru blong wantem save, wetem fet long Kraes, bae hem i soemaot trutok blong ol samting ia long yufala, tru long paoa blong Tabu Spirit” (Moronae 10:3–4). Mi talem witness blong mi se sapos yu ridim mo prea abaoat Buk blong Momon, mo folem ol toktok blong Moronae, bae yu save se buk i tru.



## PROMES BLONG MORONAE

**L**ong en blong Buk blong Momon, wan profet we nem blong hem i Moronae, i pro-mesem se sapos yumi ridim Buk blong Momon, tingting hevi long ol mesej blong hem insaed long hat blong yumi, mo askem God long prea sapos hem i tru, God bae i ansarem yumi tru long paoa blong Tabu Spirit (luk long Moronae 10:3–5).

Revelesen blong yuhan i blong yuhan. Hem i kam long ol defren rod mo long ol defren taem long wanwan long yumi folem tingting blong Lod. Taem yu andastanem olgeta prinsipol ia we i kam afta, bae i helpem yu blong kam blong save samting yuhan.

### 1. Tingting long Hem

Bifo hem i invaetem yumi blong prea, Moronae i invaetem yumi blong tingting hevi. Blong tingting hevi i minim blong tingting wetem ful tingting blong yu. Aksem yuhan: Mi filim olsem wanem taem mi ridim Buk blong Momon? From wanem mi filim olsem? Wanem nao mi bin lanem? Hem i gud o no?

Lod i bin tijim prinsipol ia long Oliva Kowdri. Oliva Kowdri i no mekem wan samting moa, be hem i askem nomo. Lod i talem long Oliva Kowdri se hem i mas stadi long samting ia long maen blong hem; *afta*, hem i mas askem long Lod sapos hem i stret, mo sapos hem i stret, bae Lod i mekem hat blong hem i wom (luk long D&C 9:7–8; oli ademap italic).

### 2. Prea Wetem Strong Tingting

Blong putum tingting blong yumi nomo long ol kwaet ansa blong Tabu Spirit i nidim paoa long tingting. Ating from hemia nao Inos i stap tokbaot, long Buk blong Momon, se prea blong hem i olsem "traehad . . . long fored blong God" (Inos 1:2).

Taem yu stap ridim, tingting hevi, o prea, faenem wan taem mo wan ples we i no gat tumas samting i pulum tingting blong yu. Faenem wan posisen we i save helpem yu blong yu putum ful tingting blong yu long prea. Blong stap prea long wan laod voes i save helpem yu blong putum ful tingting blong yu long prea.

### 3. Askem Ol Stret Kwestin

Lod i bin talem long Oliva Kowdri blong no jes stap askem samting, be blong askem sapos tingting we hem i gat i stret. Plante taem, speseli taem yumi no gat tumas eksperiens blong kasem ol ansa we i kam long Papa long Heven, hem i moa isi blong andastanem ansa long wan simpol kwestin we ansa blong hem i yes o no.

"Wan ki blong wan gudfala prea i blong lanem blong askem ol stret kwestin." Hemia Elda Rijad G. Skot blong Kworom blong Olgeta Twelef Aposol i bin tijim.<sup>1</sup>

### 4. Wanem Nao Yu Stap Tingting blong Mekem?

Wan long ol ki blong promes blong Moronae i blong wanem yumi askem, yumi askem wetem ful tingting." Presiden Henri B. Aering, Fas Kaonsela long Fas Presidensi i bin talem se taem Josef Smit we i bin gat 14 yia i go long bus blong prea, "hem i bin prea wetem tingting ia blong lisin, be tu, wetem tingting blong obei." Mo ". . . from hem i bin fetful, long ol dei mo manis mo yia bifo, ansa blong ol prea blong hem oli kam olsem wan bigfala wota blong laet mo trutok."<sup>2</sup>

### 5. No Mestem

I no evri revelesen we i hapan olsem wan bigfala samting. Sam pipol oli gat ol drim, ol visen, o ol visit. Be plante long yumi bae i gotru wan samting we i kwaet mo i naes, olsem wan gudgudfala filing blong pis.

Presiden Spensa W. Kimbol (1895–1985), namba 12 Presiden blong Jos, i bin tijim se: "Taem i ting se bigfala samting bae i hapan, nao hem i nomo luksave we God i stap givim revelesen oltaem."<sup>3</sup>

#### OL NOT

1. Richard G. Scott, "Using the Supernal Gift of Prayer," *Liahona*, Mei 2007, 8.
2. Henry B. Eyring, "Prayer," *Liahona*, Jan. 2002, 18.
3. *Teachings of Presidents of the Church: Spencer W. Kimball* (2006), 241.



### WAN PROFET I STAP TESTIFAE

"Buk blong Momon i tok-tok blong God. Mifala i invaetem yufala blong ridim gudfala histri ia. Hem i wan gudfala buk we i stap tedei. Ridim gud mo wetem prea, mo taem yu stap mekem hemia, God bae i givim wan testemoni long yu se hem i tru, olsem promes we Moronae i talem (luk long Moronae 10:4)."

President Howard W. Hunter (1907–95), *The Teachings of Howard W. Hunter*, ed. Clyde J. Williams (1997), 54.



### WAN PROFET I STAP TESTIFAE

"Mi mi wan we mi kasem long Lod, revelesen we i strong long saed blong trutok blong Restoresen (Gospel we i kambak) mo Buk blong Momon. Samting ia we i kamaot long mi, i bin stap wetem mi wetem paoa blong plante plante aoa; mo nomata wanem situesen i save hapen long laef blong mi, sapos memori blong mi i stap, bae stret save ia bae i stap wetem mi tu."

President Lorenzo Snow (1814–1901), *Long Conference Report*, Okt. 1900, 61.

### **God I Bin Promesem se Bambae Yu Save**

Sapos yu wantem save tru, bambae yu kam blong save se Buk blong Momon i tru. God i bin promesem blong givim save ia long olgeta we oli gat ones tingting blong lukaotem trutok, mo Hem i wan “God blong trutok, mo [Hem i] no save giaman” (Ita 3:12).

Wan nara profet blong Buk blong Momon Alma, i bin tijim boe blong hem se God i bin promesem se bae “hem i sevem [buk] ia blong wan waes stamba tingting long hem, blong hem i save soemaot paoa blong hem long ol fiuja jeneresen. Mo nao luk, wan stamba tingting hem i bin mekem i happen finis, we i long kambak blong plante taosen long ol man blong Leman long save blong trutok; mo hem i bin soemaot paoa blong hem wetem olgeta, mo tu bae hem i soemaot paoa blong hem wetem olgeta long ol fiuja jeneresen; taswe bae oli sevem [buk ia]” (Alma 37:18–19).

Semfala paoa ia blong winim tingting

blong man i stap tedei long wan ful buk blong skripja ia, mo Lod bae i soem long eniwan we i gat tru tingting blong wantem save. Mi save talem hemia wetem stret save taem mi stap lukbak long ol dei ia taem mi bin stap lanem abaot Jos. Tedei, from paoa ia blong Buk blong Momon blong winim tingting blong man, mi testifae se Buk blong Momon i toktok blong God, se hem i tijim se Jisas i Kraes, Tabu Mesaea. Buk ia i wan pruf we man i save holem, we i pruvum se Restoresen blong gospel blong hem i bin tekem ples, mo Josef Smit i wan profet blong God.

Sapos yu wan long olgeta we i stap tru blong stap lukaotem trutok, Lod i bin promesem se bambae yu save. Bae yu save kam blong save taem yu lisin long ol tijing blong buk ia, taem yu ridim buk, taem yu mekem wanem we buk ia i stap tijim, taem yu stap prea blong save se hem i tru o no, o taem yumi mekem evriwan long olgeta. Be bambae yu save stret. ■

### **OLSEM WANEM NAO MI SAVE**

**N**omata mi bin kasem baptaes taem mi bin gat naen yia, famle blong mi i no bin strong insaed long Jos. Be taem mi gat 13 yia, ol misinari oli bin invaetem mi blong go long jos mo mi bin go. Mi bin go tu long seminari. Stadi kos i bin Doktrin blong Ol Kavenan, we mi luk se i stap mekem mi konfius. Speseli, mi stap traehad wetem Josef Smit mo Buk blong Momon. Mi bin wantem blong faenem God, be mi no save stret se bae mi mekem olsem wanem mo weaples.

Wetem taem, mi bin tingting plante abaot ol storian we mi gat wetem ol misinari. Mi tingting abaot seminari. Mi tingting abaot ol storian we mi bin gat wetem ol memba blong ol narafala relijin. Wanwan taem, mi bin prea blong save wanem we i stret, be mi no tingting tumas long hem, i no wan kwestin we i kam long hat blong mi. Afta, wan naet, mi bin disaet blong prea wetem “tru hat” blong mi.

Mi bin talem long Papa long Heven se mi bin wantem blong save Hem mo kam pat blong tru Jos blong

Hem. Mi bin promes olsem: “Sapos Yu, Papa, Yu letem mi save se Josef Smit i wan tru profet o sapos Buk blong Momon i tru, bae mi mekem wanem we Yu wantem mi blong mekem. Sapos Jos blong Jisas Kraes blong Ol Lata-dei Sent i tru Jos, bae mi folem Jos ia mo neva givap.”

I no gat wan bigfala samting i bin happen, be mi bin filim wan pis mo mi go long bed. Plante aoa afta, mi wekap wetem wan stret tingting: “Josef Smit i wan tru profet mo Buk blong Momon i tru.” Tingting ia i kam wetem wan pis we mi no save tokbaot. Mi slip bakegen, mo mi wekap afta wetem stret tingting mo filing ia bakegen.

Stat long taem ia, mi neva gat tu tingting se Josef Smit i wan tru profet. Mi save se hemia i from wok blong Sevya mo Papa long Heven bae i ansa long ol tru prea blong yumi.

**Rodolfo Armando Perez Bonila, El Salvador**

# WAN VOES

## WE I KAMAOT LONG DAS

Buk blong Momon i stap talem trutok i go long wol long taem  
blong yumi. Letem i tekem laet mo trutok i kam long laef blong yu.  
(Luk long Moronae 10:27.)



# WAN Faea we I Stap Bon INSAED LONG MI

*Dei we hem i lanem blong rid,  
hem i dei tu we Eduardo i kasem  
wan testemoni abaot Buk blong  
Momon mo paoa blong hem.*

## I Kam long Maekel R. Moris

Ol Magasin blong Jos

**B**ubuman blong mi i stap talem oltaem: ‘Sapos yumi wantem kam wan man, yumi mas lanem blong rid,’ Eduardo Kontreras i talem. “Bubuman blong mi i stap talem stret.”

Be long Eduardo, rod blong folem blong hem i save rid, hem i wan longwan. Olsem wan long ol faef pikinini we wido mama blong hem long siti blong Kodoba, Ajentina, hem i bin livim skul taem hem i gat eit yia mo i bin go wok blong help blong sapotem famle blong hem.

Hem i tingbaot: “mifala i bin pua tumas.” Blong help blong gat mane kasem en blong manis, Eduardo i stap saenem sus, i mekem ol brikis, i stap pikimap ol poteto, i salem ol niuspepa, mo i tekem ol nara smosmol wok kasem taem we, olsem wan yang man, hem i bin faenem wan fultaem wok wetem munisipol gavman.

Taem ol yia oli stap pas, Eduardo i bin mared mo i bin statem wan famle blong hemwan. Taem kolosap ol faef pikinini blong hem oli stat blong aot long hom, hem i no save rid yet mo hem i no gat tumas hop se bae hem i lan blong rid. Hemia i bin jenis wan dei taem hem i bin ronem sam lokol boe we oli bin stap jikim tu Lata-dei Sent misinari long fored blong hom blong hem. Hem i bin invaetem ol misinari blong kam long haos blong hem, mo i no longtaem afta, hem mo waef blong



Long Eduardo Kontreras, we i stap long pikja antap wetem waef blong hem, Maria, Buk blong Momon i doa blong save rid. Hem i talem: “Mi filim Spirit evri taem mi openem blong ridim.”

hem, Maria, tufala i bin stap tekem ol lesen.

Eduardo i tingbaot: “mi bin gat hadtaem blong andastanem eni samting we tufala i bin stap talem from se tufala i no toktok gud Spanis. Be tufala i bin soem wan smol buk we i gat ol pikja blong Sevya mo Profet Josef Smit long Tabu Bus. Mi ting se ol pikja ia we tufala i bin stap soem, mo ol samting we tufala i bin tijim mifala, i bin naes tumas.”

I no longtaem afta, tufala nara misinari i kam tekem ples blong tufala faswan, mo i gat wan i toktok Spanis. Eduardo mo Maria, we tufala i bin lusum wan smol bebi gel sam yia bifo, i bin harem gud tumas afta we tufala i luk film ia, *Families Are Forever (Ol Famile Oli Blong Oltaem)*. Tufala, wetem yangfala boe blong tufala, Osvaldo, i bin kasem baptaes.

Wetem baptaes blong Eduardo long yia 1987, hem i kasem wan filing blong wantem ridim Buk blong Momon blong mekem testemoni blong hem i kam strong moa. “Olsem wanem bae mi lan blong mi rid?” hem i askem waef blong hem. Maria i talem long hem blong lukluk long ol leta, putum olgeta tugeta long maen blong hem, traem blong saonem laod ol toktok ia, mo afta, traem blong ridim laod. Waef blong hem i talem gud long hem se wetem praktis, bae hem i save lan blong rid.



## WAN PLES BLONG KASEM INSPERESEN MO PAOA

Eduardo, we long taem i gat 45 yia, i bin save saon blong plante leta, be hem i no bin traem blong rid stat long taem we hem i livim skul foti yia bifo.

### Mi Bin Filim Wan Faea

Wetem wan prea long hat blong hem, Eduardo i bin sidaon long wan hot dei andanit long sed long yad blong hom blong hem. Hem i talem: "Long taem ia, mi mekem strong tingting blong mi mas traem."

Maria i talem se hem i neva ting long wanem i bin hapan afta. Taem hem i stap wok long kijin, hem i stap lisin i go taem Eduardo i stap traem blong saonem ol leta mo ol toktok. "Wantaeem nomo, mi bin harem hem i toktok hariap," hem i talem. "Mi bin lisin mo mi luksave se hem i bin stap rid—i stap rid gud. I no wan aoa haf i pas, mo hem i bin stap rid!"

Eduardo i lus tumas long tingting blong hem blong traem rid, mekem se hem i no luksave se hem i bin stap rid. Be taem hem i bin stap rid, hem i tingbaot, "mi bin filim wan faea i stap bon insaed long mi." Eduardo i bin fraet mo i bin sapraes nao hem i singaotem waef blong hem mo talem: "Mama, wanem nao i stap hapan long mi?"

Maria i ansa: "Hem i Spirit blong Lod. Yu save rid gud nao!"

Taem hem i stap tingtingbak long eksperiens ia Maria i talem: "Hem i wan samting we bae mitufala i neva save tanem baksaa blong mitufala long hem."

Eduardo i ademap: "Dei we mi bin lanem blong rid, i dei ia tu we mi bin kasem testemoni blong mi long saed blong Buk blong Momon mo paoa blong hem."

Stat long taem ia, Eduardo i stat blong girap long 4 klok long moning blong ridim Buk blong Momon bifo hem i go long wok. Afta, hem i ridim Doktrin mo Ol Kavenan, mo afta Baebol. Naoia i gat wan laebri we i flasem hom blong famle Kontreras, mo i gat sam buk i bin stap long hem bifo long yia 1987.

Taem Eduardo mo Maria i gro long save blong gospel, testemoni blong tufala tu i bin gro. Taem boe blong tufala, Osvaldo i bin ded long wan bigfala aksiden blong trak long yia 2001, testemoni blong tufala—we i strong wetem ol eksperiens long saed blong spirit long taem blong prea, mo insaed long Buenos Aeres Ajentina Tempol, we tufala i bin silim tufala wetem Osvaldo—i bin helpem tufala blong tekem ded blong boe blong tufala.

Eduardo i talem se: "Ating sam papa mo mama bae oli go krangke, be mitufala i filim wan pis we i stap talem: 'boe blong yutufala i stap gud.' Yes, mitufala i bin krae.

"Wanem nao Buk blong Momon i minim long yu? Hem i bin wan ples blong kasem insperesen mo paoa long laef blong yu? Bae i gohod blong stat olsem?

"Sapos yu no dring yet bigwan long spring blong klin trutok ia, wetem evri sol blong mi, mi letemap tingting blong yu blong yu go mekem naoia. No letem fasin blong stadi oltaem long Buk blong Momon i wan long ol samting we yu gat tingting blong mekem, be yu neva finisim. Stat tedei."

Elda Richard G. Scott blong Kworom blong Olgeta Twelef Aposol, "The Power of the Book of Mormon in My Life," *Ensign*, Okt. 1984, 11.

Hem i bin wan gud boe, mo mitufala i misim hem. Be mifala i bin sil long tempol, mo mifala i save weaples nao hem i stap long hem.

### Laet blong Save Rid

Tru long lesen blong wan memba blong wod blong hem, Eduardo i bin lanem tu blong raet. Hem i talem: "Bifo, mi no save saenem nem blong mi."

Wetem laet blong save rid, Eduardo i kam blong andstanem se ol toktok blong bubuman blong hem i tru.

Hem i talem: "Yumi stap long wol ia blong yumi save progres smol moa evri dei." Taem hem i lan blong rid mo blong raet, hem i stap soem long ol pikinini mo apupikinini blong hem se i neva let tumas blong lanem samting, blong kam antap, mo blong kam wanem we God i wantem yumi blong kam. Hem i talem: "From se mi save rid, mi lanem wan niu samting evri dei."

Tedei, Brata Kontreras i save ridim eni samting we hem i wantem ridim, mo tu ol niuspepa ia we hem i bin stap salem taem hem i wan pikinini we i no save rid. Ol skripja oli stap olsem bes buk we hem i laekem, speseli Buk blong Momon. Hem i bin ridim stat kasem en ova long eit taem nao.

Hem i talem: "long mi, Buk blong Momon i doa," mo hem i stap talem tangkyu yet long olsem wanem fasin blong rid mo gospel i bin jenisim laef blong hem. "Buk blong Momon i evri samting long mi. Hem i evri samting long mi. Mi filim Spirit evri taem we mi openem blong ridim." ■

# WEAPLES NAO BAE MI SAVE FAENEM OL ANSA?


Taem mi gat 21 yia, ol misinari blong Jos blong Jisas Kraes blong Ol Lata-dei Sent oli bin stap tijim ol Inglis klas long eria blong mi long Rasia. Fastaem, mi bin stap go blong go long ol lanwis lesen, be i no longtaem afta, mi stat blong stap longtaem moa blong harem ol toktok long saed blong spirit we ol elda oli bin stap serem afta long klas, mo blong askem kwestin long olgeta.

Mi bin groap long mama relijin blong kantri blong mi, be mi bin gat fulap kwestin long saed blong relijin we mi no gat ansa long olgeta. Ol misinari mo ol memba blong Jos blong olgeta oli bin gat ol ansa long ol kwestin ia we i no gat wan long bifo i bin save givim we i stretem tingting blong mi.

Afta long wan Inglis klas, mi bin filim se mi gat inaf strong paoa long tingting blong mi, nao mi askem ol misinari blong kasem wan kopi blong buk blong olgeta, Buk blong Momon. Be taem mi kasem haos, mi putum i stap long sef mo no ridim.

I no stap long ples ia blong longtaem. Mi bin harem ol memba blong Jos we oli stap go long Inglis klas oli stap talem se ol skripja oli gat ansa long ol problem. Mekem se taem mi fesem wan jalenj o problem blong mi-wan, mi tekem Buk blong Momon we i stap long sef mo stat blong ridim. Oltaem, mi faenem ol ansa—kaen ansa we i stap talem stret long mi wanem mi nidim blong save.

Long taem ia mi stat blong filim se mi no save stap mo no gat Jos. Hem i ples we mi wantem stap long hem. Hem i ples ia nao we mi pat long hem.



*Long wan naet, mi go slo long kijin—we i seperet smol long hom—mo askem Papa long Heven sapos Jos i bin tru.*

Be yet, mi bin wantem mekemsua, mo askem God. Problem hem i we mi stap laef long wan smol rum we mi stap serem wetem ona blong haos, we i wan olfala woman, mo i no gat wan praevet ples blong mi blong mi go prea. Be long wan naet, mi go slo long kijin—we i seperet smol long hom—mo askem Papa long Heven sapos Jos i bin tru. Mi kasem wan strong filing olsem ansa, mekem se mi save wanem we mi nidim blong mekem.

I no longtaem afta mi bin baptaes, mo taem blong mi olsem wan memba blong Jos i bin taem we mi moa hapi long laef blong mi. Long taem we bifo mi gat kwestin, naoia mi gat ol ansa. Long ples we bifo mi filim se mi emti, naoia mi fulap.

Mi talem tangkyu se Papa long Heven i no livim yumi nating be i givim ansa. Mi save se bae Hem i toktok long yumi, tugeta tru long prea mo tru long ol skripja. ■

Olga Ovkarenko, Serdlok Oblast, Rasia

# MI BIN FILIM WAN FAEA INSAED LONG MI

Mi groap mo stap go long wan Sandei Skul long wan jos we i stap kolosap long hom blong mi long Mijigan, YSA. Mi bin gat wan gudfala tija we i bin fulumap mi wetem lav long Jisas Kraes.

Evri wik, bae hem i pasem ol kad we i soem ol taem blong ministri blong Sevya long wol, wetem tu ol prinsipol we Hem i bin tijim mo ol merikel we Hem i bin mekem. Evri wik, mi putum ol kad ia long wan buk mo stap ridim bakegen ol stori ia insaed long Baebol. Taem mi gro i kam bigwan, mi bin goheded blong stadi long ol buk blong Gospel insaed long Niu Testeman.

Sam yia afta, long sama blong yia 1968, ol misinari blong Jos blong Jisas Kraes blong Ol Lata-dei Sent oli bin visitim hom blong wan memba blong famle. Hem i no wantem akseptem invitesen blong ol elda blong lanem abaoit Jos be hem i sendem olgeta i kam long haos blong mi.

Long fas miting blong mifala, ol misinari oli bin tijim mi se "wan foldaon" i bin hapen long Jos we Jisas Kraes i bin stanemap (luk long 2 Tesalonaeka 2:3). Wanem we oli bin tijim i bin go wetem stadi blong miwan, mekem se taem oli bin askem sapos oli save kam visitim bakegen, mi bin agri.

Long taem blong nekis visit blong olgeta, mi bin gat wan lis blong ol kwestin. Ol Lata-dei Sent oli mekem baptaes andanit long wota? Oli stap biliv o no long prishud atoriti? Oli stap biliv o no long fasin blong hilim ol sikman? Ol ansa blong olgeta i bin sapotem wanem we mi bin stadi insaed long Niu Testeman. Long en

blong visit blong tufala, tufala i bin livim wan buk we tufala i talem se hem i testifae abaoit Jisas Kraes.

Mi putum buk ia antap long TV mo mi go long bed. Be long medelnaet, wan strong filing i wekemap mi, we afta, mi luksave olsem Tabu Spirit. Mi bin filim se mi mas stat blong ridim buk, mekem se mi bin ridim blong wan aoa mo haf bifof mi gobak long bed. Sot taem afta, mi wekabakegen wetem sem filing ia, mekem se mi ridim sam moa.

Paten ia i bin goheded blong tu moa naet. Mi bin lavem wanem we mi bin stap ridim mo mi bin luksave se Buk blong Momon i bin testifae abaoit Jisas Kraes.

Mi bin disaed blong askem God blong kasem wan daerekseen. Blong fas taem stat we mi smol gel i kam, mi bin nildaon blong prea. Mi bin askem Papa long Heven blong helpem mi blong save wanem blong mekem wetem faea we mi filim insaed long mi. Taem mi bin finisim prea blong mi, mi bin filim blong ridim bakegen stori blong Ol Man blong Leman we oli bin jenism laef blong olgeta, we i stap long 3 Nifae 9. Mi ridim se oli bin "baptases wetem faea mo wetem Tabu Spirit, mo oli no bin save" (ves 20).

Toktok ia "oli no bin save" i toktok i kam stret long mi. Ting-ting ia i kam long mi: "I tru we Jos blong Jisas Kraes blong Ol Lata-dei Sent i stap long wol!" Mi wantem tumas blong toktok long ol misinari abaoit wanem mi bin ridim mo wanem we mi save naoia. Be taem oli bin ansa long ol kwestin blong mi wetem wan invitesen blong kasem baptaes, mi talem long olgeta se mi no save mekem. Bae hasban blong mi bae i no andastanem.


Taem mi bin goheded blong ting-ting long ves ia, nao mi luksave se i tekem ol klia daerekseen blong mi blong mi mas mekem sakrifaes blong wan "hat we i stap daon mo

wan spirit we i wantem sakem sin." Mi bin prea mo mi bin askem Papa blong mi we i stap long Heven blong helpem mi, mo Hem i bin mekem. Afta we hasban blong mi i bin lisin long ol lesen blong ol misinari, hem i bin agri blong mi kasem baptaes.

Mi talem tangkyu tumas long wan Papa long Heven we i gat lav from spesel mo strong eksperiens ia we mi bin gat olsem wan yang mama we i stap ridim Buk blong Momon. Hem i lidim mi long gospel blong Jisas Kraes we i kambak. Long en, paoa blong Tabu Spirit we mi bin filim long ol naet ia long 1968, oli stap naoia olsem wan presen we i stap oltaem—wan samting we i bin lidim mi blong moa long 40 yia olsem wan memba blong Jos. ■

Klodia Williams, Florida, YSA

*Mi putum buk  
ia antap long  
TV mo mi go  
long bed. Be  
long medel-  
naet, wan  
strong filing i  
wekemap mi  
mo talem mi  
blong go  
ridim buk.*



# BUK BLONG MOMON I BIN TOKTOK LONG MI

Taem yangfala pikinini blong mitufala, Amanda, i bin gat tu yia, oli faenem se hem i gat lukemia (kansa blong blad). Kes blong hem i had, mo kansa blong hem i no finis afta long kimo tritmen (tritmen we oli yusum ol eksre blong kilim sik). Afta long hemia, oli mas operetem hem mo oli mas karemaot mit we i stap insaed long bun blong wan nara man blong givim long hem.

Taem hasban blong mi mo tufala boe oli bin stap hom long Yuta, mi bin stap wetem Amanda long wan nara stet, stat long Septemba i go kasem fas pat blong Jenuware. Mifala i no bin selebretem Krismas tugeta, be wetem en blong tritmen, mitufala i bin gobak hom.

Long fas visit blong mifala i go long hospital blong mekem jekap afta we mitufala i gobak hom, ol dokta we oli faenem bakegen lukemia ia long blad blong Amanda. Operesen i no bin wok. Taem mi harem nius ia, mi filim olsem se mi stap foldaon tru long floa. Famle blong mifala i bin gotru long plante wari, wok, mifala

i seperet mo plante hadtaem. Naoia, bae mifala i lusum gel nomo.

Mi gobak hom long afterun ia blong go luk tufala boe blong mi. Taem mifala i bin stap wet long hasban blong mi i kambak hom afta wok, mifala i tekem kopi blong mifala blong Buk blong Momon mo stat blong rid. Mifala i bin stap long 2 Nifae 9. Taem mifala i bin stap rid, ol toktok ia oli toktok long mi:

“Mi talem long yufala ol samting ia blong mekem se yufala i save glad mo leftemap ol hed blong yufala blong oltaem, from ol blesing we bae Lod God i givim long ol pikinini blong yufala.

“From mi save se yufala i bin stadi plante, plante long yufala, blong save long saed blong ol samting we bae i kam; from samting ia mi save se yufala i save we bae bodi blong mit mo bun blong yumi i mas kam roten mo ded; be, long ol bodi blong yumi bae yumi luk God. . . .

“From olsem we ded i bin kam long evri man, blong mekem plan we i fulap wetem sore blong bigfala

Krieta i hapen, i mas nid i stap wan paoa blong laef bakegen. . . .

“O hamas nao gudfala fasin blong God blong yumi, we i mekem rere wan rod blong ronwe blong yumi aot long paoa blong rabis anamol ia; yes, anamol ia, ded. . . .

“Mo bae hem i kam long wol blong hem i save sevem evri man sapos oli lisin long voes blong hem; from luk, hem i harem nogud long ol soa blong bodi blong evri man, yes, ol soa blong bodi blong evri samting we i stap laef, ol man tugeta wetem ol woman, mo ol pikinini, we oli blong famle blong Adam.

“Mo hem i harem nogud long samting ia blong mekem se laef bakegen i save kam long evri man, blong olgeta evriwan i save stanap long fored blong hem long bigfala mo jajmen dei” (2 Nifae 9:3–4, 6, 10, 21–22).

Taem mi ridim ol toktok ia, Tabu Spirit i bin fulumap rum. Mi bin filim se Papa blong yumi long Heven i bin save nius we mi bin kasem long dei ia. Mi bin filim se ol toktok we profet Jekob i bin raetem moa long 2000 yia i pas, oli bin raetem blong mi from dei ia mo i kam stret long Sevyia. Hem i bin save se mi no bin filim hapi mo mi harem nogud afta we mi harem se bae gel blong mifala bae i ded. Mo Hem i bin stap ia blong leftemap tingting blong famle blong mifala, wetem promes blong hem se Hem i bin mekem wan wei i rere blong wan dei, tru long paoa blong Laef Bakegen long Ded, bae “long ol bodi blong [mifala] bae [mifala] i luk God.”

Amanda i bin laef blong wan moa yia, be mi neva bin fogetem dei ia taem ol toktok blong Buk blong Momon i bin toktok long mi long taem blong nid blong mi, mo Lod i bin givim mi hop, kamfot, mo i mekem mi andastanem plan blong Hem. ■

Jina Berd, Yuta, YSA

*Taem mi  
ridim ol  
toktok ia,  
Tabu Spirit i  
bin fulumap  
rum. Mi bin  
filim se Papa  
blong yumi  
long Heven i  
bin save nius  
we mi bin  
kasem long  
dei ia.*



# MI PUTUM PROMES BLONG MORONAE LONG TES

**S**am yia i pas, mi bin stap long haos blong wan fren taem mi bin mitim tu yang man we tufala i dresap gud we tufala i talem se oli ol Lata-dei Sent misinari. Mi ting se hem i defren smol we oli aot long Itali i kam blong jenism laef blong ol pipol we oli biliw finis long Sevya.

Afta, mi bin askem olgeta blong kam long haos blong mi. "Sapos yutufala i wantem, yutufala i save kam blong yumi serem kalja blong yumi," mi talem. "Be yutufala i no mas ting se bae mi jenism religijn blong mi."

Long nekis naet, ol misinari oli bin tokbaot Buk blong Momon. Mi tingting se hemia i defren from se mi neva harem abaot hemia bifo. Mi invaetem tufala i kambak, be afta long nambatu visit, waef blong mi, Ana Maria, i talem se tufala i krangke mo bae hem i aot long haos long taem we mifala i stap storian. Mi tu, mi luk se ol misinari ia oli defren smol, be mi wantem save nomo wanem nao tufala i gat blong talem mo gohed blong stap mit wetem tufala.

Wan naet, taem Ana Maria i kambak hom, hem i bin harem mifala i stap tokbaot mared we i no save finis. Hemia i mekem hem i gat intres, mo mitufala i disaed se bae mifala i statem ol lesen ia tugeta bakegen. Hem i bin save gud long ol skripja mo oltaem, hem i bin gat wan longfala lis blong ol kwestin. Ol elda oli bin ansa sam long ol kwestin ia kwiktaem, be sam kwes-tin, tufala i mas gobak hom blong lukaotem ol ansa. Evri wick, tufala i no mestem blong kambak wetem ol ansa, mo evri wick, Ana Maria i gat wan nara lis blong ol kwestin.



*Mi bin askem Papa long Heven, "Buk blong Momon i tru o no, mo sapos i tru, wanem taem nao bae mi mas baptaes?"*

I no longtaem afta we mifala i bin finism ol lesen, Ana Maria i bin mekem mi mi supraes taem hem i bin askem raet long mi, blong hem i kasem baptaes. Mi bin talem long hem se mi no gat eni samting agensem sapos hem i tru blong jenism laef blong hem. Mi bin go long baptaes blong hem long 5 Maj 1995, mo mi bin harem gud long gudfala filing we i stap long taem blong seves.

Mi bin gohed blong rid plante abaot Jos, mo ol misinari oli bin gohed blong leftemap tingting blong mi. Nao, mi bin disaed blong putum promes blong Moronae long tes (luk long Moronae 10:4–5). Mi bin wantem blong save sapos Buk blong Momon i kam long God o sapos hem i jes wan stori buk nomo.

Wan dei long Jun 1995, mi bin stap miwan long haos; mi nildaon kolosap long bed blong mi mo mi bin askem Papa long Heven, "Buk blong Momon i tru o no, mo sapos i tru, wanem taem nao bae mi mas baptaes?" Wan-taem nomo mi bin filim long hat mo

maen blong mi wan klia voes we i talem long mi: "Buk blong Momon i tru." Afta mi bin gat wan klia tingting long wanem taem nao mi mas baptaes. Wan wick afta, mi bin prea baken mo mi bin kasem sem ansa. Hat blong mi i fulap wetem glad. Naoia, mi save se God i bin toktok long mi: Buk blong Momon i kam long God mo Josef Smit i wan tru profet.

Nao, long 17 Septemba 1995, mi bin go insaed long wota blong baptaes, wan yia mo haf afta we mi bin stat blong mitim ol misinari. I no longtaem afta, gel blong mitufala, Aba Jiara, i gat intres long Jos mo hem tu, i bin kasem baptaes. Long Jenuware 1997, famle blong mifala i bin sil long Bern Switselan Tempol.

Mifala i save se hemia i tru Jos, we Jisas Kraes i lidim tru long wan profet mo prishud. Mifala i talem tangkyu long Lod from lav blong Hem, blong Hem i lidim mifala long ol misinari, mo from save blong mifala long gospel. ■

Francesko Feraresi, Lombardi, Itali

# I Go long Evri Lanwis mo Pipol

I Kam long Lia MaKlanahan  
Ol Magasin blong Jos


Taem profet blong Buk blong Momon, Alma, i bin pasem ol histri blong ol pipol blong hem long boe blong hem, Hileman, hem i bin givim instraksen long boe blong hem blong tingbaot se Lod i gat wan “waes stamba tingting” blong holemtaet ol skripja (Alma 37:12). Hem i bin talem abaot ol histri ia se, “oli mas kipim olgeta mo pasem i kam daon long wan jeneresen i go long nara-fala wan, mo oli kipim mo sevem olgeta wetem han blong Lod go kasem taem we oli mas go aot long evri kantri, famle, lanwis, mo pipol” (Alma 37:4).

Long 1827 Josef Smit i bin kasem ol histri ia mo long yia 1829 i bin finis blong transletem olgeta long Inglis tru long presen mo paoa blong God. Buk ia, we oli pablism long 1830, i wan misinari tul we i gat paoa blong winim

tingting blong olgeta we oli stap ridim abaot tru gospel blong Jisas Kraes. Fas taem, oli bin printim 5000 kopi, be blong sendem Buk blong Momon i go long “evri kantri, famle, lanwis, mo pipol,” i luk olsem se bae i tekem wan longfala taem tumas.

Be yet, Lod i bin talem bakegen profesi ia long Josef Smit long 1833, i tokbaot finis wan dei taem we evri man bae i harem gospel we i fulwan long mama lanwis blong hem, mo long stret lanwis blong hem (luk long D&C 90:11). Buk blong Momon we i tekem ful gospel blong Jisas Kraes (luk long D&C 20:9), i plei wan ki rol blong mekem profesi ia i kamtru.

Long medel blong ol yia 1800, ol misinari oli bin tekem gospel i go long Yurop. Oli bin pablism Buk blong Momon long lanwis blong Denmak long 1851, mo afta i kamaot long lanwis blong Franis, Jemani,



Fas edisen blong Buk blong Momon, oli bin printim 5000 kopi.

Itali mo Wels long 1852. Tedei, ful Buk blong Momon i stap long 82 lanwis, wetem samfala pat we oli jusum we i stap long wan nara 25 lanwis. Profesi ia se evri pipol bae i harem gospel long lanwis blong olgeta i stap kamtru yia afta yia taem translesen mo misinari wok i stap muv i go fored.

## Wok blong Translesen


Wok blong transletem Buk blong Momon long Inglis i go long wan niu lanwis, samtaem i tekem plante yia blong blong finisim. Wok ia, i stat nomo afta we Fas Presidensi mo Kworom blong Olgeta Twelef Aposol oli bin apruvum wok ia mo i gat inaf namba blong ol memba we oli toktok long lanwis

ia blong oli wok olsem ol transleta. Ol transleta mo olgeta we oli luklukbak long wok ia, oli kasem ol gaedlaen we oli mas folet stretnet mo oli kasem instraksen blong stap kolosap long Spirit taem oli stap transletem ol toktok. Afta we translesen i finis, toktok i gotru long wan nara-fala rivi wetem sam nara wok-man blong Jos.

Afta we oli pablism, ol memba oli save oda long niu edisen tru long Distibusen Seves. Plante long ol memba ia, oli bin gat nomo sam jampa blong Buk blong Momon long lanwis blong olgeta, o long sam kes, oli gat nomo testemoni blong ol misinari.

## Buk blong Momon mo Misinari Wok

Taem oli openem wan ples blong mekem misinari wok long hem, lanwis i save stap olsem wan bigfala jalenj. I no gat tul blong Jos we i stap long lanwis blong eria ia, mo ol misinari oli mas lanem lanwis mo talem testemoni blong olgeta wetem Spirit. Long sam pat blong wol, plante pipol oli toktok wan seken lanwis, mo ol misinari oli save givim olgeta wan Buk blong Momon we i stap long lanwis ia. Bifo oli bin transletem Buk blong Momon long lanwis blong Mongolia, eksampol, plante memba long Mongolia oli bin stadi long lanwis blong Rasia.



## WAN PROFET I STAP TESTIFAE

"Mi no save andastanem olsem wanem wan waes man i save tingting se eni-wan i no nidim help blong Lod blong save raetem Buk blong Momon, we i bin stap long fored blong yumi blong moa long wan handred yia naoia, mo i bin pasem tes blong evri yia, nomata plante oli bin tokbaot nogud o agensem, from eni risen. Tedei, buk ia, we Josef Smit, we i bin wan tul long han blong Lod, i bin transletem mo buk ia i wan bigfala buk. Tedei, hem i bigfala misinari we yumi gat blong talemaot gospel ia; i no gat wan moa samting we yu save komperem wetem."

**President Heber J. Grant (1856–1945), *Gospel Standards*, komp. G. Homer Durham (1941), 15.**

Be gospel, oli andastanem gud taem i klia long stret lanwis blong man. Erik Gemel, we i bin go long misin long Slovenia Jubjana Misin stat long 2001 i go kasem 2003, i bin luk stret wanem samting i defren taem ol memba mo ol investigeta oli gat Buk blong Momon long stret lanwis blong olgeta. Hem i bin stap long misin blong 18 manis bifo Buk blong Momon i bin stap long lanwis blong Slovenia.

Wok i bin had. Fas branj blong Jos i bin stanap ten yia nomo i pas. Slovenia i bin kasem indipendens mo i stap long rod blong hem blong aot long lanwis we i stap fastaem blong Sebo-Kroasia. Ol misinari oli


bin tekem ol kopi blong Buk blong Momon long lanwis blong Sebo-Kroasia mo Inglis, we plante yang pipol i bin stadi long hem long skul. Be plante taem, ol pipol oli no wantem tekem buk from se oli no andastanem tufala lanwis ia. Erik i tingbaot se hem i filim emti blong talem testimoni long ol pipol long saed blong hamas Buk blong Momon i impoten mo i gat paoa—mo afta, blong talem long olgeta se hem i no gat wan kopi long lanwis blong olgeta.

Sikis manis bifo Erik i bin gobak hom, fas katen blong ol kopi blong Buk blong Momon long lanwis blong Slovenia i kam. Branji bin holem wan miting

mo long taem ia, wanwan memba mo misinari i bin kasem wan kopi. "I bin gat wan spesel spirit i bin stap," Erik i tingbaot. Hem i bin rekodem long jenol blong hem olsem wanem hem i bin filim blong holem wan gudfala buk olsem we man i wet long hem longtaem. "Hem i olsem blong holem ol stret buk blong gol," hem i raetem. Afta long miting, ol misinari oli tekem ol buk we i stap blong yusum long misinari wok. Erik mo kompanion blong hem oli bin glad tumas, mekem se oli go long apatmen blong tufala, oli openem ol bokis, putum ol buk i stap long ful ples mo oli bin tekem ol pikja blong tingbaot taem ia. Oli wantem serem kwik



*Taem translesen wok i stap muv i go fored, ol memba raon long wol, olsem Lea mo Flora Lotrik long Slovenia, oli bin eksperiensem glad ia blong holem blong fas taem wan kopi blong Buk blong Momon long stret lanwis blong olgeta.*



## WAN PROFET I STAP TESTIFAE

"I gat wan paoa insaed long buk ia we bae i stat blong kam insaed long laef blong yu stat long taem we yu tinghevi blong stadi long buk ia. Bae yu faenem bigfala paoa blong stanap agensem temtesen. Bae yu faenem paoa blong stap longwe long harem nogud. Bae yu faenem paoa blong stap long stret mo smol rod."

President Ezra Taft Benson (1899–1994), "The Book of Momon—Keystone of Our Religion," *Ensign*, Nov. 1986, 4; i stap tu long magasin ia log pej 52.

ol buk ia wetem ol pipol. Wetem Buk blong Momon long lanwis blong Slovenia long han, ol misinari oli bin gat moa sakeses wetem ol pipol, be tu, oli bin gat wan wei blong leftistmap testemoni blong ol memba we oli no bin aktiv tumas, we oli no bin kam long Jos blong plante yia.

Long ol las sikis manis blong misin blong hem, Erik i bin luk se ol testemoni blong ol memba blong Slovenia i kam bigwan. Hem i talem: "Taem oli kasem Buk blong Momon long lanwis blong olgeta, oli bin andastanem gud. I draon insaed long hat blong olgeta." Bifo, ol spika mo ol tija long ol miting blong Jos oli mas ridim ol skripja long lanwis blong Sebo-Kroasia mo oli mas gat wan i transletem mo eksplenem sam long ol toktok. Erik i tingbaot, "Mi bin filim olsem we mifala

i bin stap yusum toktok blong wan nara lanwis." Taem ol memba oli stat blong ridim Buk blong Momon long stret lanwis blong olgeta, Erik i talem se "olsem wanem oli andastanem gospel i kam antap kwiktaem".

### Long Stret Lanwis blong Olgeta


Mojka Selesnika, i wan memba we i bin joenem Jos long Slovenia bifo we Buk blong Momon i stap long lanwis blong Slovenia. Testemoni blong hem abaot gospel i kam taem hem i bin stap lisin long ol misinari mo i stap stadi long Buk blong Momon long lanwis blong Kroasia mo Inglis. Afta we translesen blong Slovenia i bin finis, Mojka i bin ridim toktok we oli bin transletem mo i bin filim paoa blong ol toktok long stret lanwis blong hem. Hem i tingbaot:

"Mi bin filim trutok i kam bigwan moa long fored blong mi i klia mo i simpol mo i klin gud. Hem i olsem voes blong Krieta blong mi we i stap toktok long mi long stret lanwis blong mi, lanwis we mama blong mi i stap toktok long hem."

Ol memba raon long wol oli gat ol semmak filing ia taem oli kasem Buk blong Momon long lanwis blong olgeta. Long yia 2003, afta we oli bin transletem Buk blong Momon long Kekji, wan lanwis we ol pipol blong Maya oli toktok long hem long Gwatemala mo Belis, ol transleta oli luklukbak long translesen wetem ol grup blong ol lokol memba. Wan transleta i tingbaot: "Mifala i pulum tugeta wan grup blong ol paeonia long Senahu japel blong oli ridim, mo taem mifala i finisim blong ridim wan toktok long skripja, ples i kwaet evriwan insaed



Afta long wan translesen, ol memba blong Jos we oli toktok long lanwis ia, oli stap askem olgeta blong luklukbak long toktok we oli bin raetem. Stat long lef: Wolta Barilas Soto, Maek Pek, Suleni Rubi Siera, Jon Bringhes, mo Josefina Kukul Tiul, oli stap luklukbak long Kejki Buk blong Momon long koban, Gwatemala.



## WAN PROFET I STAP TESTIFAE

"Tru long presen mo paoa blong God, Josef Smit i bin transletem buk ia (Buk blong Momon) aot long oriijinal lanwis blong buk, mo aot long ol raeting we oli bin raetemdaon long ol buk blong gol i go long lanwis we yumi stap ridim naoia insaad long buk; mo buk ia i tekem ful Gospel we i no gat en. Bae hem i lidim ol man blong kasem save blong trutok we tru long hem, bae oli save stap sef mo gobak long ples we God i stap long hem, mo kasem glori blong hem mo laef we i no gat en."

President Joseph F. Smith (1838–1918), *Teachings of Presidents of the Church: Joseph F. Smith* (1998), 42.

long rum. Oli kam blong save gud, mo strong paoa blong Spirit i bin stap long taem ia. Hem i bin wan tabu eksperiens."

Wan long ol memba long miting ia, Elvira Tsi, i talem tangkyu from Kekji translesen blong Buk blong Momon from ol blesing we bae i tekem i kam long jeneresen we i stap kam antap. Hem i talem se translesen bae i letem ol yang memba oli "kasem wan bigfala save abaot toktok blong Lod mo bae oli gat respek long wanem we Lod i wantem."

Blong ol memba blong Jos we oli stap stadi long Buk blong Momon long lanwis blong olgeta, hem i wan ples we plante blesing we oli no save kaontem i kamaot long hem. Taem ol memba oli "lanem wetem prea mo tij wetem ol skripja," Fas Presidensi i talem se "testemoni blong olgeta bae i gro, save blong olgeta bae i kam antap, lav blong olgeta long ol famle mo ol narawan bae i kam bigwan moa, paoa blong

olgeta blong save givim seves long ol narawan bae i kam bigwan moa, mo bae oli kasem moa paoa blong stanap agensem temtesen mo stap difendem trutok mo stret mo gud fasin."<sup>1</sup>

## OL BLESING WE I GAT PAOA

Ol bigfala blesing we Buk blong Momon i tekem long laef blong olgeta we oli bin stadi long hem i mekem se oli gat wan strong tingting blong serem buk ia wetem ol narafala man, mo oli stap mekem profesia i stap kamtru sloslo. Evri yia, oli stap serem samples fo milian kopi blong Buk blong Momon raon long wol long ova 100 lanwis, taem we wan afta wan, ol memba mo ol misinari, oli serem ol testemoni blong olgeta abaot Jisas Kraes. "Waes stamba tingting" we Alma i bin tokbaot long taem bifo i stap kamaot taem wol i stap kasem Buk blong Momon, mo taem wanwan laef i stap jenis. ■

### NOT

1. Fas Presidensi leta, 15 Oktoba 2008.

## OL FOMAT WE OLI STAP

Buk blong Momon i stap long ol defren fomat, i no buk nomo. Hemia i mekem se i givim janis long ol pipol blong stadi mo lan long ol defren wei.

## INTANET MO OL LEKTRONIK EDISEN TUL WE YU SAVE

### Tekem Olbaot

Oli save ridim Buk blong Momon long Intanet long ([scriptures.lds.org](http://scriptures.lds.org)) mo long ol lektronik tul we yu save tekem olbaot long ([mobile.lds.org](http://mobile.lds.org)). Naoia, i gat 21 lanwis we i stap, mo bae i gat moa yet blong kam. Ol tul blong kros refrens mo lukaotem ol defren samting i mekem i posibol blong stadi long skripja long wan defren wei, mo oltaem kasem wan niu samting.

## OL ODIO EDISEN


Naoia i stap, i gat ol odio edisen blong Buk blong Momon long lanwis blong Inglan, Japan, Koria, Portugal, mo Spen. Yu save daonlodem ol rekoding ia i fri long [scriptures.lds.org](http://scriptures.lds.org) o yu save pem ol Sidi tru long Distribusen Seves long ([store.lds.org](http://store.lds.org)). Sam japta oli stap tu long odiokaset long ol lanwis ia, Kakjikel, Mam, Navaro, Kije, mo Tsotsil. Wok i stap gohed blong mekem ol odio edisen long ol narafala lanwis.



## OL NARA EDISEN

Wetem ol kala pikja mo ol simpol toktok, buk ia, Ol Stori blong Buk blong Momon oli moa blong lanem skripja tru long skripja blong olgeta we oli stap lan blong rid. Oli printim long moa long 70 lanwis. Ol Stori blong Buk blong Momon oli stap tu long [scripturestories.lds.org](http://scripturestories.lds.org).

Mo tu, tru long Distribusen Seves, i gat ful set blong DVD long Saen Lanwis blong Amerika, mo i gat vesen we leta blong hem i bigwan (long lanwis blong Inglan, Portugal, mo Spen), mo i gat Inglis Brel edisen (blong olgeta we oli blaen).



# OL KWESTIN WE OLI ASKEM OLTAEM ABAOT BUK BLONG MOMON



## Wanem hem i Buk blong Momon, mo olsem wanem nao yu save komperem long Baebol?

Buk blong Momon i wan buk blong ol skripja we i semmak long Baebol. Hem i wan nara testeman blong Jisas Kraes.<sup>1</sup> Baebol i tokbaot bigwan laef mo ol tijing blong Isrel blong bifo. Buk blong Momon i tekem ol raeting blong plante grup we i bin go long ol Amerika, wetem histri blong wan famle we i bin livim Jerusalem long yia 600 B.K. Ol pipol ia, oli kamaot long laen blong haos blong Isrel. Nao Baebol mo Buk blong Momon, tugeta ol pipol we oli kamaot long sem laen nomo oli bin rae tem, be oli bin stap long ol defren pat blong wol.

Semmak olsem Baebol, Buk blong Momon i moa bitim wan rekod blong histri. Hem i tekem ful gospel

blong Jisas Kraes (luk long D&C 20:9): ol tijing, ol doktrin mo ol profesi we i testifae abaot God Papa, mo Pikinini blong Hem, Jisas Kraes.

Profet Josef Smit i bin eksplenem se Buk blong Momon “i talem long yumi se Sevya blong yumi i bin kamaot long graon ia (Ol Amerika) afta long taem we Hem i bin laef bakegen long ded; mo Hem i bin putum Gospel long ples ia, we i fulwan, we i rij, mo i gat paoa mo blesing; se oli bin gat ol Aposol, ol Profet, ol Pasta, ol Tija, mo ol Ivan jelis, semfala oda, semfala prishud, semfala odinens, presen, paoa, mo blesing, olsem we i bin stap long graon long Is; . . . se laswan long ol profet we i bin stap long medel blong olgeta, i bin kasem oda blong rae tem wan sot stori blong ol profesi blong olgeta, histri

*Ol kwestin oli kam long ol fren, famle, olgeta we oli intres, o olgeta we oli agens; yumi evriwan i gat ol man we oli askem yumi ol kwestin abaot Buk blong Momon. Hemias sam ansa we yu save givim.*



mo sam moa, mo blong go haedem olgeta insaed long graon, blong hem i save kamaot mo kam wan we tem Baebol blong ol stamba tingting blong God long ol las dei oli kamtru.”<sup>2</sup>

Ol memba blong Jos oli stap stadi long tugeta, Baebol mo Buk blong Momon. Be i tru we aot long fo yia, i gat tu yia we i blong stadi nomo long Baebol long taem blong Sandei Skul. (Blong save moa long saed blong topik ia, luk long ol pej (16, 24, mo 52) insaed long magasin ia.)

## Hu Nao I Raetem Buk blong Momon?

Ol profet blong bifo, ol sem Nifae, Jekob, Momon, mo boe blong Momon, Moronae, oli ol stamba man we oli raetem buk ia. Momon i putum tugeta mo i raetemsot ol rekod we ol



profet oli bin raetem abaot histri, profesi, mo ol tijing. Hem i putum tu sam long ol eksperiens blong hem wan. Momon i bin raetem ol histri ia long ol pej we oli wokem long aean—we kala blong hem i gol—mo plante taem oli tokbaot olsem ol buk blong gol.

Afta long ded blong Momon, Moronae i bin finisim rekod mo i bin berem long wan hil blong i stap gud kasem dei blong yumi. Long 1823, Moronae i kamaot olsem wan enjel long Josef Smit mo i bin soem hem weaples hem i bin berem buk ia. Fo yia afta, Josef i bin gat raet blong tekem buk ia. Hem i “translestem rekod ia tru long presen mo paoa blong God” aot long lanwis blong bifo we oli bin raet long hem, i go long Inglis.<sup>3</sup> Afta, hem i bin pablism mo serem Buk blong Momon. (Blong save moa long saed blong topik ia, luk long ol pej (22 mo 72) insaed long magasin ia.)

### **Wanem i hapen long ori-jinol rekod—ol buk ia we oli wokem long gol?**

Josef Smit i bin kasem ol buk ia long Septemba 1827, mo i bin holem

## **Huia bakegen i bin luk ol buk ia we oli wokem long gol?**

kasem long spring blong yia 1829. Taem hem i bin raetem histri blong hem long 1833, hem i bin eksplenem wanem i bin happen long ol buk ia we oli wokem long gol: “Taem, folet toktok we i stap, mesenja Moronae i bin askem olgeta buk ia, mi bin givim long hem; mo hem i holem olgeta kasem tedei, hemia long 2 mei long yia wan taosen eit handred mo teti-eit” (luk long Joseph Smith—History 1:60).

### **Huia bakegen i bin luk ol buk ia we oli wokem long gol?**

Antap long Josef Smit, i gat sam moa man mo woman we oli bin luk ol buk ia we oli wokem long gol mo oli bin testifae se oli bin stap. Leven man stret, we oli save long olgeta olsem Olgeta Tri Witnes, mo Olgeta Eit Witnes, oli bin rekodem testemoni blong olgeta se oli bin luk ol buk ia, mo long saed blong Olgeta Eit Witnes, oli bin holem ol buk ia. Testemoni blong olgeta i stap long fored blong wanwan kopi blong Buk blong Momon.

Ol man ia, oli stap olsem ol strong witnes blong Buk blong Momon, ating moa



from se sam long olgeta oli kam “agensem Josef blong smol taem,” Elda Jefri R. Holan blong Kworom blong Olgeta Twelef Aposol, i talem. Be, oli bin “testifae kasem ded blong olgeta se oli bin luk wan enjel mo oli bin holem olgeta buk ia we oli wokem long gol. ‘Tru long paoa blong God mo i no tru long paoa blong man, oli bin soem olgeta buk ia long mifala’ oli talem. ‘Taswe mifala i save gud se wok ia i tru.’”<sup>4</sup>

### **I gat ol pruf blong wol ia we i soem se Buk blong Momon i tru?**

Nomata yumi no mekem bilif blong yumi i stanap long pruf blong wol ia, i gat pruf long saed blong lanwis, histri mo akeoloji (wok blong digim graon blong faenem samting blong bifo), abaot Buk blong Momon. Eksampol,



aedia blong raet long ol pej we oli wokem long aean, wan taem oli bin talem se i no tru, be i no longtaem i pas, i bin gat plante eksampol blong ol tabu raeting we oli raetem long ol pej we oli wokem long aean—sam oli haedem long ol ston bokis—we oli bin faenem olgeta.

Ol man we oli stadi long ol lanwis, oli bin luk se ol wanwan toktok mo ful sentens blong Buk blong Momon, saon blong olgeta i defren smol long Inglis, be i gat ful mining blong hem long Hibru mo ol lanwis we kolosap i semmak long Hibru, we ating ol pipol long taem blong Buk blong Momon oli save long hem—ol lanwis we yangfala Josef Smit i no bin save nating long olgeta.

Be ol kaen pruf ia oli no wanem i winim tingting blong yumi se Buk blong Momon i tru. Hem i from

fet mo revelesen we i kam long wanwan man.

### **Olsem wanem bae mi save se Buk blong Momon i tru?**

Wan sua wei blong save hemia long yuwan i tru long paoa blong Tabu Spirit. Las japta long Buk blong Momon, i stap invaeten eniwan we i stap ridim, tingting hevi long hem, mo i wantem tru blong save sapos hem i tru, i blong askem long Papa long Heaven long nem blong Jisas Kraes. Olgeta we oli folem wei ia, bae oli save tru long paoa blong Tabu Spirit se buk ia i tru (luk long Moronae 10:3–5). Plante milian memba blong Jos oli bin prea mo save tru long witnes blong Tabu Spirit se Buk blong Momon i tru. (Blong save moa long saed blong topik ia, luk long ol pej (4, 60, mo 80) insaed long magasin ia.)

### **Mi konfius wetem wanem i stap long Revelesen 22:18–19, we i stap talem yumi blong no ademap eni samting long toktok blong God.**

Wan long ol ki bilif blong yumi i we God, oltaem, i bin talemaot

## **BLONG LANEM MOA ABAOT BUK BLONG MOMON**

gat plante plante infomesen i stap long Intanet we oli stap long ol defren lanwis we i save helpem yu blong lanem moa abaot Buk blong Momon, mo serem infomesen ia wetem famle mo fren blong yu.

- Blong ridim Buk blong Momon long intanet, visitim scriptures.lds.org/bm.
- Blong lanem moa abaot Buk blong Momon, blong askem ol kwestin, o blong toktok long intanet wetem ol misinari, go long mormon.org/book-of-mormon.
- Blong askem wan fri kopi blong buk, visitim mormon.org/free-book-of-mormon.
- Blong gat moa infomesen, atikol, mo eksplenesen, luk long lds.org/study/topics/book-of-mormon?lang=eng.

tingting blong Hem long ol pikinini blong Hem long wol ia, mo bambae i mekem oltaem. Mifala i bilivim se Baebol i toktok blong God, be mifala i no biliv se hem i tekem evri revelesen we God i bin givim, o bae i givim long ol profet blong Hem. Tedei, Hem i gohed blong talemaot tingting blong Hem tru long ol profet mo ol aposol we oli stap laef, fandesen blong Jos blong Jisas Kraes blong Ol Lata-dei Sent (luk long Efesas 2:20).

Taem Aposol Jon i bin raetem buk blong Revelesen, hem i no las buk long Baebol. OlTesteman mo Niu Testeman oli bin joenem tufala i fas waffles olsem wan buk blong skripja nomo—we naoia oli singaotem Baebol—long nambatri senturi ia nomo A.K.

Long semfala wei, Dutronome 4:2 i talem long yumi blong no ademap eni samting long toktok blong Moses. I tru, ves ia, we i stap eli long OlTesteman i no mekem se evri nara toktok long Baebol oli nogud. Mo Moses o Jon i bin save tokbaot blong jenisim wan buk we i no stap yet; be oli

bin wonem man agensem fasin blong jenism ol trutjing blong gospel.

Buk blong Momon, we i tekem ful gospel, i no jenism toktok blong God, be i konfemem. (Blong save moa long saed blong topik ia, luk long ol pej (24 mo 38) long magasin ia.)

**Mi bin harem se i gat ol jenism we oli bin mekem long Buk blong Momon afta we oli bin pablism blong fas taem. Wanem nao i bin jenism mo from wanem?**

Ansa blong kwestin ia i dipen long hamas yu andastanem abaot translesen blong Buk blong Momon, mo rod blong go kasem taem oli pablism.

1. Taem Josef Smit i bin transletem ol buk blong gol tru long paoa blong God, hem i bin talemaot ol toktok long wan man we i bin stap raet blong hem. Olgeta man we oli stap raet, oli mekem ol mistek long olsem wanem oli raetem toktok mo grama blong olgeta. Eksampol, long 1 Nifae 7:20 ol toktok ia “were sorrowful” oli bin raetem olsem “ware sarrful.” Ol man blong raet oli bin



## **Olsem wanem bae mi save se Buk blong Momon i tru?**

skul, be long taem ia, oli no gat wan standet nomo blong folem blong raetem ol toktok.

2. Orijinol buk we oli bin raetem, hemia translesen blong hem, oli bin mekem kopi long hem blong mekem wan niuwan blong printa i yusum. Long taem ia, oli bin stretem sam fasin blong raetem ol toktok mo sentens, mo fasin blong seperetem ol sentens, oli ademap tu. Be i bin gat sam niu mistek i go insaed, from se oli no bin kopi gud long ol toktok ia.

3. Printa i bin traem evri samting we hem i save mekem blong mekem raeting i stret. Be, wanwan taem hem i ademap sam moa mistek. Eksampol, long Alma 57:25 hem i no ridim gud toktok ia “joy” mo hem i taepem “foes.”

4. Profet Josef Smit i bin luk gud long ol fas tri edisen blong Buk blong Momon, mo hem i bin gohed blong help blong stretem ol samting blong i kam gud moa. Be, sam long ol mistek, oli no bin faenem olgeta kasem taem oli mekem sam long ol las edisen. Long 1981, mistek blong printa, oli

bin stretem long Alma 16:5 mo oli bin jenism toktok ia “whether” i go long “whither”—mekem se i go stret wetem orijinol buk olsem we Profet i bin transletem aot long ol buk blong gol.

5. Ol nara jenism, i gat wan niu japta, mo fasin blong mekem ol ves, mo ol futnot mo ol kros refrens.

### **Serem Wan Kopi**

I nomata wanem kwes-tin ol pipol oli stap askem abaot Buk blong Momon, buk ia i stap difendem hemwan nomo. Yu save testifae abaot buk ia, yu save serem wan kopi i go, mo invaetem ol narafala man blong prea abaot blong ogletawan. Sapos wan i gat wan tru hat mo i wantem tru blong save sapos buk ia i tru, Lod bae i “soemaot trutok blong ol samting ia long [hem], tru long paoa blong Tabu Spirit” (Moronae 10:4). ■

### **OL NOT**

1. Eksampol, luk long, Boyd K. Packer, “The Book of Mormon: Another Testament of Jesus Christ,” *Liahona*, Jen. 2002, 71.
2. *Teachings of Presidents of the Church: Joseph Smith* (2007), 64.
3. *Teachings: Joseph Smith*, 60.
4. Jeffrey R. Holland, “Safety for the Soul,” *Liahona*, Nov. 2009, 90.

# WAN TESTEMONI, WAN KAVENAN, MO WAN WITNES

**O**l tabu konfemesen we mi bin gat long saed blong Sevya mo jos blong Hem we i kambak, i kam fas taem long mi taem mi bin wan yang man, taem mi bin ridim Buk blong Momon. Taem mi bin stap ridim tabu rekod ia nao we mi bin filim—bakegen mo bakegen—smol voes long Tabu Spirit we mi no save tanem baksaed blong mi long hem, we i stap talem long sol blong mi se buk ia i tru.

Blong ridim buk ia i stat blong laet blong mi. Hem i stamba blong stret save blong mi long saed blong spirit se God i stap laef, se Hem i Papa long Heven, mo i gat wan plan blong stap glad we i stap blong mi long taem we i no save finis. Hem i bin lidim mi blong lavem Tabu Baebol mo ol nara fala tabu standet buk blong Jos. Hem i bin tijim mi blong lavem Lod Jisas Kraes, blong save smol long bigfala lav mo sore blong Hem, mo blong lukluk long gladhat mo bigfala paoa blong sakrifaes we i pemaot man.

From se mi bin lanem miwan se Buk blong Momon i wan tru witnes—wan nara testeman mo wan niu kavenan—se Jisas, Hem i Kraes, mi bin lanem tu se Josef Smit i bin mo hem i wan profet blong God. Olsem we bigfala bubuman blong mi i bin talem long taem blong Restoresen, “I no gat wan nogud man we i save raetem wan kaen buk ia; mo i no gat wan gudfala man i save raetem tu, be nomo sapos buk ia i tru, mo hem i kasem komanmen we i kam long God blong mekem olsem.”<sup>1</sup>

Antap long ol fas konfemesen blong mi, i kam ol nara taem wetem plante infomesen mo ol tabu taem we i kamaot long mi we tedei, i givim bigfala mining long taem blong mi, long stamba tingting blong laef blong mi, mo wan strong fandesen long testemoni blong mi.

Nao. Mi no bin go long sip wetem brata blong Jared.



*Mi talemaot  
witnes blong mi  
se Buk blong  
Momon i wan  
niu kavenan,  
wan niu teste-  
man we i ka-  
maot long Niu  
Wol i go long ful  
wol.*

Mi no bin harem King Benjamin i talem toktok blong hem olsem wan enjel. Mi no bin stap long medel blong grup blong ol Man blong Nifae we oli bin tajem ol mak blong Lod we i laef bakegen long ded, mo mi no bin krae wetem Momon mo Moronae from pipol blong tufala i bin lus evriwan. Be testemoni blong mi abaot rekod ia mo pis we hem i tekem i kam long hat blong man—we i kam long mi tru long kwaet voes blong Tabu Spirit, semmak olsem we oli bin givim long yufala—i wan testemoni we i stap mo i no gat kwestin long hem, semmak olsem testemoni blong olgeta. Mi testifae abaot buk ia, semmak olsem sapos we mi bin stap wetem Ol Tri Witnes mo Ol Eit Witnes, se mi bin holem olgeta buk ia we oli wokem long gol.

Mi testifae bakegen se i no gat wan long yumi i save kam blong biliv fulwan long wok blong lata-dei ia mo i faenem wan ful man blong pis mo kamfot long taem tedei, be kasem taem nomo hem i akseptem se Buk blong Momon mo Lod Jisas Kraes oli kam long heven, mo mi testifae long hemia. Olsem we Momon i bin talem long Moronae long wan long ol bigfala taem blong olgeta, nao mi askem long yufala long bigfala taem blong yumi tedei: “Holem taet fet long Kraes . . . Mo bae gladhat blong God Papa, we jea blong hem i stap hae long ol heven, mo Lod blong yumi Jisas Kraes, we i stap sidaon long raet han blong paoa blong hem, . . . i hapen, mo stap wetem yu blong oltaem” (Moronae 9:25–26).

Buk blong Momon i tabu wok blong bigfala las kavenan blong Kraes wetem ol man. Hem i wan niu kavenan, wan niu testeman we i kamaot long Niu Wol i go long ful wol. Laet we mi stap wokbaot folem i laet blong Hem. Sore blong hem mo bigfala paoa blong Hem i lidim mi—mo yu—blong stap olsem ol witnes blong hem long wol. ■

## NOT

1. George Cannon, we oli kwotem long “The Twelve Apostles,” long Andrew Jenson, ed., *The Historical Record*, 6:175.

I Kam long Elda  
Jefri R. Holan

Blong Kworam blong  
Olgeta Twelef Aposol






### *Mo Hem I Bin Mekem Evriwan long Olgeta Oli Kam Gud Bakegen, i kam long Geri Kap*

*“Yufala i gat eniwan we i sik long medel blong yufala? Karem olgeta i kam long ples ia. . . .*

*“. . . From mi luk se fet blong yufala i inaf blong mi mas me-kem yufala i oraet.*

*“Mo i bin hapan se taem we hem i bin toktok olsem ia nao, evri grup blong pipol ia long semtaem i bin go fored wetem ol-*

*sik blong olgeta mo olgeta we i gat hadtaem, mo blong olgeta we bodi i nogud, mo blong olgeta we i blaen, mo wetem blong olgeta we oli no save toktok, mo wetem evriwan we i bin gat hadtaem long enifasin; mo hem i bin mekem olgeta evriwan i kam oraet taem we oli bin karem olgeta i go fored long hem.”*  
*(3 Nifae 17:7–9).*



“Nao, . . . evriwan long evri en blong wol,  
lisin long ol toktok ia mo biliv long Kraes;  
mo sapos yufala i no biliv long ol toktok ia  
biliv long Kraes. Mo sapos bae yufala i biliv  
long Kraes bae yufala i biliv long ol toktok ia,  
from oli ol toktok blong Kraes, mo . . . oli tijim  
evri man se oli mas mekem gud samting.”

“Mo sapos oli no ol toktok blong Kraes, yufala  
i jajem—from Kraes bae i soem long yufala,  
wetem paoa mo bigfala glori, we oli ol toktok  
blong hem, long las dei” (2 Nifae 33:10-11).